

ЎЗБЕКИСТОН РЕСПУБЛИКАСИ
ҚОНУНЧИЛИК
ТЎПЛАМИ

49-50-сон
(1121-1122)
2023 йил
декабрь

Ўзбекистон Республикаси қонунчилик тўплами беш бўлимдан иборат:

биринчи бўлимда Ўзбекистон Республикаси қонунлари ва Ўзбекистон Республикаси Олий Мажлиси палаталарининг қарорлари эълон қилинади;

иккинчи бўлимда Ўзбекистон Республикаси Президентининг фармон ва қарорлари эълон қилинади;

учинчи бўлимда Вазирлар Маҳкамасининг қарорлари эълон қилинади;

тўртинчи бўлимда Ўзбекистон Республикаси Конституциявий судининг қарорлари эълон қилинади;

бешинчи бўлимда вазирликлар, давлат қўмиталари ва идораларининг Ўзбекистон Республикаси Адлия вазирлигида давлат рўйхатидан ўтказилган норматив-ҳуқуқий ҳужжатлари эълон қилинади.

МУНДАРИЖА

Иккинчи бўлим

499. «Қишлоқ хўжалигида эркин бозор муносабатларини янада ривожлантиришнинг қўшимча чора-тадбирлари тўғрисида» Ўзбекистон Республикаси Президентининг 2023 йил 12 декабрдаги ПФ–205-сон Фармони
500. «Қашқадарё вилоятини 2024-2025 йилларда комплекс ижтимоий-иқтисодий ривожлантириш бўйича қўшимча чора-тадбирлар тўғрисида» Ўзбекистон Республикаси Президентининг 2023 йил 14 декабрдаги ПҚ–389-сон қарори
501. «Пахтачиликда уруғчилик тизимини ривожлантириш ҳамда пахта ҳосилдорлигини оширишнинг қўшимча чора-тадбирлари тўғрисида» Ўзбекистон Республикаси Президентининг 2023 йил 15 декабрдаги ПҚ–391-сон қарори

Бешинчи бўлим

502. Ўзбекистон Республикаси ёшлар сиёсати ва спорт вазирининг 2023 йил 10 ноябрдаги 18-мх-сон «Ўзбекистон Республикаси Ёшлар сиёсати ва спорт вазирлиги стипендиясини тайинлаш ва тўлаш тартиби тўғрисидаги низомни тасдиқлаш ҳақида»ги буйруғи (*Ўзбекистон Республикаси Адлия вазирлиги томонидан 2023 йил 4 декабрда рўйхатдан ўтказилди, рўйхат рақами 3479*)
503. Ўзбекистон Республикаси ички ишлар вазирининг 2023 йил 2 ноябрдаги 602-сон «Жисмоний ва юридик шахсларга тегишли итларни умумий бўйсунувчанлик ва ҳимоя-қоровул кўникмалари бўйича тайёрлаш учун пуллик хизматлар кўрсатиш, шунингдек наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш тартиби тўғрисидаги низомни тасдиқлаш ҳақида»ги буйруғи (*Ўзбекистон Республикаси Адлия вазирлиги томонидан 2023 йил 5 декабрда рўйхатдан ўтказилди, рўйхат рақами 3480*)
504. Ўзбекистон Республикаси ички ишлар вазирининг 2023 йил 2 ноябрдаги 601-сон «Ички ишлар органларида хизматга номзодларни танлаб олиш тадбирларини ташкил этиш ва ўтказиш тартиби тўғрисидаги йўриқномани тасдиқлаш ҳақида»ги буйруғи (*Ўзбекистон Республикаси Адлия вазирлиги томонидан 2023 йил 6 декабрда рўйхатдан ўтказилди, рўйхат рақами 3481*)
505. Экология, атроф-муҳитни муҳофаза қилиш ва иқлим ўзгариши вазирлиги, Қишлоқ хўжалиги вазирлиги ҳамда Иқтисодиёт ва молия вазирлигининг 2023 йил 23 ноябрдаги МХ-16, 01/24-09-305 ва 88-сон «Бошоқли дон экинлари сомони ёқиб юборилиши натижасида етказиладиган зарарни аниқлаш ҳамда ушбу ҳолатларни содир этган юридик ва жисмоний шахсларга нисбатан жарималар қўллаш бўйича низомни тасдиқлаш ҳақида»ги қарорга ўзгартиришлар киритиш тўғрисида»ги қарори (*Ўзбекистон Республикаси Адлия вазирлиги томонидан 2023 йил 7 декабрда рўйхатдан ўтказилди, рўйхат рақами 1647-3*)
506. Ўзбекистон Республикаси иқтисодиёт ва молия вазирининг 2023 йил 13 ноябрдаги 84-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномани тасдиқлаш ҳақида»ги буйруқ, шунингдек унга ўзгартириш ва қўшимчаларни ўз кучини йўқотган деб топиш тўғрисида»ги буйруғи (*Ўзбекистон Республикаси Адлия вазирлиги томонидан 2023 йил 7 декабрда рўйхатдан ўтказилди, рўйхат рақами 2282-9*)
507. Ўзбекистон Республикаси адлия вазирининг 2023 йил 7 декабрдаги 21-мх-сон «Товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш учун талабномаларни тузиш, топшириш ва кўриб чиқиш қоидаларини тасдиқлаш

тўғрисида»ги буйруғи (*Ўзбекистон Республикаси Адлия вазирлиги томонидан 2023 йил 7 декабрда рўйхатдан ўтказилди, рўйхат рақами 3482*)

508. Ўзбекистон Республикаси ички ишлар вазирининг 2023 йил 2 ноябрдаги 503-сон «Ўзбекистон Республикаси Ички ишлар вазирлиги озодликдан маҳрум қилиш туридаги жазони ижро этиш муассасаларининг ички тартиб қоидаларига ўзгартириш ва қўшимчалар киритиш тўғрисида»ги буйруғи (*Ўзбекистон Республикаси Адлия вазирлиги томонидан 2023 йил 11 декабрда рўйхатдан ўтказилди, рўйхат рақами 2495-7*)

509. Ўзбекистон Республикаси иқтисодиёт ва молия вазирининг 2023 йил 4 ноябрдаги 82-сон «Кадастр йиғмажилдининг муқоваси ва таркибидаги электрон ахборот тизимида шаклланадиган маълумотларнинг намунавий жадваллари, қайдномалари ва бланкалари шаклларини тасдиқлаш ҳақида»ги буйруғи (*Ўзбекистон Республикаси Адлия вазирлиги томонидан 2023 йил 12 декабрда рўйхатдан ўтказилди, рўйхат рақами 3483*)

Вазирликлар, давлат қўмиталари ва идораларнинг норматив-ҳуқуқий ҳужжатларини давлат рўйхатидан ўтказиш ҳолати тўғрисидаги маълумот

ИККИНЧИ БЎЛИМ

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ФАРМОНИ

499 Қишлоқ хўжалигида эркин бозор муносабатларини янада ривожлантиришнинг қўшимча чора-тадбирлари тўғрисида*

Қишлоқ хўжалигида эркин бозор муносабатларини янада ривожлантириш, пахта-тўқимачилик кластерлари (кейинги ўринларда — кластер) ва қишлоқ хўжалиги маҳсулотларини етиштирувчилар ўртасидаги муносабатларни бозор тамойиллари асосида такомиллаштириш, тармоқда соғлом рақобат муҳитини шакллантириш мақсадида:

1. Белгилаб қўйилсинки, 2024 йил ҳосилидан бошлаб:

пахта хом ашёсини етиштирувчи хўжаликлар (кейинги ўринларда — етиштирувчилар) ва кластерлар ўртасида пахта хом ашёсини етказиб бериш бўйича фьючерс шартномалари тупроқ ҳосилдорлиги нормативлари доирасида Ўзбекистон республика товар-хом ашё биржасининг «пахта хом ашёси секцияси»да (кейинги ўринларда — биржа) ҳар бир ҳудуд (Қорақалпоғистон Республикаси ёки тегишли вилоят) бўйича алоҳида ўтказиладиган савдолар натижаларига кўра тузилади;

фьючерс шартномасига мувофиқ етказиб берилиши лозим бўлган ҳажмдан ортиқча етиштирилган, шунингдек, кластер билан фьючерс шартномаси тузмаган ҳолда, ўз маблағлари, шу жумладан жалб қилинган маблағлари ва тижорат кредитлари ҳисобига етиштирилган пахта хом ашёси етиштирувчилар томонидан биржа орқали тадбиркорлик субъектларига сотилади ёки (ва) қайта ишланади. Бунда:

фьючерс шартномаси бўйича ортиқча етиштирилган пахта хом ашёси фьючерс шартномаси тузилган кластерга тўғридан-тўғри сотилиши мумкин;

пахта хом ашёсини қайта ишлашдан олинган пахта толаси ва иккиламчи маҳсулотлар (чигит, линт ва ўлик пахта) тўлиқ ҳажмда биржа орқали сотилади.

Белгилансинки, мазкур бандда назарда тутилган тартиб етиштирувчилар томонидан сотиладиган уруғлик пахта хом ашёси учун татбиқ этилмайди.

2. Фермер хўжалиги ўз мажбуриятлари бўйича, шу жумладан ер ижараси, фьючерс ва кредит шартномаларида назарда тутилган мажбуриятлари бўйича ўз мол-мулки билан жавоб бериши белгилансин.

Бунда, фермер хўжалигининг бошлиғига фермер хўжалигининг мол-мулки етарли бўлмаган тақдирда фермер хўжалигининг мажбуриятлари бўйича ўзига қарашли мол-мулк билан қонунчиликка мувофиқ субсидиар жавобгарлик юклатилганлиги маълумот учун қабул қилинсин.

3. Иқтисодиёт ва молия вазирлиги Қишлоқ хўжалиги вазирлиги ҳамда

* Ушбу Фармон «Қонунчилик маълумотлари миллий базаси»да 2023 йил 14 декабрда эълон қилинган.

Ўзбекистон республика товар-хом ашё биржаси билан биргаликда икки ҳафта муддатда пахта хом ашёсини биржа савдолари орқали сотиш тартибини ишлаб чиқиб, Вазирлар Маҳкамасига киритсин.

Қорақалпоғистон Республикаси Вазирлар Кенгаши ва вилоят ҳокимликлари Рақобатни ривожлантириш ва истеъмолчилар ҳуқуқларини ҳимоя қилиш қўмитаси, Қишлоқ хўжалиги вазирлиги ҳамда Ўзбекистон республика товар-хом ашё биржаси билан биргаликда бир ой муддатда барча етиштирувчилар учун биржада иштирок этиш тартиби юзасидан ўқув семинар ташкил этиш ҳамда уларни рўйхатдан ўтказиш бўйича амалий чораларни кўрсин.

4. Пахта ҳосилини сотиб олиш ва сотиш бўйича янги тизимнинг шаффофлигини, тўлақонли ва адолатли ишлаб кетишини ҳамда пахта хом ашёсини етиштирувчилар манфаатдорлигини таъминлаш бўйича республика штаби 1-иловага* мувофиқ таркибда ташкил этилсин.

Қўйдагилар Республика штабининг (Ж. Қўчқоров) асосий вазифалари этиб белгилансин:

пахта хом ашёсини етиштириш, сақлаш, реализация қилиш ва пахта хом ашёси етиштирилишини молиялаштириш устидан назорат механизмини такомиллаштириш бўйича таклифлар тайёрлаш;

пахта хом ашёси, пахта толаси ва иккиламчи маҳсулотлар (чигит, линт ва ўлик пахта)ни биржа савдоларига чиқариш ишларини ташкил этиш;

пахта хом ашёси, пахта толаси ва иккиламчи маҳсулотлар (чигит, линт ва ўлик пахта)ни биржа савдоларига чиқариш ҳамда тўловларнинг амалга оширилиши устидан кунлик назорат ўрнатиш;

пахта хом ашёси, пахта толаси ва иккиламчи маҳсулотлар (чигит, линт ва ўлик пахта)ни сотиб олиш ва сотиш бўйича янги тизимнинг шаффофлигини, тўлақонли ва адолатли ишлаб кетишини ҳамда пахта хом ашёсини етиштирувчилар манфаатдорлигини таъминлаш.

5. 2024 йил ҳосилидан бошлаб пахта хом ашёсини етиштириш, пахта йиғим-терими ва харидини Қишлоқ хўжалигини давлат томонидан қўллаб-қувватлаш жамғармасининг (кейинги ўринларда — Жамғарма) кредит ресурслари ҳисобидан молиялаштиришнинг қўйдаги тартиби жорий этилсин:

а) фьючерс шартномаси тузган етиштирувчи ва уруғчилик субъектларига ҳар йили 1 октябрдан бошлаб, пахта хом ашёси етиштириш учун — пахта хом ашёси қийматининг 60 фоизигача йиллик 10 фоизда (шундан, банк маржаси 2 фоиз) 14 ойга, шу жумладан 12 ойлик имтиёзли давр билан кредит ажратилади;

б) кластерларга:

пахта хом ашёси хариди бўйича якуний ҳисоб-китоб учун пахта хом ашёси қийматининг 80 фоизигача йиллик 10 фоизда (шундан, банк маржаси 2 фоиз) 10 ойга, шу жумладан 6 ойлик имтиёзли давр ва охириги 4 ой давомида тенг улушларда қайтариш шarti билан;

ижара ҳуқуқи мавжуд бўлган ер участкасида пахта хом ашёси етиштириш учун — пахта хом ашёси қийматининг 60 фоизигача йиллик 10 фоизда

* 1-илова «Қонунчилик маълумотлари миллий базаси»да эълон қилинган.

(шундан, банк маржаси 2 фоиз) 24 ойга, шу жумладан 18 ойлик имтиёзли давр ва охириги 6 ой давомида тенг улушларда қайтариш шарти билан;

ижара ҳуқуқи мавжуд бўлган ер участкасида етиштириладиган пахта хом ашёсининг йиғим-терими учун — пахта хом ашёси қийматининг 20 фоизига-ча йиллик 10 фоизда (шундан, банк маржаси 2 фоиз) 12 ойга, шу жумладан 3 ойлик имтиёзли давр ва охириги 9 ой давомида тенг улушларда қайтариш шарти билан кредит ажратилади;

в) фьючерс шартномасига асосан етиштирувчилардан қабул қилинган пахта хом ашёси учун тўловларнинг 80 фоизи пахта хом ашёси қабул қилиб олинган кундан бошлаб уч иш кунидан кечиктирмасдан, қолган қисми молия йилининг 31 декабрь кунига қадар амалга оширилади;

г) ажратилган кредит маблағлари ҳисобидан агротехник тадбирлар доирасида товарлар (ишлар, хизматлар), шу жумладан моддий ресурслар етказиб берувчилар ва хизмат кўрсатувчилар етиштирувчилар томонидан ихтиёрий танланади (бундан уруғлик чигит мустасно);

д) етиштирувчилар, кластерлар ва уруғчилик субъектлари кредит буюртмаларини Қишлоқ хўжалиги вазирлигининг «Агроплатформа» ахборот тизими орқали электрон шаклда тақдим этади.

6. Кластерларни ташкил этиш ва уларнинг фаолият юритиши учун қўйидаги талаблар ва янгиланган тартиб жорий этилсин:

а) талабгор:

тўқимачилик маҳсулотлари ишлаб чиқариш (ип калаваси, трикотаж мато, газлама, тайёр тикув-трикотаж маҳсулотлари ишлаб чиқариш, бўяш) қувватларининг камида иккита босқичини йўлга қўйган бўлиши;

Ўзбекистон Республикаси ҳудудида рўйхатдан ўтган ва фаолият юритаётган, тугатилиш босқичида бўлмаган, тўловга қобилиятсизлик тўғрисида иш қўзғатилмаган ва «ёмон» кредит тарихига эга бўлмаган ҳамда мурожаат санасида кредит (лизинг, банк кафолати, аккредитив) ва солиқлардан муддати ўтган қарздорлиги мавжуд бўлмаган бўлиши шарт;

б) кластерлар фаолияти қишлоқ хўжалиги вазири билан келишилган ҳолда Қорақалпоғистон Республикаси Вазирлар Кенгаши Раиси ва вилоят ҳокимларининг қарорлари билан ташкил этилади;

в) кластер фаолиятини ташкил этиш истагида бўлган талабгорлар очик ва шаффоф онлайн танлов асосида танлаб олинади;

г) Пахта-тўқимачилик кластерлари фаолиятини мувофиқлаштириш бўйича республика комиссияси тугатилади;

д) Қишлоқ хўжалиги вазирлиги ҳамда тегишлилигига кўра Қорақалпоғистон Республикаси Вазирлар Кенгаши ёки вилоят ҳокимликлари билан талабгор ўртасида кластер фаолиятини йўлга қўйиш тўғрисида уч томонлама битим тузилади;

е) Қишлоқ хўжалиги вазирлиги кластерлар реестрини юритади ва ушбу реестрни ўзининг расмий веб-сайтида доимий равишда эълон қилиб боради;

ж) 2024 йил ҳосили учун фьючерс шартномалари тузишда мазкур банднинг «а» кичик бандида назарда тутилган қоидалар, истисно тариқасида, амалда фаолият юритаётган кластерларга татбиқ этилмайди.

7. Қишлоқ хўжалиги вазирлиги:

бир ҳафта муддатда кластерлар реестрини шакллантириш ва юритиш тартибини тасдиқласин;

«Ўзбекистон пахта-тўқимачилик кластерлари» уюшмаси ва Ўзбекистон фермер, деҳқон хўжаликлари ва томорқа ер эгалари кенгаши билан биргаликда бир ой муддатда энг муҳим самарадорлик кўрсаткичлари бўйича кластерларнинг автоматлаштирилган рейтингини юритиш дастурини яратсин.

8. Белгилансинки:

кластерлар ва бошқа тўқимачилик корхоналари томонидан пахта хом ашёси тўлиқ электрон тарози орқали қабул қилинади ҳамда ишлаб чиқарилган пахта толасини автоматлашган мажбурий ҳисобга олиш тизими жорий қилинади;

пахта хом ашёси уни йиғиш, ташиш, қуритиш, сақлаш ва бирламчи қайта ишлашга қўйиладиган ёнғин хавфсизлиги талабларига жавоб берадиган ҳамда электрон тарози ва техник жиҳатдан малакалилиги маъқулланган синов лабораторияси билан жиҳозланган омборларда сақланиши шарт;

қишлоқ хўжалиги экинлари уруғлари, пахта, техник чигит ва қайта ишлашдан олинган маҳсулотларнинг мувофиқлигини баҳолаш органларида техник жиҳатдан тартибга солиш, стандартлаштириш, мувофиқликни баҳолаш ҳамда метрология соҳасидаги қонунчилик талабларига риоя этилиши юзасидан бир йилда бир марта Ўзбекистон техник жиҳатдан тартибга солиш агентлиги томонидан давлат назорати амалга оширилади.

9. Қишлоқ хўжалиги вазирлиги Рақамли технологиялар вазирлиги, Солиқ қўмитаси, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари билан биргаликда 2024 йил 1 майга қадар 2024 йил пахта ҳосилидан бошлаб электрон тарози орқали қабул қилинган пахта хом ашёси ва ишлаб чиқарилган пахта толасини автоматлашган мажбурий ҳисобга олиш тизимини жорий қилсин ва уни «Агроплатформа» ахборот тизимига интеграция қилсин.

Шундай тартиб ўрнатилсинки, унга кўра, кластерлар ва бошқа тўқимачилик корхоналари томонидан харид қилинган пахта хом ашёси ўзларининг белгиланган тартибда техник жиҳатдан малакалилиги маъқулланган лабораториясида ёки шу талабларга жавоб берадиган бошқа лабораторияларда таҳлил қилиниб қабул қилинади.

10. Қишлоқ хўжалиги вазирлиги Иқтисодиёт ва молия вазирлиги ҳамда «Ўзбекистон пахта-тўқимачилик кластерлари» уюшмаси билан биргаликда 2024 йил 1 январдан бошлаб:

кластерларда молиявий ҳисоботнинг халқаро стандартларини жорий қилиш;

кластерларга нуфузли халқаро аудиторлик ташкилотларини жалб қилган ҳолда улар фаолияти самарадорлиги ва молиявий кўрсаткичларини мустақил ташқи аудитдан ўтказиш чораларини кўрсин.

11. Фермер хўжаликларининг кластерлар олдидаги мавжуд қарздорликларини ундириш бўйича Ҳисоб палатаси бошчилигида Давлат молиявий назорати инспекцияси, Бош прокуратура, тижорат банклари, Қишлоқ хўжалиги вазирлиги, Ўзбекистон фермер, деҳқон хўжаликлари ва томорқа ер

эгалари кенгаши (бухгалтерия марказлари) вакилларида иборат ишчи гуруҳ тузилсин.

Ишчи гуруҳ (М. Абдуллаев):

кластерлардан қарздор бўлган фермер хўжаликлари ва кластерлар ўрта-сида тузиладиган солиштириш далолатномалари ҳамда суд қарорлари асосида ундирилган маблағлар кластерларнинг Қишлоқ хўжалигини давлат томонидан қўллаб-қувватлаш жамғармаси олдидаги қарздорлигини қоплашга йўналтирилишини таъминласин;

фермер хўжаликларига сув тежовчи технологияларни жорий этиш учун аввал ажратилган кредитлар таъминоти сифатида қабул қилинган кластерларнинг кафиллигини фермер хўжалиklarининг ликвидли мол-мулк гарови билан алмаштиришга кўмаклашсин.

12. Иқтисодиёт ва молия вазирлиги, Марказий банк, Қишлоқ хўжалиги вазирлиги «Агробанк» АТБ билан биргаликда бир ҳафта муддатда пахта хом ашёсини етиштиришни молиялаштириш учун фермер хўжаликларига кредит ажратиш тизими жорий этилаётганлиги муносабати билан пахта хом ашёсини етиштиришни молиялаштиришга «Агробанк» АТБ билан бир қаторда бошқа давлат улуши устун келадиган тижорат банкларини жалб қилиш юзасидан таклиф киритсин.

13. Иқтисодиёт ва молия вазирлиги оилавий тадбиркорликни ривожлантириш лойиҳаларини молиялаштириш учун «Агробанк» АТБга Ўзбекистон Республикаси республика бюджетидан ажратилган 745 миллиард сўм ҳамда Тикланиш ва тараққиёт жамғармаси томонидан ажратилган 1,9 триллион сўм, жами 2,6 триллион сўм маблағларни ушбу банкнинг устав капиталини оширишга йўналтирсин.

«Агробанк» АТБнинг қуйидаги таклифларига розилик берилсин:

оилавий тадбиркорликни ривожлантириш дастурлари доирасида ажратилган кредитлардан 2024 йилда қайтган маблағларни сувни тежайдиган суғориш технологияларини жорий этиш бўйича лойиҳаларни амалга оширишга йўналтириш;

ички ва ташқи манбалардан жалб қилинадиган маблағлар ҳисобидан қишлоқ хўжалиги маҳсулотлари ишлаб чиқарувчилар, хусусан фермер хўжаликлари ҳамда маҳсулотларни қайта ишлашга ихтисослаштирилган кластерлар томонидан амалга ошириладиган лойиҳаларни молиялаштиришни жадаллаштириш.

14. Шундай тартиб ўрнатилсинки, унга мувофиқ, кластерларга қабул қилиб олинган пахта ҳосили учун электрон ҳисобварақ-фактурада кўрсатилган қўшилган қиймат солиғи суммасини кластерлар томонидан қишлоқ хўжалиги корхоналарига (фермер хўжаликлари) пахта ҳосили учун тўланган тўловга мутаносиб миқдорда ҳисобга олишга руҳсат этилади.

Бунда, кластерларда қишлоқ хўжалиги корхоналари (фермер хўжаликлари) томонидан етиштирилган пахта хом ашёсини шартномада белгиланган нархларда сотиб олиш ва ўз маблағлари ҳисобидан амалга ошириладиган якуний ҳисоб-китобнинг 20 фоизини молия йилининг 31 декабрига қадар амалга ошириш мажбурияти сақлаб қолинади.

15. Рақобатни ривожлантириш ва истеъмолчилар ҳуқуқларини ҳимоя қилиш қўмитаси Иқтисодиёт ва молия вазирлиги билан биргаликда 2024 йил 1 январдан бошлаб, пахта хом ашёси етиштирувчиларни моддий ресурслар билан узлуксиз таъминлаш мақсадида, товар-хом ашё биржаларида 0,2 ва 0,5 тонналик кичик лотларда минерал ўғитлар, ёқилғи мойлаш материалларининг доимий савдоларга барча ҳудудлар бўйича қўйилишини таъминласин.

16. Савдо-саноат палатаси ва унинг ҳудудий бошқармалари, туман (шаҳар) бўлимлари фермер хўжаликлари ва тадбиркорлик субъектларининг минерал ўғит ва ёқилғи-мойлаш маҳсулотлари бўйича ўтказиладиган биржа савдоларида иштирок этишига қўмаклашсин.

17. Қишлоқ хўжалиги вазирлиги Иқтисодиёт ва молия вазирлиги ҳамда масъул идоралар вакиллари билан биргаликда 2024 йил 1 августга қадар пахта хом ашёсини тўлиқ ўз маблағлари, шу жумладан тижорат кредитлари ҳисобига етиштирган фермер хўжаликлари ва кластерларни молиявий қўллаб-қувватлаш тизимини яратиш бўйича хорижий давлатлар тажрибасини ушбу давлатларга бориб ўрганган ҳолда таклиф киритсин.

18. Ўзбекистон Миллий ахборот агентлиги ва Ўзбекистон Миллий телерадиокомпаниясига Иқтисодиёт ва молия вазирлиги, Қишлоқ хўжалиги вазирлиги, Рақобатни ривожлантириш ва истеъмолчилар ҳуқуқларини ҳимоя қилиш қўмитаси, Савдо-саноат палатаси ҳамда Ўзбекистон республика товар-хом ашё биржаси билан биргаликда қишлоқ хўжалигида эркин бозор муносабатларини янада ривожлантиришнинг қўшимча чора-тадбирлари бўйича маълумотларни кенг жамоатчиликка мунтазам равишда етказиш тавсия этилсин.

19. Қишлоқ хўжалиги вазирлиги Иқтисодиёт ва молия вазирлиги билан биргаликда уч ой муддатда қонунчилик ҳужжатларига мазкур Фармондан келиб чиқадиган ўзгартириш ва қўшимчалар тўғрисида Вазирлар Маҳкамасига таклифлар киритсин.

20. Ўзбекистон Республикаси Президентининг ва Ўзбекистон Республикаси Ҳукуматининг айрим ҳужжатларига 2-иловага* мувофиқ ўзгартириш ва қўшимчалар киритилсин.

21. Мазкур Фармоннинг ижросини самарали ташкил қилишга масъул ва шахсий жавобгар этиб Бош вазир ўринбосари — иқтисодиёт ва молия вазири Ж.А. Қўчқоров ҳамда қишлоқ хўжалиги вазири И.Ю. Абдурахмонов белгилансин.

Фармон ижросини назорат қилиш, масъул вазирлик ва идоралар фаолиятини мувофиқлаштириш Ўзбекистон Республикасининг Бош вазири А.Н. Арипов зиммасига юклансин.

Ўзбекистон Республикаси
Президенти

Ш. МИРЗИЁЕВ

Тошкент ш.,
2023 йил 12 декабрь,
ПФ–205-сон

* 2-илова «Қонунчилик маълумотлари миллий базаси»да эълон қилинган.

ЎЗБЕКИСТОН РЕСПУБЛИКАСИ ПРЕЗИДЕНТИНИНГ
ҚАРОРИ**500 Қашқадарё вилоятини 2024-2025 йилларда комплекс ижтимоий-иқтисодий ривожлантириш бўйича қўшимча чора-тадбирлар тўғрисида***

Қашқадарё вилоятининг мавжуд ижтимоий-иқтисодий, шу жумладан ишлаб чиқариш ва инвестиция салоҳиятидан самарали фойдаланиш, ҳудудда муҳандислик-коммуникация, ижтимоий ва ишлаб чиқариш инфратузилмаларини яхшилаш, иқтисодиёт тармоқларини барқарор ривожлантириш, шу асосда аҳоли бандлигини таъминлаш ва турмуш даражасини ошириш мақсадида:

1. Қуйидагилар Қашқадарё вилоятини 2024-2025 йилларда ижтимоий-иқтисодий ривожлантиришнинг асосий мақсадли кўрсаткичлари этиб белгилансин:

биринчидан, вилоятда 2024-2025 йилларда ялпи ҳудудий маҳсулот ҳажми тегишлича — 5,8 фоизга ва 6 фоизга, саноат маҳсулотлари ишлаб чиқариш ҳажми — 8 фоизга ва 8,5 фоизга, қишлоқ хўжалиги маҳсулотларини етиштириш ҳажми — 4,5 фоизга ва 5 фоизга, бозор хизматлари ҳажми — 14 фоизга ва 15 фоизга ўсишини таъминлаш;

иккинчидан, 2024 йилда 550 минг ва 2025 йилда 600 минг нафар аҳолининг бандлигини таъминлаш;

учинчидан, 2024 йилда республика бюджетидан 100 миллиард сўм ажратиш ҳисобига 90 километр, 2024 — 2026 йилларда халқаро молия институтлари ва хорижий давлатлар маблағлари, шу жумладан Хитой Халқ Республикасининг имтиёзли кредитлари ҳисобидан 316 километр, жами 406 километр каналларни бетонлаштириш. Шунингдек:

2024 — 2030 йилларда 11 минг километрдан зиёд тупроқ ўзанли хўжаликлараро ирригация тармоқларини тўлиқ бетонлаштириш ёки уларни лоток тизимлари ва ёпиқ қувурларга ўтказиш;

2024-2025 йилларда вилоятдаги суғориладиган ер майдонларини лазерли текислаш ва бунинг натижасида, қишлоқ хўжалиги маҳсулотлари етиштиришда унумдорликни 20 фоизга ошириш;

тўртинчидан, 2024 йилда ҳудудларни ижтимоий-иқтисодий ривожлантириш учун назарда тутилган маблағлар ҳисобидан 220 миллиард сўм ажратиш ҳамда 2024 — 2026 йилларда халқаро молия ташкилотларидан 122,5 миллион АҚШ долларини жалб қилиш ҳисобига жами 364 километр, шундан 189 километр умумий фойдаланишдаги ва 175 километр ички автомобиль йўлларини таъмирлаш;

бешинчидан, 2024 йилда республика бюджетидан 52 миллиард сўм ажратиш ҳамда халқаро молия ташкилотларидан 31 миллион АҚШ долларини жалб қилиш ҳисобига жами 321 километр ичимлик сув тармоқлари ва

* Ушбу қарор «Қонунчилик маълумотлари миллий базаси»да 2023 йил 15 декабрда эълон қилинган.

18 та сув иншоотини қуриш орқали ичимлик сув таъминоти қамровини 73,6 фоизга етказиш;

олтинчидан, 2024 йилни Қашқадарё вилоятида «Мактаб таълими ва тиббиёт йили» деб эълон қилиш ҳамда бу борада зарур чора-тадбирларни амалга ошириш.

Бунда, 2024 йилда Ўзбекистон Республикасининг ижтимоий ва ишлаб чиқариш инфратузилмасини ривожлантириш дастури доирасида 390 миллиард сўм ажратиш ҳисобига 64 та умумтаълим мактабида қурилиш, реконструкция қилиш, мукаммал таъмирлаш ва жиҳозлаш ишларини амалга ошириш;

еттинчидан, туризм йўналишида режалаштирилаётган лойиҳаларни молиялаштириш учун вилоятга 500 миллион АҚШ доллари миқдоридagi инвестиция маблағларини жалб қилиш ҳисобига 4 миллион нафар маҳаллий ҳамда 500 минг нафар хорижий турист ташрифини ташкил қилиш.

Бунда, 2024 йилда Тикланиш ва тараққиёт жамғармаси ҳисобидан 50 миллион АҚШ доллари ҳамда 2024-2025 йилларда жами 500 миллион АҚШ доллари эквивалентида марказлашган ва хорижий инвестицияларни жалб қилиш.

2. Қуйидагилар:

Қашқадарё вилоятида 2024-2025 йилларда аҳоли бандлигини таъминлашнинг режа кўрсаткичлари 1-иловага* мувофиқ;

Қашқадарё вилоятидаги норуда фойдали қазилма конлари жойлашган ер майдонларига бўлган ҳуқуқларни аукцион савдоларига чиқариш графиги 2-иловага* мувофиқ;

2024-2025 йилларда Қашқадарё вилоятидаги суғориладиган ер майдонларини лазерли текислашнинг режа кўрсаткичлари 3-иловага* мувофиқ;

Қашқадарё вилоятини 2024-2025 йилларда комплекс ижтимоий-иқтисодий ривожлантириш бўйича ишларни ташкил этиш ва мувофиқлаштириш юзасидан республика ишчи гуруҳи таркиби 4-иловага* мувофиқ;

Қашқадарё вилоятининг туманларига (шаҳарларига) бириктирилган вазирлик, идора ва тижорат банклари раҳбар ходимлари рўйхати 5-иловага* мувофиқ тасдиқлансин.

3. Иқтисодиёт ва молия вазирлиги ҳамда Қашқадарё вилояти ҳокимлигининг Инвестициялар, саноат ва савдо вазирлигининг ҳудудий тузилмалари штат бирликларини мақбуллаштириш ҳисобига Қашқадарё вилояти ҳокимлиги ҳузурида 10 та штат бирлигидан иборат Саноатни ривожлантириш лойиҳа офисини (кейинги ўринларда — Лойиҳа офиси) ташкил этиш тўғрисидаги таклифи маъқуллансин.

Лойиҳа офисига қуйидаги асосий вазифалар юклансин:

саноат соҳасида фойдаланилмаётган захираларни аниқлаш ва уларни сафарбар этишни назарда тутувчи Саноатнинг жадал ривожланиши концепциясини ишлаб чиқиш ҳамда вилоятнинг ҳар бир туманини (шаҳарини) ўзаро узвий ҳолда ривожлантириш орқали вилоятни республикада саноати ривожланган ҳудудга айлантириш;

* 1 — 5-иловалар «Қонунчилик маълумотлари миллий базаси»да эълон қилинган.

замонавий конструкторлик ва тажриба бюрларига эга бўлган «Илдам ривожланувчи инновацион саноат зоналари»ни барпо этиш ҳамда инновацион ва юқори технологияли саноат маҳсулотлари ишлаб чиқаришни йўлга қўйиш.

Қашқадарё вилояти ҳокимлиги мазкур тадбирларни амалга ошириш учун бир ой муддатда зарур тажрибага эга бўлган нуфузли халқаро консалтинг компаниясини жалб қилсин.

Бунда, халқаро консалтинг компаниясига «Илдам ривожланувчи инновацион саноат зонаси»ни ташкил этиш концепциясини ёки мастер-режасини инвесторларни жалб қилган ҳолда ишлаб чиқиш вазифаси юклансин.

Бош вазир ўринбосари Ж. Қўчқоров ушбу мақсадлар учун республика бюджетидан 10 миллиард сўм маблағ ажратилишини таъминласин.

4. Лойиҳа офиси Иқтисодиёт ва молия вазирлиги, халқаро консалтинг компанияси билан биргаликда:

биринчи босқичда, хомашё ва меҳнат ресурслари, атрофдаги ҳудудларда жойлашган йирик саноат корхоналари ва саноат зоналари билан кооперация алоқаларини ривожлантириш имкониятлари ҳамда бошқа омиллардан келиб чиқиб, белгиланган ҳудудлар доирасида ишлаб чиқариш корхоналарининг мақбул жойлашувини белгилаш бўйича таклифларни ишлаб чиқсин;

«яшил», инновацион ва рақамли технологияларга ҳамда юқори қўшилган қиймат яратишга асосланган товарларнинг истиқболдаги бозор конъюнктураси асосида ишлаб чиқариш йўналишлари ва маҳсулот турлари бўйича таклифларни шакллантирсин;

иккинчи босқичда, Олий таълим, фан ва инновациялар вазирлиги ҳамда Инвестициялар, саноат ва савдо вазирлигини жалб қилган ҳолда ҳудудларнинг ривожланишига туртки берувчи, илғор илмий ишланмалар ва инновацион технологияларга асосланган юқори қўшилган қиймат яратувчи салоҳиятли инвестиция лойиҳа таклифлари рўйхатини шакллантирсин;

инвестиция лойиҳаларининг мақбул жойлашувини таъминлашни инобатга олган ҳолда ер майдонларини алоҳида ва йирик лотларга ажратиш орқали мулк ва ижара ҳуқуқи асосида очиқ аукцион савдоларига чиқариш бўйича таклифлар тайёрласин;

инвесторлар орасида қизиқишни кучайтириш мақсадида ҳар бир ҳудудга таниқли хорижий компанияларни (брендларни) жалб қилиш чораларини кўриш бўйича таклифлар ишлаб чиқсин;

якуний босқичда келгуси 5 йилда вилоятда саноат маҳсулотлари ишлаб чиқариш ҳажмини камида 2 баробарга ошириш, 2024-2025 йилларда камида 400 миллион АҚШ доллари миқдоридagi 30 та йирик (асосий фармацевтика маҳсулотлари, электротехника маҳсулотлари) ва катта (кимё маҳсулотлари, электр ускуналари) бизнес лойиҳаларини амалга ошириш ҳамда экспорт салоҳиятини 3-4 баробарга оширишнинг иқтисодий асосларини тайёрлаган ҳолда мазкур тадбирларни амалга оширишни назарда тутувчи Ҳукумат қарори лойиҳасини ишлаб чиқиб, Вазирлар Маҳкамасига киритсин.

Бунда, вилоят саноати, инвестиция ва экспорт салоҳиятини ривожлантиришга қаратилган тадбирлар учта босқичда, хусусан биринчи босқич олти ой

муддатгача, иккинчи босқич бир йилгача ҳамда якуний босқич икки йилгача бўлган даврда амалга оширилади.

5. Сув хўжалиги вазирлиги Инвестициялар, саноат ва савдо вазирлиги, Иқтисодиёт ва молия вазирлиги билан биргаликда уч ой муддатда Қашқадарё вилоятидаги сув хўжалиги ташкилотлари ҳисобидаги 406 километр суғориш тармоқларини манзилли дастур асосида босқичма-босқич бетонлаштириш ишларини назарда тутувчи тегишли қарор лойиҳасини Вазирлар Маҳкамасига киритсин.

Бунда, суғориш тармоқларини бетонлаштириш ишларининг молиялаштириш манбаи этиб, 2024 йил учун Ўзбекистон Республикасининг ижтимоий ва ишлаб чиқариш инфратузилмасини ривожлантириш дастури доирасидаги маблағлар ҳамда Хитой Халқ Республикасининг имтиёзли кредит маблағлари белгиланиши назарда тутилсин.

6. Сув хўжалиги вазирлиги, Қашқадарё вилояти ҳокимлиги, Иқтисодиёт ва молия вазирлиги уч ой муддатда Қамаш ва Ғузур туманларидаги 25 минг гектар суғориладиган ер майдонларининг сув таъминотини яхшилаш мақсадида «Пахтаобод» каналини модернизация қилишга Жаҳон банкдан зарур маблағларни жалб қилиш бўйича тегишли музокаралар ва тadbирларни амалга оширсин.

7. Қишлоқ хўжалиги вазирлиги Ўсимликлар карантини ва ҳимояси агентлиги, Қашқадарё вилояти ҳокимлиги, Ўзбекистон фермер, деҳқон хўжаликлари ва томорқа ер эгалари кенгаши билан биргаликда қишлоқ хўжалиги ерларида тупроқнинг озуқа моддалари билан таъминланганлик даражасини аниқлаш мақсадида 2024 йилда қўшимча равишда 10 та мобиль лаборатория фаолиятини ташкил қилган ҳолда 150 минг гектарда тупроқнинг агрохимёвий таҳлили харитасини ишлаб чиқиб, унинг ердан фойдаланувчиларга етказиб берилишини таъминласин.

8. Бош вазир ўринбосарлари Ж. Қўчқоров, А. Раматов ва Ж. Ходжаев Қашқадарё вилояти ҳокимлиги, Иқтисодиёт ва молия вазирлиги, масъул вазирлик ва идоралар билан биргаликда икки ҳафта муддатда мазкур қарорнинг 1-бандидаги асосий мақсадли кўрсаткичларга эришишни таъминлаш мақсадида Қашқадарё вилоятини 2024-2025 йилларда комплекс ижтимоий-иқтисодий ривожлантириш дастурини тасдиқлаш бўйича Ҳукумат қарори лойиҳасини ишлаб чиқиб, белгиланган тартибда Вазирлар Маҳкамасига киритсин.

Бунда, белгиланадиган ҳар бир чора-тадбир бўйича масъул ижрочилар, амалга ошириш механизми ва муддатлари аниқ кўрсатиб ўтилсин.

9. Мазкур қарорга 5-иловадаги вазирлик, идора ва тижорат банклари раҳбар ходимларининг асосий вазифалари этиб қўйидагилар белгилансин:

худудни ижтимоий-иқтисодий ривожлантириш ҳамда экспорт салоҳиятини ошириш, мавжуд захира ва имкониятлардан самарали фойдаланган ҳолда аҳолининг доимий даромадли меҳнат билан бандлигини таъминлаш, янги иш ўринларини ташкил этиш;

худудни комплекс ривожлантириш мақсадида қабул қилинган фармон, қарор ва топшириқлар ижросининг ўз вақтида ва сифатли таъминланишини ташкиллаштириш;

белгиланган вазифаларни амалга ошириш жараёнида вужудга келган муаммо ва камчиликларни бартараф этиш юзасидан масъул вазирлик ва идоралар билан бирга зарур чораларни кўриб бориш.

10. Белгилансинки:

а) мазкур қарор ижроси:

ҳар олти ойда бир марта Ўзбекистон Республикаси Бош вазири А. Арипов томонидан Вазирлар Маҳкамаси Раёсатида;

ҳар чоракда бир марта Республика ишчи гуруҳи (Ж. Қўчқоров) ва Қашқадарё вилояти ҳокимлиги томонидан халқ депутатлари Қашқадарё вилояти Кенгаши йиғилишида;

ҳар ойда камида бир марта туманларга (шаҳарларга) бириктирилган масъуллар томонидан халқ депутатлари туман (шаҳар) Кенгашлари йиғилишида мутасадди вазирликлар, идоралар, хўжалик бирлашмалари ва маҳаллий ижро этувчи ҳокимият органлари иштирокида танқидий муҳокама қилинади;

б) Республика ишчи гуруҳи (Ж. Қўчқоров) ва Қашқадарё вилояти ҳокимлиги ҳар чорак якуни билан Ўзбекистон Республикаси Президентига мазкур қарор ижроси юзасидан ахборот киритиб боради.

11. Олий Мажлис Сенатига халқ депутатлари Қашқадарё вилояти, туман (шаҳар) Кенгашлари билан биргаликда мазкур қарор ижросини назорат қилиб бориш тавсия этилсин.

12. Мазкур қарорнинг ижросини самарали ташкил қилишга масъул ва шахсий жавобгар этиб Қашқадарё вилояти ҳокими М.Б. Азимов ва унинг ўринбосарлари белгилансин.

Қарор ижросини муҳокама қилиб бориш, масъул ташкилотлар фаолиятини мувофиқлаштириш ва назорат қилиш Ўзбекистон Республикасининг Бош вазири А.Н. Арипов зиммасига юклансин.

Ўзбекистон Республикаси
Президенти

Ш. МИРЗИЁЕВ

Тошкент ш.,
2023 йил 14 декабрь,
ПҚ–389-сон

ЎЗБЕКИСТОН РЕСПУБЛИКАСИ ПРЕЗИДЕНТИНИНГ
ҚАРОРИ**501** Пахтачиликда уруғчилик тизимини ривожлантириш
ҳамда пахта ҳосилдорлигини оширишнинг қўшимча чо-
ра-тадбирлари тўғрисида*

Пахтачиликда замонавий самарадор агротехнологияларни қўллаш ва уруғчилик тизимига эркин бозор механизмларини жорий этиш орқали ҳосилдорликни кескин ошириш, пахта хомашёсини етиштиришда илмий-инновацион ёндашувларни қўллашни кенгайтириш мақсадида:

1. Белгилансинки, 2024 йил 1 январдан бошлаб Ўсимликлар карантини ва ҳимояси агентлиги ҳамда Ўзбекистон Республикаси Президенти ҳузуридаги Пахтачилик кенгаши (кейинги ўринларда — Пахтачилик кенгаши) мутахассислари назорати остида тажриба-синов тариқасида юқори ҳосилдор хорижий ғўза навлари ва дурагайларини олиб кириш ҳамда пахта-тўқимачилик кластерлари ва фермер хўжаликлари тасарруфидаги пахта экиладиган майдонларнинг 10 фоизигача жойлаштиришга, истисно тариқасида, рухсат берилади. Бунда:

а) қўйдагилар талаб этилади:

карантин рухсатномаси, экспорт қилувчи мамлакатнинг ўсимликлар карантини ва уларни ҳимоя қилиш бўйича давлат органлари томонидан бериладиган фитосанитария сертификати ёки гувоҳномаси мавжудлиги;

хориждан келтириладиган ғўза навлари ва дурагайларидан пахта ҳосили етиштиришда ҳамда уларнинг уруғларини кўпайтиришда импорт қилувчи томонидан интеллектуал мулкка даъво қилмаслик;

хорижий ғўза навлари ва дурагайларини олиб келишда нав оригинаторлари (патент эгаси) билан лицензия шартномаси тузиш талаб қилинса, лицензия харажатларини импорт қилувчи корхона томонидан қоплаш;

келгуси йилларда экиш учун хорижий ғўза навлари ва дурагайларини маҳаллий шароитда етиштиришни ташкил этиш;

навларнинг биологик ва механик ифлосланишининг олдини олиш мақсадида ғўза навлари экилаётган ҳудудларда нав жойлаштириш тартибига қатъий амал қилиш;

б) хориждан келтирилган ғўза навлари ва дурагайларини парваришlashда ҳар бир навга хос бўлган юқори самарадор агротехнологияларни қўллаш Пахтачилик кенгаши, Қишлоқ хўжалиги вазирлиги, Ўсимликлар карантини ва ҳимояси агентлиги ҳамда тегишли илмий ташкилотлар кузатувида амалга оширилади;

в) пахта-тўқимачилик кластерлари ва фермер хўжаликлари томонидан ғўза навларини жойлаштиришда кафолатланган уруғ таъминотига мувофиқ эркинлик берилади, бунда юқори ҳосилдор маҳаллий навларга устуворлик берилади. Бир контурда узлуксиз 2 йил давомида бир навни жойлаштиришга рухсат берилмайди. Ҳудудларда ҳар 2 йилда экилаётган навни тўла алмашти-

* Ушбу қарор «Қонунчилик маълумотлари миллий базаси»да 2023 йил 18 декабрда эълон қилинган.

риш, ҳар йили тегишли нав уруғини бошқа ҳудудлардан олиб келиш орқали уруғ алмаштириш ва йиллик қўшимча уруғ захирасини яратиш билан келгусида босқичма-босқич «тиндирилган уруғ» экиш амалиёти жорий қилинади.

2. Қуйидагилар:

Ўзбекистон Республикасига хориждан олиб кириладиган ўрта толали ғўза навлари ва дурагайларига қўйиладиган талаблар 1-иловага* мувофиқ;

2024 — 2026 йилларда пахта-тўқимачилик кластерлари ва фермер хўжаликлари томонидан пахта ҳосилдорлиги гектарига 30 центнердан ошмайдиган ҳудудларда хориждан импорт қилинадиган ёки юқори ҳосилдор янги маҳаллий ғўза навлари синовлари ўтказиладиган ҳамда янги илмий ишланма ва самарадор агротехнологиялар жорий қилинадиган ҳудудлар рўйхати 2-иловага* мувофиқ тасдиқлансин.

Белгилансинки, пахта-тўқимачилик кластерлари ва фермер хўжаликлари томонидан олиб келинган ғўза уруғларини келгусида бошқа ҳудудларга экиш ва улар экиладиган майдонларни кенгайтириш ҳосилдорлик кўрсаткичларига ва ғўза уруғларининг тупроқ-иқлим шароитларига мос тушганлигига кўра Пахтачилик кенгашининг ҳулосасига асосан амалга оширилиши мумкин.

3. Юқори самарадор хорижий ғўза навларини ҳудудларда етиштиришни давлат томонидан қўллаб-қувватлаш мақсадида қуйидагиларга қўшимча ва-зифалар юклатилсин:

Ўсимликлар карантини ва ҳимояси агентлигига — мазкур қарорнинг талабларига мувофиқ хорижий ғўза навларини олиб киришга, истисно тариқасида, карантин рухсатномасини расмийлаштириш, шунингдек, импорт қилинган ғўза навлари экилган майдонларда зараркунанда ва касалликларга қарши дала назорати мониторингини юритиш, аниқланган зараркунанда ва касалликларнинг ўз вақтида бартараф этилишида пахта-тўқимачилик кластерлари, фермер хўжаликлари ва бошқа уруғчилик субъектларига тезкор амалий ёрдам кўрсатиш;

Агросаноат мажмуи устидан назорат қилиш инспекциясига — пахта-тўқимачилик кластерлари ва фермер хўжаликлари томонидан хорижий ғўза навлари ва дурагайларини етиштиришда уларнинг апробациясини тўғри ва ўз муддатида ўтказиш, уруғликларни тайёрлаш, қайта ишлаш ҳамда сақлашнинг халқаро стандартлар ва техник регламентларга мувофиқлигини таъминлаш;

Қишлоқ хўжалиги экинлари навларини синаш марказига — пахта-тўқимачилик кластерлари ва фермер хўжаликлари томонидан хорижий ғўза навлари ва дурагайларини ўсиш даври, ҳосилдорлиги, касаллик ва зараркунандаларга, турли тупроқ-иқлим шароитларига чидамлилиги ҳамда маҳсулот сифати ва бошқа белгилари асосида келгуси йилларда Ўзбекистон Республикаси ҳудудида экишга тавсия этилган қишлоқ хўжалиги экинлари навлари реестрига киритиб бориш;

Тупроқшунослик ва агрохимёвий тадқиқотлар институти, «Тупроқ таркиби ва репозиторийси, сифати таҳлил маркази» давлат унитар корхонаси, Ўсимликлар карантини ва ҳимояси агентлиги ҳузуридаги Республика агроки-

* 1-2-иловалар «Қонунчилик маълумотлари миллий базаси»да эълон қилинган.

мёвий таҳлил марказига — республиканинг балл бонитети паст, сув таъминоти оғир бўлган ва пахта ҳосилдорлиги гектарига 30 центнердан ошмайди-ган ҳудудларида тупроқ унумдорлигини оширишга қаратилган «контурбай» амалий механизмларни жорий этиш;

Уруғчиликни ривожлантириш марказига — хориждан келтирилган ғўза навларининг уруғчилиги билан шуғулланувчи субъектларда вегетация даврида пахта майдонларида камида уч марта, уруғликларни сақлаш ва қайта ишлаш жараёнларида доимий мониторинг юритиш, уларга яқиндан амалий ёрдам кўрсатиш, ғўза навларининг бир майдонда узлуксиз 2 йилдан ортиқ экилишининг олдини олиш мақсадида ҳудудлар учун муқобил янги навлар уруғчилигини ташкил қилиш, ҳудудлар ўртасида муқобил навлар уруғларини қайта тақсимлаб бориш ҳамда йиллик «тиндирилган уруғлик» захирасини яратиш;

Пахтачилик кенгашига — хориждан олиб кириладиган ғўза навлари ва дурагайлари келгусида экиш майдонини кенгайтириш бўйича хулоса (кўрсатма) ишлаб чиқиш.

4. Шундай тартиб ўрнатилсинки, унга кўра 2024 йилдан бошлаб:

пахта-тўқимачилик кластерлари ва фермер хўжаликлари томонидан хориждан келтирилган ғўза уруғларининг генетик тозалигини молекуляр-генетик таҳлил қилиш бўйича маҳаллий ваколатли лабораториялар хулосаси олинади ҳамда барча импорт қилинадиган ғўза уруғларининг экинбоплик сифат кўрсаткичлари баҳоланади;

пахта-тўқимачилик кластерлари ва фермер хўжаликлари томонидан хориждан олиб келинган ғўза навлари ва дурагайлари икки йиллик етиштириш натижаларига кўра мазкур қарорга 1-иловада кўрсатилган талабларга мос келган ҳолларда Ўзбекистон Республикаси ҳудудида экиш учун тавсия қилинган қишлоқ хўжалиги экинларининг давлат реестрига киритилади.

5. Республикада ғўзанинг серҳосил ва саноатбоп янги навларини яратишни жадаллаштириш ва қўллаб-қувватлаш мақсадида:

а) маҳаллий нав оригинаторлари ва муаллифларини рағбатлантириш бўйича:

белгиланган навни янгилаш схемаларини ҳамда уруғлик чигитни кўпайтириш коэффициенти ҳисобга олган ҳолда сифатли ва рақобатбардош уруғликларни етиштириш мақсадида маҳаллий нав оригинаторлари ва уруғчилик субъектлари (кластерлар, кооперативлар, фермер хўжаликлари ва бошқалар) ўртасида тўғридан-тўғри келишувлар асосида лицензия шартномасини тузиш орқали элита ва юқори авлодли уруғликларни етиштириш, ўз эҳтиёжлари учун фойдаланиш, ички ва ташқи бозорда сотиш йўлга қўйилади;

ғўза навлари ва дурагайлари уруғликларини белгиланган талабларга мувофиқ етиштириш, кўпайтириш, Ўзбекистон Республикаси ҳудудида фойдаланиш ва реализация қилиш лицензия шартномаси асосида патент эгасининг рухсати билан амалга оширилади;

патент эгаси — лицензиар (шу жумладан, хорижий компания) билан келишилган ҳолда патентдан келиб чиқадиган барча ҳуқуқларни патент эгасининг хоҳишига кўра манфаатдор шахсларга бирон-бир шарт ва (ёки) че-

кловлар қўйган ҳолда, шунингдек, селекция ютуғидан лицензия шартномаси доирасида фойдаланиш ҳуқуқини лицензиатларга беришга рухсат этилади;

уруғлик пахта хомашёсини етиштирувчилар (пахта-тўқимачилик кластерлари, фермер хўжаликлари, кооперациялар)га маҳаллий олимлар томонидан яратилган районлаштирилган, истиқболли ва янги ғўза навларини оригинаторлар билан тузиладиган лицензия шартномаси асосида жойлаштириш ҳуқуқи берилади, бунда уруғликлар учун тўланадиган устама маблағлар мазкур субъектлар ўртасида ўзаро келишув асосида, бироқ 3 — 12 фоиз роялти тўловларидан кам бўлмаган миқдорда белгиланади;

маҳаллий истиқболли ғўза навларини такомиллаштириш, республика ҳудудида кенг районлаштириш, унинг сифатли элита уруғчилигини йўлга қўйиш ва навни тижоратлаштиришда нав оригинаторлари билан ҳамкорлик ўрнатган пахта етиштирувчи субъектларга тегишли навга 20 фоизли улушларда ҳаммуаллифлик қилишга рухсат берилади;

б) ғўза уруғчилигида эркин рақобат муҳитини шакллантириш ва бозор муносабатларини ривожлантириш бўйича:

пахта хомашёси етиштирувчиларни сифатли уруғлик билан таъминлаш мақсадида сертификатланган уруғлик тайёрлаш вазифаси босқичма-босқич пахта-тўқимачилик кластерлари ва хусусий уруғчилик корхоналарига ўтказилади;

2024 йил ҳосили учун уруғлик чигитни Пахтачилик кенгашининг ҳулосасига асосан қўшимча тарзда хусусий уруғчилик корхоналари томонидан етказиб бериш амалиёти жорий этилади;

қонунчиликда белгиланган тартибда халқаро стандартларга мувофиқ аккредитациядан ўтиш шarti билан хусусий сертификация идораларини ташкил этишга рухсат этилади.

Қишлоқ хўжалиги вазирлиги уч ой муддатда мазкур бандда назарда тутилган вазифаларни амалга ошириш механизмларини белгилаш ҳамда илғор хорижий мамлакатлар тажрибаси асосида Уруғчиликни ривожлантириш марказини трансформация қилишга оид тегишли қарор лойиҳасини ишлаб чиқиб, Вазирлар Маҳкамасига киритсин.

6. Қишлоқ хўжалиги вазирлиги (И. Абдурахмонов):

а) Пахтачилик кенгаши, Қорақалпоғистон Республикаси Вазирлар Кенгаши ва вилоятлар ҳокимликлари билан биргаликда:

бир ой муддатда ҳудудларнинг тупроқ-иқлим шароитларига мос, эртапишар ва ҳосилдорлиги юқори ғўза навлари уруғларини етиштириш ва таъминотини ташкил қилиш ҳамда нав алмаштириш, уруғ алмаштириш ва «гиндирилган уруғ» экиш тизими бўйича 2024 — 2026 йилларда амалга ошириладиган чора-тадбирлар дастурини тасдиқласин;

ҳосилдорлиги 30 центнердан паст бўлган пахта майдонларини мунтазам аниқласин ҳамда босқичма-босқич янги ва истиқболли навларни жойлаштириш, замонавий агротехнологияларни қўллашни жорий қилсин; ҳосилдорлиги 30 центнердан паст бўлган пахта майдонларини мунтазам аниқласин ҳамда босқичма-босқич янги ва истиқболли навларни жойлаштириш, замонавий агротехнологияларни қўллашни жорий қилсин;

бир ой муддатда пахта-тўқимачилик кластерлари ва хорижий уруғчилик компаниялари таклифларини ўрганган ҳолда ҳудудларнинг тупроқ-иқлим шароитига мос ғўза навлари ва дурагайларини мазкур қарорнинг 1-иловасидаги талаблар асосида олиб келиш бўйича таклифлар ишлаб чиқсин;

икки ой муддатда янги ва истиқболли навларнинг уруғларини дастлабки кўпайтирувчи элита хўжаликларининг фаолиятини амалга ошириш механизмини ва районлашган навларнинг бирламчи уруғлигини ташкил этишнинг янги тартибини тасдиқласин;

2024 йил пахта ҳосилидан ҳар бир ҳудудда камида 500 гектар майдонда юқори агротехнологияларга асосланган тажриба майдонларини ташкил қилиб, пахта етиштирувчи субъектлар учун амалий дала семинарларини ўтказиб борсин;

б) республикада маҳаллий ва хорижий селекцияга мансуб нав ва дурагайлардан етиштирилаётган пахта толаси сифатини мунтазам солиштириб бориш учун аккредитациядан ўтган синов лабораторияларида сифат кўрсаткичлари бўйича баҳолаш (HVI) натижаларига асосан ягона маълумотлар базасини яратсин;

в) икки ой муддатда хориждан келтирилган ғўза уруғликларининг генетик тозалиги бўйича молекуляр-генетик таҳлиллар ўтказиш юзасидан маҳаллий ваколатли лаборатория хулосасини олиш тартибини тасдиқласин;

г) «Пахтасаноат илмий маркази» АЖ билан биргаликда уруғлик пахта хомашёсини жамғариш, белгиланган стандарт талаблари бўйича сақлаш ва дастлабки қайта ишлашгача бўлган жараённинг тўғри бажарилиши бўйича тегишли норматив-ҳуқуқий ҳужжатни ҳамда уруғлик чигит тайёрловчи корхоналарда уруғлик пахтани қайта ишлашда ускуналарни белгиланган меъёрлар асосида сошлаш тартибини ишлаб чиқиб, тасдиқласин;

д) 2024 йил пахта етиштириш мавсуми охирига қадар Қишлоқ хўжалиги вазирлигининг «Рақамли қишлоқ хўжалиги» ягона интеграцион платформаси таркибида «е-уруғ» платформасини ишга туширсин.

Бунда, маҳаллий ва хорижий уруғчилик корхоналари ҳамда бирламчи уруғчилик хўжаликларининг ўзаро интеграциялашуви, ғўза навлари ва дурагайларининг уруғ таъминоти ва захираси, ҳудудларга мослашганлиги ва муқобил нав таклифлари, мавжуд ғўза навлари ва дурагайлари ҳосилдорлиги, уларни етиштириш агротехнологиялари тўғрисида ахборот олиш, ҳудудлар шароитларидан келиб чиқиб эркин ва шаффоф жойлаштириш, қайта тақсимлаш ҳамда сертификат олиш имкониятлари яратилади.

7. Қишлоқ хўжалиги вазирлиги икки ой муддатда Хитой, Ҳиндистон, Туркия, Испания, Австралия ва Америка Қўшма Штатлари тажрибасини ўрганган ҳолда ҳамда мазкур қарор талабларидан келиб чиқиб, Ўзбекистон Республикасининг «Уруғчилик тўғрисида»ги Қонунига, шунингдек, қонунчиликка тегишли ўзгартириш ва қўшимчалар киритиш бўйича Вазирлар Маҳкамасига таклиф киритсин.

8. Қорақалпоғистон Республикаси Вазирлар Кенгаши Раиси ва вилоятлар ҳокимлари бир ой муддатда:

мазкур қарор талаблари асосида 2024 йилда ўз ҳудудидаги пахта экила-

диган майдонларнинг 10 фоизига экиладиган хорижий ғўза навлари бўйича Қишлоқ хўжалиги вазирлигига таклиф киритсин;

хусусий уруғчилик корхоналарини жалб қилиш, хорижий навлар экиладиган майдонларни тўлиқ назоратга олиш, ҳудудларда ғўза уруғчилигига оид янги тизим самарадорлигини оширишнинг мутахассис-кадрлар, инфратузилмавий ва ташкилий таъминотини таъминлаш бўйича чора-тадбирлар дастурини тасдиқласин ва ижрога қаратсин;

янги тизим асосида мазкур қарорга 1-иловада кўрсатилган талабларга мувофиқ ҳар бир ҳудуднинг тупроқ-иқлим шароитларига мос ғўза навлари бўйича бирламчи уруғчиликни ташкил этиш ва жойлаштириш чораларини кўрсин.

9. Ташқи ишлар вазирлиги Ўзбекистон Республикасининг Хитой (Ф. Арзиев), Ҳиндистон (С. Рустамбаев), Туркия (А. Агзамходжаев), Испания (Ф. Турсунов), Австралия (Қ. Шакиров) ва Америка Қўшма Штатлари (Ф. Сидиков) даги дипломатик ваколатхоналари билан биргаликда доимий равишда:

пахтачилик ва ғўза уруғчилигига оид энг илғор тажриба ва муҳим натижаларни доимий таҳлил қилиб бориш, юқори ҳосилдор ғўза навлари ва дурагайларини республикамизга олиб келиш, соҳага оид инновацион технологияларни трансфер қилиш бўйича Қишлоқ хўжалиги вазирлиги, Пахтачилик кенгаши ва пахта-тўқимачилик кластерларига кўмаклашсин;

ғўза уруғчилиги бўйича хорижий компанияларни жалб қилиш юзасидан ташкилий чора-тадбирларни амалга оширсин.

10. Олий таълим, фан ва инновациялар вазирлиги Пахтачилик кенгашининг илмий хулосасига асосан мазкур қарорга 2-иловада кўрсатилган 14 та туманда пахтачиликка оид янги илмий ишланмалар ва инновацион технологияларни жорий этиш, шунингдек, 2024 — 2027 йилларда анъанавий ва ноанъанавий селекция усуллари орқали юқори ҳосилдор, тезпишар, тола сифати юқори, касаллик ва ҳашаротларга чидамли биотехнологик навларни яратиш ҳамда замонавий агротехнологияларни ишлаб чиқиш ва инновацион лойиҳаларни мақсадли молиялаштириш чораларини кўрсин.

11. Қишлоқ хўжалиги вазирлиги ҳамда Давлат активларини бошқариш агентлигининг Пахтачилик кенгашининг илмий-тадқиқот органи бўлган «Пахтасаноат илмий маркази» АЖ негизида Қишлоқ хўжалигида билим ва инновациялар миллий маркази ҳузуридаги Толали экинлар илмий-тадқиқот институтини ташкил этиш тўғрисидаги таклифи маъқуллансин. Бунда, «Пахтасаноат илмий маркази» АЖга тегишли бино ва иншоотлар ҳамда мол-мулклар қонунчиликда белгиланган тартибда мазкур институтга ўтказилади.

Қишлоқ хўжалиги вазирлиги (И. Абдурахмонов) бир ой муддатда Толали экинлар илмий-тадқиқот институтини ташкил этиш боғлиқ барча зарурий чораларни кўрсин.

12. Вазирлар Маҳкамаси икки ой муддатда Генетик модификацияланган организмлар ва унинг маҳсулотлари хавфсизлигининг илмий экспертизасини ташкил этиш ва ўтказиш тартибини ҳамда Қишлоқ хўжалиги экинларининг генетик модификацияланган навларининг миллий базасини шакллантириш ва юритиш тартибини тасдиқласин.

13. Мазкур қарорнинг ижросини самарали ташкил қилишга масъул ва шахсий жавобгар этиб қишлоқ хўжалиги вазири И.Ю. Абдурахмонов ҳамда Қорақалпоғистон Республикаси Вазирлар Кенгаши Раиси ва вилоятлар ҳокимлари белгилансин.

Қарор ижросини муҳокама қилиб бориш, ижро учун масъул идоралар фаолиятини мувофиқлаштириш ва назорат қилиш Бош вазир ўринбосари Ж.А. Ходжаев зиммасига юклансин.

Ўзбекистон Республикаси
Президенти

Ш. МИРЗИЁЕВ

Тошкент ш.,
2023 йил 15 декабрь,
ПҚ-391-сон

БЕШИНЧИ БЎЛИМ**ЎЗБЕКИСТОН РЕСПУБЛИКАСИ
ЁШЛАР СИЁСАТИ ВА СПОРТ ВАЗИРИНИНГ
БУЙРУҒИ****502 Ўзбекистон Республикаси Ёшлар сиёсати ва спорт вазирлиги стипендиясини тайинлаш ва тўлаш тартиби тўғрисидаги низомни тасдиқлаш ҳақида***

*Ўзбекистон Республикаси Адлия вазирлиги томонидан 2023 йил
4 декабрда рўйхатдан ўтказилди, рўйхат рақами 3479*

Ўзбекистон Республикасининг «Жисмоний тарбия ва спорт тўғрисида»ги Қонуни, Ўзбекистон Республикаси Президентининг 2023 йил 7 апрелдаги ПҚ–114-сон «Маъмурий ислохотлар доирасида ёшлар сиёсати ва спорт соҳасида давлат бошқарувини самарали ташкил қилиш чора-тадбирлари тўғрисида»ги қарорига мувофиқ **буюраман:**

1. Ўзбекистон Республикаси Ёшлар сиёсати ва спорт вазирлиги стипендиясини тайинлаш ва тўлаш тартиби тўғрисидаги низом иловага мувофиқ тасдиқлансин.

2. Мазкур буйруқ Ўзбекистон Республикаси Иқтисодиёт ва молия вазирлиги ҳамда Ўзбекистон Миллий паралимпия қўмитаси билан келишилган.

3. Мазкур буйруқ расмий эълон қилинган кундан эътиборан кучга киради.

Вазир**А. ИКРАМОВ**

Тошкент ш.,
2023 йил 10 ноябрь,
18-мҳ-сон

Келишилди:

Иқтисодиёт ва молия вазири**Д. КУЧКАРОВ**

2023 йил 31 октябрь

**Ўзбекистон Миллий
паралимпия қўмитаси раиси****М. ТАШХОДЖАЕВ**

2023 йил 12 октябрь

* Ушбу буйруқ «Қонунчилик маълумотлари миллий базаси»да 2023 йил 5 декабрда эълон қилинган.

Ўзбекистон Республикаси
ёшлар сиёсати ва спорт вазирининг 2023 йил
10 ноябрдаги 18-мх-сон буйруғига
ИЛОВА

**Ўзбекистон Республикаси Ёшлар сиёсати ва спорт вазирлиги
стипендиясини тайинлаш ва тўлаш тартиби тўғрисидаги
НИЗОМ**

Мазкур Низом Ўзбекистон Республикаси Ёшлар сиёсати ва спорт вазирлигининг стипендиясини (бундан буён матнда стипендия деб юритилади) тайинлаш ва тўлаш тартибини белгилайди.

1-боб. Умумий қоидалар

1. Стипендия ҳар ойлик тўлов шаклида Олимпия ва Паралимпия, Осиё ва Парасиё ўйинлари дастурига киритилган спорт турлари бўйича Ўзбекистон Республикасининг спорт терма жамоалари асосий ёки захира таркибига (бундан буён матнда спорт терма жамоалари таркиби деб юритилади) киритилган ҳамда мазкур Низомнинг иловасида белгиланган мезонларга мос келувчи спортчиларга тайинланади.

2. Мазкур Низом қоидалари Олимпия ва Паралимпия ўйинларида совриндор бўлганлиги учун умрбод ойлик тўловлар тайинланган спортчиларга нисбатан татбиқ этилмайди.

**2-боб. Стипендия комиссияси фаолиятини ташкил этиш
ва унинг асосий вазифалари**

3. Ўзбекистон Республикаси ёшлар сиёсати ва спорт вазири буйруғи билан стипендияни тайинлаш ва тўлаш бўйича Стипендия комиссияси (бундан буён матнда Стипендия комиссияси деб юритилади) тузилади ва у стипендияга номзод спортчиларнинг рўйхатини шакллантириш ҳамда стипендия тайинлашга масъул ҳисобланади.

4. Стипендия комиссияси таркиби Ўзбекистон Республикаси Ёшлар сиёсати ва спорт вазирлигининг (бундан буён матнда Вазирлик деб юритилади) марказий аппарати ва Вазирлик тизимидаги ташкилотларнинг жисмоний тарбия ва спорт соҳасида амалий иш тажрибасига эга бўлган ходимлари орасидан камида етти кишидан иборат таркибда шакллантирилади.

5. Стипендия комиссиясига юкланган асосий вазифалар ва функцияларга мувофиқ Стипендия комиссияси фаолиятини ташкил этиш, шунингдек комиссия йиғилишларини ўтказиш ва уларга раҳбарлик қилиш вазир ўринбосари — Стипендия комиссияси раиси томонидан амалга оширилади.

6. Стипендия комиссияси фаолиятини ташкилий жиҳатдан таъминлаш унинг котиби зиммасига юкланади.

7. Стипендия комиссияси стипендияга номзод спортчилар маълумотла-

рини кўриб чиқиш ва уларнинг рўйхатини шакллантириш бўйича қуйидаги вазифаларни бажаради:

Спорт турларини ривожлантириш республика марказлари ҳамда Ўзбекистон Миллий паралимпия қўмитаси (бундан буён матнда масъул ижрочилар деб юритилади) томонидан тақдим қилинадиган стипендияга номзод спортчиларнинг рўйхатини кўриб чиқиш;

стипендияга номзод спортчилар рўйхатидаги спортчилар тўғрисидаги маълумотларнинг ҳақиқийлигини ва мазкур Низомнинг иловасида белгиланган мезонларга мослигини текшириш;

ўзига юкланган вазифаларнинг бажарилишини таъминлаш учун масъул ижрочилардан зарур ахборотларни сўраб олиш;

стипендия тайинлаш учун барча зарур ҳужжатлар ва маълумотларнинг масъул ижрочилар томонидан ўз вақтида тақдим этилиши устидан назоратни амалга ошириш;

Ўзбекистон Республикасининг спорт терма жамоалари асосий ёки захира таркибига киритилган спортчилар рўйхатини доимий равишда мониторинг қилиб бориш;

спортчиларга стипендия тайинлаш ёки стипендия тўлашни тўхтатиш тўғрисида қарор қабул қилиш.

8. Стипендия комиссияси йиғилишлари ҳар чоракда камида бир марта ўтказилади. Йиғилишларда кун тартибига киритилган масалалар юзасидан коллегиял тарзда қарорлар қабул қилинади.

9. Стипендия комиссияси йиғилишлари аъзоларнинг камида учдан икки қисми иштирок этганда ваколатли ҳисобланади.

10. Стипендия комиссияси қарорлари йиғилишда иштирок этаётган аъзоларнинг камида учдан икки қисми томонидан маъқулланган тақдирда, қабул қилинган ҳисобланади.

3-боб. Стипендияга номзод спортчилар рўйхатини кўриб чиқиш, уларнинг маълумотларини текшириш ва стипендия тайинлаш

11. Масъул ижрочилар ҳар чорак биринчи ойининг 5-санасига қадар мазкур Низом иловасида белгиланган мезонлар асосида спорт терма жамоалари таркибидаги спортчилардан стипендияга номзодлар рўйхатини тузади ва Стипендия комиссиясига тақдим қилади.

Бунда, мазкур Низомнинг иловасида белгиланган мезон талабларига мос келувчи ҳамда спорт терма жамоалари таркибига киритилган барча спортчиларнинг стипендияга номзодлар рўйхатига тўлиқ киритилишига масъул ижрочилар жавобгар ҳисобланади.

12. Масъул ижрочилар стипендияга номзод спортчилар рўйхати билан биргаликда Стипендия комиссияси кўриб чиқиши учун мазкур Низомнинг иловасида белгиланган мезонлар асосида спортчиларнинг мусобақаларда эришган натижаларини тасдиқловчи ҳужжатларни тақдим қилади.

13. Стипендия комиссияси стипендияга номзод спортчилар ҳақида бош-

қа зарур маълумотларни (шахсига оид маълумотлар, спорт терма жамоалари таркибидаги ҳолати бўйича маълумотлар ва бошқалар) «ERP Sport» ягона электрон бошқарув тизими орқали олади.

14. Стипендия комиссияси масъул ижрочилар томонидан тақдим қилинган стипендияга номзод спортчилар рўйхатини ва уларнинг мусобақаларда эришган натижаларини тасдиқловчи ҳужжатларни 15 кун ичида кўриб чиқади.

15. Ҳужжатларни кўриб чиқиш жараёнида Стипендия комиссияси масъул ижрочилар томонидан тақдим қилинган стипендияга номзод спортчилар рўйхатидаги спортчиларнинг ҳақиқатдан ҳам спорт терма жамоалари таркибида эканлигини ва уларнинг мусобақаларда эришган натижаларини тасдиқловчи ҳужжатлари ҳақиқийлигини, шунингдек мазкур Низомнинг 2-бандида кўрсатилган ҳолатларни текширади.

16. Стипендия комиссияси йиғилишида умумий овоз бериш йўли билан стипендия тайинлаш ва тўлаш тўғрисида ёки стипендия тайинлашни рад этиш тўғрисида қарор қабул қилинади.

Олимпия ва Паралимпия, Осиё ва Параосиё ўйинлари дастурига киритилган спорт турлари бўйича спорт терма жамоалари таркибига киритилган ҳамда мазкур Низомнинг иловасида белгиланган мезонларга мос келувчи спортчиларга стипендия тайинланади.

Стипендиялар стипендия тайинлаш ва тўлаш тўғрисидаги қарор қабул қилинган ойдан бошлаб бир йил муддатга мазкур Низомнинг 32-бандида белгиланган миқдорга қатъий риоя қилган ҳолда тайинланади.

17. Стипендия комиссияси қарори баённома билан расмийлаштирилади.

18. Стипендия комиссияси қарори Вазирликнинг расмий веб-сайтида эълон қилиб борилади.

4-боб. Стипендия комиссияси қарори юзасидан берилган мурожаатларни кўриб чиқиш

19. Ўзбекистон Республикаси ёшлар сиёсати ва спорт вазирининг буйруғи билан Стипендия комиссияси қарори юзасидан берилган мурожаатларни кўриб чиқиш бўйича апелляция комиссияси (бундан буён матнда апелляция комиссияси деб юритилади) тузилади.

Апелляция комиссияси таркибига Вазирликнинг Стипендия комиссияси фаолиятида иштирок этмаган масъул ходимлари киритилади.

Апелляция комиссияси аъзолари сони тоқ сонда ҳамда камида беш кишидан иборат таркибда шакллантирилади.

20. Стипендия комиссияси қароридан норози бўлган масъул ижрочилар ёки стипендияга номзод спортчилар ёхуд уларнинг қонуний вакиллари (бундан буён матнда мурожаатчи деб юритилади) Стипендия комиссиясининг қарори қабул қилинган кундан бошлаб, беш кун давомида Апелляция комиссиясига мурожаат қилиш ҳуқуқига эга.

21. Апелляция комиссияси йиғилишлари аъзоларнинг камида учдан икки қисми иштирок этганда ваколатли ҳисобланади.

22. Апелляция комиссияси қарорлари йиғилишда иштирок этаётган

аъзоларнинг камида учдан икки қисми томонидан маъқулланганда, қабул қилинган ҳисобланади.

23. Апелляция комиссияси томонидан келиб тушган мурожаатлар уч иш куни ичида кўриб чиқилади.

24. Апелляция комиссияси йиғилишларида ёки қарор қабул қилинаётган вақтда мурожаатчининг иштирок этиш ҳуқуқи таъминланади.

25. Апелляция комиссияси мурожаатчининг апелляция шикоятини кўриб чиқиш натижалари бўйича мурожаатчининг талабларини қаноатлантириш ёки қаноатлантиришни рад этиш тўғрисида қарор қабул қилади.

26. Апелляция комиссияси тегишли қарор нусхасини мурожаатчига бир кун муддатда почта орқали ёки электрон шаклда унинг электрон почта манзилига етказилишини, агар мурожаатчи Апелляция комиссияси қарори қабул қилинаётган вақтда иштирок этган бўлса, шахсан ўзига топширилишини таъминлайди.

5-боб. Стипендияни тайинлаш ва тўлаш билан боғлиқ харажатлар

27. Стипендия тўловлари учун маблағлар «спортчи» лавозими учун белгиланган иш ҳақи, терма жамоалар ва уларнинг захираси, спортчилар энергия сарфини қоплаш ва жисмоний ресурсларини тиклаш учун ажратиладиган мақсадли тўловларни мақбуллаштириш ҳисобидан қопланади ҳамда Ўзбекистон Республикаси Давлат бюджети параметрларини шакллантиришда Вазирликнинг харажатлари сметасида инобатга олинади.

28. Стипендия тўловлари учун маблағлар ҳисоби Вазирликда очиладиган махсус шахсий ғазна ҳисобварағида юритилади.

29. Вазирлик Стипендия комиссиясининг стипендия тайинлаш ва тўлаш ҳақидаги қарори асосида стипендия тўлови учун талаб этиладиган маблағларни Вазирликнинг харажатлар сметасида стипендия тўлови учун кўзда тутилган маблағлар ҳисобидан масъул ижрочиларнинг харажатлар сметасига ўзгартириш киритиш орқали ажратади.

30. Стипендияни тўлаш масъул ижрочилар томонидан спортчиларнинг банк карталарига ёки депозит ҳисобварақларига молиявий маблағларни ўтказиш йўли билан амалга оширилади.

Бунда, молия йили якуни бўйича фойдаланилмай қолган маблағлар Ўзбекистон Республикаси Давлат бюджетига қайтарилади.

31. Спортчилар учун стипендия тўловлари Ўзбекистон Республикаси миллий валютаси — сўмда амалга оширилади.

32. Стипендия миқдори меҳнатга ҳақ тўлаш энг кам миқдорининг 3 баравари этиб белгиланади.

33. Стипендия комиссиясининг стипендия тайинлаш ва тўлаш тўғрисидаги қарори қабул қилинган ойдан бошлаб спортчига стипендия ҳисобланади ва тўлаб борилади.

34. Стипендия тайинланган спортчилар ўзини ўзи банд қилган шахслар сифатида эътироф этилиш ҳуқуқига эга бўлади.

35. Масъул ижрочилар ҳар ярим йилда стипендия тайинланган спортчиларнинг спорт натижаларини мониторинг қилиб боради ва Стипендия комиссиясига ахборот киритиб боради.

6-боб. Стипендия тўлашни тўхтатиш асослари ва тартиби

36. Стипендия тайинланган спортчиларга стипендия тўлаш қўйидаги асосларга кўра тўхтатилишига йўл қўйилади:

1) стипендия тайинланган спортчилар спорт терма жамоалари таркибидан чиқарилганда;

2) стипендия тайинланган спортчиларга Олимпия ва Паралимпия ўйинларида совриндор бўлганлиги учун умрбод ойлик тўловлар тайинланганда.

37. Мазкур Низомнинг 36-бандида келтирилган ҳолатлар аниқланган вақтдан бошлаб уч иш кунидан кечиктирмасдан Стипендия комиссияси мазкур Низомнинг 8 — 10-бандларида белгиланган тартибда стипендия тўлашни тўхтатиш тўғрисида қарор чиқаради.

38. Стипендия тўловларини тўлаш Стипендия комиссиясининг стипендия тўлашни тўхтатиш тўғрисидаги қарори қабул қилинган ойнинг охиригидан санадан тўхтатилади.

7-боб. Яқуний қоида

39. Мазкур Низом талабларининг бузилишида айбдор бўлган шахслар қонунчилик ҳужжатларида белгиланган тартибда жавобгар бўлади.

Ўзбекистон Республикаси Ёшлар сиёсати ва спорт вазирлиги стипендиясини тайинлаш ва тўлаш тартиби тўғрисидаги низомга
ИЛОВА

**Ўзбекистон Республикаси Ёшлар сиёсати ва спорт вазирлигининг стипендиясига номзод спортчиларнинг охирги бир йилда Олимпия ва Паралимпия, Осиё ва Параосиё ўйинлари дастурига киритилган спорт турлари бўйича халқаро мусобақалардаги иштирокига оид асосий
МЕЗОНЛАР**

Т/р	Мусобақалар номи	Ўринлар
Олимпия ва Паралимпия ўйинларига киритилган спорт турлари бўйича		
1.	Олимпия ва Паралимпия ўйинлари (катталар)	1 — 8 ўрин
2.	Олимпия ва Паралимпия ўйинлари (ўсмирлар)	1 — 6 ўрин
3.	Осиё ва Параосиё ўйинлари (катталар)	1 — 6 ўрин
4.	Осиё ва Параосиё ўйинлари (ёшлар ва ўсмирлар)	1 — 3 ўрин
5.	Жаҳон чемпионати (катталар)*	1 — 8 ўрин
6.	Жаҳон чемпионати (ёшлар)***	1 — 6 ўрин
7.	Жаҳон чемпионати (ўсмирлар)***	1 — 4 ўрин
8.	Жаҳон кубоги (катталар)*	1 — 5 ўрин
9.	Жаҳон кубоги (ёшлар)***	1 — 4 ўрин
10.	Жаҳон кубоги (ўсмирлар)***	1 — 3 ўрин
11.	Осиё чемпионати (катталар)**	1 — 5 ўрин
12.	Осиё чемпионати (ёшлар)**	1 — 4 ўрин
13.	Осиё чемпионати (ўсмирлар)**	1 — 3 ўрин
14.	Осиё кубоклари (катталар)**	1 — 3 ўрин
15.	Осиё кубоклари (ёшлар)***	1 — 3 ўрин
16.	Осиё кубоклари (ўсмирлар)***	1 — 3 ўрин
17.	Марказий Осиё чемпионати (катталар, ёшлар, ўсмирлар)***	1 — 3 ўрин
18.	Халқаро ва Осиё ташкилотлари томонидан ташкил қилинадиган комплекс спорт тадбирлари (катталар, ёшлар, ўсмирлар)	1 — 3 ўрин
Осиё ва Параосиё ўйинларига киритилган ноолимпия спорт турлари бўйича		
1.	Жаҳон чемпионати (катталар)*	1 — 3 ўрин
2.	Осиё чемпионати (катталар)**	1 — 3 ўрин

Изоҳлар:

* Ҳарбийлар ўртасидаги ва талабалар ўртасидаги жаҳон чемпионатлари учун ҳам татбиқ этилади.

** Осиё-Океания чемпионати, Шарқий-Осиё чемпионати, Фарбий-Осиё чемпионати, Жанубий-Осиё чемпионати, Шимолий-Осиё чемпионатлари учун ҳам татбиқ этилади.

*** 23 ёшгача бўлган ёшлар ҳамда кичик ўсмирлар мусобақалари натижалари учун ҳам татбиқ этилади.

ЎЗБЕКИСТОН РЕСПУБЛИКАСИ ИЧКИ ИШЛАР ВАЗИРИНИНГ
БУЙРУҒИ

503 Жисмоний ва юридик шахсларга тегишли итларни умумий бўйсунувчанлик ва ҳимоя-қоровул кўникмалари бўйича тайёрлаш учун пуллик хизматлар кўрсатиш, шунингдек наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш тартиби тўғрисидаги низомни тасдиқлаш ҳақида*

*Ўзбекистон Республикаси Адлия вазирлиги томонидан 2023 йил
5 декабрда рўйхатдан ўтказилди, рўйхат рақами 3480*

Ўзбекистон Республикаси Вазирлар Маҳкамасининг 2023 йил 31 августдаги 432-сон «Вазирлар Маҳкамасининг «Ички ишлар органларининг кинология хизматлари фаолиятини тубдан такомиллаштириш чора-тадбирлари тўғрисида» 2019 йил 9 сентябрдаги 750-сон қарорига ўзгартириш ва қўшимчалар киритиш тўғрисида»ги қарорига мувофиқ **буюраман:**

1. Жисмоний ва юридик шахсларга тегишли итларни умумий бўйсунувчанлик ва ҳимоя-қоровул кўникмалари бўйича тайёрлаш учун пуллик хизматлар кўрсатиш, шунингдек наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш тартиби тўғрисидаги низом иловага мувофиқ тасдиқлансин.

2. Мазкур буйруқ расмий эълон қилинган кундан эътиборан кучга кириди.

Вазир

П. БОБОЖОНОВ

Тошкент ш.,
2023 йил 2 ноябрь,
602-сон

* Ушбу буйруқ «Қонунчилик маълумотлари миллий базаси»да 2023 йил 6 декабрда эълон қилинган.

Ўзбекистон Республикаси
ички ишлар вазирининг 2023 йил 2 ноябрдаги
602-сон буйруғига
ИЛОВА

**Жисмоний ва юридик шахсларга тегишли итларни умумий
бўйсунувчанлик ва ҳимоя-қоровул кўникмалари бўйича тайёрлаш
учун пуллик хизматлар кўрсатиш, шунингдек наслчилик
питомнигида етиштирилган ва ички ишлар органларининг
эҳтиёжидан ортиқ бўлган ҳамда хизматга яроқсиз деб
топилган итларни сотиш тартиби тўғрисидаги
НИЗОМ**

Мазкур Низом жисмоний ва юридик шахсларга тегишли итларни умумий бўйсунувчанлик ва ҳимоя-қоровул кўникмалари бўйича тайёрлаш учун пуллик хизматлар кўрсатиш, шунингдек Ўзбекистон Республикаси Ички ишлар органлари хизмат итлари наслчилик питомнигида (бундан буён матнда наслчилик питомниги деб юритилади) етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш тартибини белгилайди.

1-боб. Умумий қоидалар

1. Мазкур Низомда қуйидаги тушунчалар қўлланилади:

буюртмачи — Қорақалпоғистон Республикаси Ички ишлар вазирлиги, Тошкент шаҳар ва Тошкент вилояти ички ишлар бош бошқармалари, вилоятлар ички ишлар бошқармалари кинология бўлинмаларига (бундан буён матнда кинология бўлинмалари деб юритилади) итларни умумий бўйсунувчанлик ва ҳимоя-қоровул кўникмалари бўйича тайёрлаш, шунингдек наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиб олиш учун ўз ихтиёрига кўра мурожаат қилган жисмоний ёки юридик шахслар;

пуллик хизматлар — кинология бўлинмалари томонидан шартнома асосида ҳақ эвазига итларни умумий бўйсунувчанлик ҳамда ҳимоя-қоровул кўникмаларига тайёрлаш бўйича кўрсатиладиган хизмат;

тест-синови — итларнинг умумий бўйсунувчанлик ва ҳимоя-қоровул кўникмалари бўйича тайёрлашга мойиллигини аниқлаш учун аппортировка (буюмларни олиб келиш), қидирув реакциясини яққол намоён қилиши, эгасига яхши муносабатда бўлиши ва унга бўйсунуши, ҳаракатчанлиги (тўсиқларни енгиб ўтишда), ҳид билиши ривожланганлиги, ўзига нисбатан таҳдидли ҳаракатларга жаҳлдорликни юзага чиқариши, отилган ўқ овози ва бошқа кучли қўзғатувчиларга нисбатан хотиржам муносабатда бўлиши каби кўрсаткичлар бўйича итнинг иш қобилятини текшириш;

умумий бўйсунувчанлик ва ҳимоя-қоровул кўникмалари — итларни бошқариш, йўналтириш ва бирор ҳолатни қабул қилиши учун зарур

бўлган бўйсунувчанлик, шунингдек ҳимоялаш ва қоровуллик кўникмаларини ҳосил қилиши.

2. Пуллик хизматлар кўрсатиш ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотишдан тушадиган маблағлар тўлиқ Ўзбекистон Республикаси Ички ишлар вазирлиги Махсус бюджетдан ташқари жамғармасига йўналтирилади ва улардан ички ишлар органларининг кинология бўлинмалари моддий-техника базасини мустаҳкамлаш ҳамда ходимларни моддий рағбатлантириш учун фойдаланилади.

3. Пуллик хизматлар прејскуранти (нархлари) Ўзбекистон Республикаси Ички ишлар вазирлиги Молия ва моддий-техника таъминоти департаменти билан келишилган ҳолда Ўзбекистон Республикаси ички ишлар вазири ўринбосари — Жамоат хавфсизлиги департаменти бошлиғи томонидан тасдиқланади.

2-боб. Кинология бўлинмаларида пуллик хизмат кўрсатиш

4. Буюртмачи пуллик хизматлардан фойдаланиш учун кинология бўлинмаларига бевосита ёки ахборот-коммуникация технологиялари воситасида электрон тарзда мурожаат қилади.

5. Итларни умумий бўйсунувчанлик ва ҳимоя-қоровул кўникмалари бўйича тайёрлаш учун клиник соғлом бўлган ва саккиз ойдан ошган мазкур Низомнинг 1-иловасида кўрсатилган итлар қабул қилинади.

Буюртмачи томонидан келтирилган ит ушбу Низомнинг 1-иловасида кўрсатилган итлар тоифасига кирмаган тақдирда, Қорақалпоғистон Республикаси Ички ишлар вазирлиги, Тошкент шаҳар ва Тошкент вилояти ички ишлар бош бошқармалари, вилоятлар ички ишлар бошқармалари бошлиқлари томонидан тасдиқланадиган Кинология бўлинмаларида итларни умумий бўйсунувчанлик ҳамда ҳимоя-қоровул кўникмалари бўйича тайёрлашга яроқлилигини аниқлаш комиссияси томонидан тест-синови ва ўрганиш ўтказилиши ҳамда унинг ижобий хулосаси асосида умумий бўйсунувчанлик ёки ҳимоя-қоровул кўникмаси бўйича тайёрлаш учун лойиқ деб топилиши ва истисно тариқасида қабул қилиниши мумкин.

6. Буюртмачининг мурожаати келиб тушган кундан бошлаб беш иш куни ичида кинология бўлинмалари томонидан итни дастлабки клиник кўрикдан ўтказиш учун олиб келиш санаси маълум қилинади.

7. Буюртмачи томонидан белгиланган санада келтирилган ит ва унинг ветеринария паспорти кинология бўлинмаларига тақдим этилади.

Буюртмачи томонидан эмлаш тадбирлари итни кинология бўлинмаларига олиб келишдан камида йигирма бир кун олдин ёки ўн бир ойдан ошмаган ҳолда амалга оширилган бўлиши шарт.

8. Буюртмачи томонидан келтирилган ит кинология бўлинмаларининг ветеринария хизмати шифокорлари томонидан дастлабки клиник кўрикдан ўтказилади ва натижаси бўйича мазкур Низомнинг 2-иловасига мувофиқ шаклда ветеринария хулосаси тузилади.

Ветеринар шифокор хулосасига кўра:

ит соғлом деб топилса, кинология бўлинмалари томонидан қабул қилинади;

ит носоғлом деб топилса, у кинология бўлинмалари томонидан қабул қилинмайди.

9. Буюртмачи томонидан келтирилган ит соғлом деб топилганда, буюртмачи ва кинология бўлинмалари ўртасида икки нусхада пуллик хизматлар кўрсатиш бўйича шартнома тузилади.

10. Кинология бўлинмаларига умумий бўйсунувчанлик ва ҳимоя-қоровул кўникмалари бўйича тайёрлаш учун қабул қилинган итлар ўн кун давомида дастлабки ветеринария ва карантин назоратида сақланади.

11. Қабул қилиш пайтида итларда юқумли касалликлар яширин (инкубацион) даврида бўлиб, карантин ёки кейинги даврда юқумли касаллик белгилари юзага чиққанда кинология бўлинмаларининг ветеринар шифокорлари томонидан хулоса тузилади ва давлат ветеринария хизматининг ҳудудий бўлинмалари хабардор қилинган ҳолда итлар буюртмачига қайтарилади.

12. Умумий бўйсунувчанлик ва ҳимоя-қоровул кўникмалари бўйича тайёрланаётган итлар ветеринар шифокорлари хулосаси асосида қайтарилган (четлаштирилган) ҳолларда тўланган маблағлар кинология бўлинмалари томонидан сарфланган озуқа ва дори-дармон харажатлари чегирилган ҳолда ўн беш иш куни ичида буюртмачига қайтарилади.

13. Умумий бўйсунувчанлик ва ҳимоя-қоровул кўникмаларига тайёрлаш бўйича икки ойлик курснинг сўнггида итлар буюртмачи иштирокида тест синовидан ўтказилади.

Бунда тест-синовидан ўтган итлар далолатнома асосида буюртмачига топширилади, тест-синовидан ўта олмаган итлар эса буюртмачининг хоҳишига кўра кинология бўлинмалари томонидан қўшимча бепул тайёрлашдан ўтказиб берилади.

3-боб. Наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш

14. Наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни буюртмачиларга сотиш Ўзбекистон Республикаси Фуқаролик кодекси, Ўзбекистон Республикасининг «Хўжалик юритувчи субъектлар фаолиятининг шартномавий-ҳуқуқий базаси тўғрисида»ги Қонуни ва бошқа норматив-ҳуқуқий ҳужжатларга мувофиқ амалга оширилади.

15. Итларнинг ички ишлар органларининг эҳтиёжидан ортиқлиги ва хизматга яроқсизлиги Ўзбекистон Республикаси ички ишлар вазири, Қорақалпоғистон Республикаси Ички ишлар вазири, Тошкент шаҳар ва Тошкент вилояти ички ишлар бош бошқармалари ҳамда вилоятлар ички ишлар бошқармалари бошлиқларининг буйруғи билан тасдиқланадиган Наслчилик питомнигида етиштирилган, эҳтиёждан ортиқ бўлган ва хизматга яроқсиз итларни аниқлаш комиссияси (бундан буён матнда комиссия деб юритилади) томонидан аниқланади.

16. Комиссия итларни кўздан кечириш ва ўрганиш давомида мазкур Низомнинг 3-илоvasида келтирилган Итларни хизматга яроқсиз деб топиш учун асос бўлувчи жисмоний камчиликлар, касалликлар ва нуқсонлар рўйхати асосида уларни хизматга яроқсиз деб топади.

17. Сотилаётган хизматга яроқсиз итлар кинология бўлинмалари ва наслчилик питомниги томонидан барча юқумли касалликларга қарши даволаш-профилактика тадбирларидан ўтказилиши лозим.

18. Клиник соғлом, жисмонан нуқсонсиз, лекин феъл-атворида тахминий-жинсий ва суст-мудофаа реакциясининг устунлиги ҳамда асаб фаолияти асосий типологик хусусиятларининг камчиликлари ўта юқори ёки жуда паст қўзғалувчанлиги мавжуд бўлган итлар комиссия томонидан хизматга яроқсиз деб топилди ҳамда мазкур Низомнинг 4-илоvasига мувофиқ шаклда далолатнома тузилиб, сотувга қўйилади.

19. Наслчилик питомнигида етиштирилган ва ички ишлар органларида хизматга яроқсиз деб топилган итлар тегишли лицензияга эга бўлган баҳоловчи ташкилотлар томонидан баҳоланади.

20. Баҳоловчи ташкилотлар томонидан итнинг баҳоланганлиги бўйича ҳужжатлар қабул қилинган кундан бошлаб уч иш куни ичида кинология бўлинмалари ва наслчилик питомниги томонидан оммавий ахборот воситаларига итни сотиш бўйича эълон берилади.

Эълонда сотувга қўйилган итнинг фотосурати ва лақаби, ёши, зоти, жинси, нархи, шунингдек, тўловларни амалга ошириш учун ички ишлар органларининг банк реквизитлари ҳамда қўшимча маълумотлар учун телефон рақами, ит сотиб олиш учун мурожаат этишнинг охирги муддати (кун ва соат) ҳақидаги маълумотлар кўрсатилади.

21. Итни сотиб олиш учун буюртмачилар кинология бўлинмалари ва наслчилик питомнигига бевосита ёки ахборот-коммуникация технологиялари воситасида электрон тарзда мурожаат қилади.

22. Кинология бўлинмалари ва наслчилик питомниги томонидан итни сотиб олиш бўйича тушган мурожаат уч иш куни ичида кўриб чиқилади.

Кинология бўлинмалари ва наслчилик питомниги итни сотиб олиш тўғрисидаги мурожаат асосида буюртмачи билан шартнома расмийлаштиради.

Агарда, бир нечта буюртмачилар бир вақтнинг ўзида сотувга қўйилган айнан бир итни сотиб олиш бўйича мурожаат қилганида, биринчи бўлиб мурожаат қилган буюртмачи билан шартнома расмийлаштирилади.

23. Хизматга яроқсиз деб топилган итлар белгиланган тартибда шартнома асосида пул ўтказиш йўли билан сотилади.

24. Буюртмачи шартнома имзолангунга қадар сотувга қўйилган итни кўздан кечириши мумкин.

4-боб. Яқунловчи қоидалар

25. Мазкур Низом талабларини қўллашда юзага келадиган низолар қонунчилик ҳужжатларида белгиланган тартибда ҳал этилади.

26. Мазкур Низом талаблари бузилишида айбдор деб топилган шахслар қонунчилик ҳужжатларида белгиланган тартибда жавоб берадилар.

Жисмоний ва юридик шахсларга тегишли итларни умумий бўйсунувчанлик ва ҳимоя-қоровул кўникмалари бўйича тайёрлаш учун пуллик хизматлар кўрсатиш, шунингдек наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш тартиби тўғрисидаги низомга
1-ИЛОВА

**Кинология бўлинмалари томонидан умумий бўйсунувчанлик
ҳамда ҳимоя-қоровул кўникмалари бўйича тайёрлаш учун
қабул қилинадиган итлар
РЎЙХАТИ**

Т/р	Итнинг зоти
I. Майда зотли итлар	
1.	Рус овчи спаниельи
2.	Англия коккер спаниельи
3.	Фокстерьер
4.	Ягдтерер
5.	Такса
II. Ўрта зотли итлар	
6.	Немис овчаркаси
7.	Бельгия овчаркаси
8.	Шарқий Европа овчаркаси
9.	Лабрадор
10.	Ирланд сеттери
11.	Курцхаар
12.	Дратхаар
13.	Шотланд сеттери
III. Йирик зотли итлар	
14.	Ўрта Осиё овчаркаси
15.	Кавказ овчаркаси
16.	Ротвейлер
17.	Ризеншнауцер
18.	Қора терьер

Жисмоний ва юридик шахсларга тегишли итларни умумий бўйсунувчанлик ва химоя-қоровул кўникмалари бўйича тайёрлаш учун пуллик хизматлар кўрсатиш, шунингдек наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш тартиби тўғрисидаги низомга
2-ИЛОВА

_____ -сонли ветеринария хулосаси

20__ йил «____» _____ тумани (шаҳар)

Биз, _____
(кинология бўлинмалари)

ветеринаршифокори (катташифокори, шифокори) _____,
ветеринария хизматининг масъул ходимлари _____, 20__ йил
«____» _____ куни _____
(кинология бўлинмалари)

_____ ТОМОНИДАН
(ит эгасининг Ф.И.О. ва паспорти (идентификация ID-картаси) маълумотлари, агар юридик шахс бўлса,
унинг тўлиқ номи ва раҳбарининг Ф.И.О.)

_____ тайёрлашга қабул қилиш учун _____
лақабли, _____ зотига мансуб бўлган, _____ йилда туғилган, ранги _____, жинси _____ бўлган итни ветеринария кўриги, клиник ва лаборатория текширувларидан ўтказиб, қуйидагиларни аниқладик:

- а) итнинг семизлиги _____;
- б) кўзларида ўзгаришлар _____;
- в) тишлари _____;
- г) тана ҳарорати _____;
- д) юнги ялтироқлигида ўзгариш _____;
- е) эшитиш қобилияти _____;
- ж) итнинг қон таҳлили кўрсаткичи _____.

Юқоридагиларга асосланиб, итнинг клиник аҳволи ветеринария хизмати шифокорлари хизмати ходимлари томонидан _____ деб топилди.

Ветеринария хизмати бошлиғи _____
(катта шифокори, шифокор)

Ветеринар шифокор _____

Жисмоний ва юридик шахсларга тегишли итларни умумий бўйсунувчанлик ва химоя-қоровул кўникмалари бўйича тайёрлаш учун пуллик хизматлар кўрсатиш, шунингдек наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш тартиби тўғрисидаги низомга
З-ИЛОВА

Итларни хизматга яроқсиз деб топиш учун асос бўлувчи жисмоний камчиликлар, касалликлар ва нуқсонлар РЎЙХАТИ

1. Скелет ва мушакларнинг умумий жисмоний ўсишдан тўхтаб қолганлиги, нозиклиги, кичиклиги, жуда семизлиги ёки озғин (орик)лиги.

2. Ташқи кўринишининг асосий ва яққол кўзга ташланадиган камчиликлари:

тишларнинг эмаль қатлами бутунлай емирилганлиги, жағдаги битта ёки иккита тишларнинг йўқлиги;

ингичка, заиф мушакли бўйин ёки бурмакли, осилиб тушган терибли бўйин;

ҳаддан ташқари осилиб турган ёки букри қомат;

синиб турган ёки букри (эгик), ингичка, етилмаган мушакли бел;

жуда қийшайган сағри;

думалоқ, бўртма, эгри-бугри қовурғали, олд томонидан номутаносиб, кенг ёки жуда тор ёхуд кичкина кўкрак қафаси;

осилиб қолган ёки ҳаддан ташқари ичига ботиб кетган қорин;

олдинги оёқларнинг тор вазияти (холати), ташқарига ёки ичкарига қийшайган тирсаклар, яққол кўзга ташланадиган маймоқлик ёки оёқларнинг жуда кенг қўйилиши, орқа оёқларнинг қиличсимон вазияти, сакраб юришига ёрдам берувчи бўғинларнинг яқинлашуви ёки қийшайганлиги, ясси, ёйилган оёқ панжалари.

3. Ҳаракатнинг издан чиқишига сабаб бўлувчи марказий асаб тизими (мия ва унинг пардалари)нинг бузилиши ва зарарланиши.

4. Аъзоларнинг тузалмайдиган функционал бузилишини келтириб чиқарувчи периферик (сиртқи) асаб касалликлари.

5. Елка ва сон мушакларининг қуриши (атрофияси) оқибатида пайдо бўлган чўлоқлик, шунингдек пай, пайчалар ва бўғинларнинг сурункали яллиғланиши.

6. Оғир, сурункали касалликлар, захарланишлар оқибатида пайдо бўладиган ҳазм қилиш аъзоларининг узоқ давом этадиган, яққол кўзга ташланадиган, даволанмайдиган бузилишлари (касалликлари).

7. Нафас қисиш, йўтал, хириллаш, шиллиқ пардаларнинг цианози каби аниқ ташқи белгиларга эга бўлган нафас йўллари, ўпка, ўпка пардасининг сурункали касалликлари. Бурун шиллиқ пардаси ёки ўсимталарининг ўзгариши, айниши оқибатида нафас олишнинг бузилиши.

8. Юрак ва йирик қон томирларининг сурункали касалликлари.

9. Қаттиқ оғриқ, оқсоқлик ва ҳаракатларнинг йўқолиши билан кечадиган мушаклар ва бўғинларнинг сурункали ревматизми.

10. Эркин ҳаракатга тўсқинлик қилувчи бўғинлар, пайлар ва юмшоқ тўқималарнинг деформацияси (шаклининг ўзгариши).

11. Йиринглаш, тешик оқма яраларни келтириб чиқарувчи лимфатик безларнинг сурункали шикастланиши.

12. Ҳаракатларни чеклайдиган нотўғри битган суяклар.

13. Бўйинбоғ ва кўкракбанд тақилишини қийинлаштирадиган, йўқотиб бўлмайдиган ўсмалар, шишлар ёки сурункали, зўрайдиган касалликлар.

14. Хавфли ўсмалар, шишлар (саратон).

15. Чурранинг (дабба) ичак-човоқлар ва қорин билан тушиб кетиши.

16. Эркин ҳаракатланиш имконини йўққа чиқарувчи бармоқлар ва тирноқларнинг бедаво касаллиги.

17. Эшитиш қобилиятини қисман йўқотиш билан кечадиган қулоқ ички қисми (лабиринти) ва пардаси функциясини ўзгартириб юборадиган қулоқнинг сурункали йирингли яллиғланиши.

18. Кучсиз сезиш қобилияти.

19. Кўз шиш қопчиғи ва шиллиқ пардасининг сурункали яллиғланиши, кўз ёши оқмаяраси, кўздан доимий равишда ёш оқиши, кўриш қобилиятининг қисман йўқолиши.

20. Бичилган (ахта қилинган) итлар (комиссия томонидан ит хизматга яроқли деб топилса хизматда фойдаланиш мумкин).

21. Иш қобилияти бутунлай йўқолишига сабаб бўладиган ва даволаниш учун сарфланадиган харажатларни оқламайдиган травматик касалликлар (яралар, жароҳатлар, урилган, лат еган жойлар ва бошқалар) рўйхатда кўрсатилмаган касалликлар).

22. Даволанмайдиган, сурункали паразитар касалликлар (қирма темиратки, мой хўрак, қўтир) тананинг асосий қисмига тарқалган чилла яра (экзема).

23. Хизмат итларидан самарали фойдаланишга имкон бермайдиган ва йўл қўймайдиган бошқа жисмоний камчилик, касаллик ва нуқсонлар.

24. Қарилиги сабабли (тўққиз ёш) хизматдан фойдаланишини чеклайдиган итнинг организмдаги ўзгаришлар.

25. Ўта жаҳлдор ва қўрқоқ итлар.

Жисмоний ва юридик шахсларга тегишли итларни умумий бўйсунувчанлик ва химоя-қоровул кўникмалари бўйича тайёрлаш учун пуллик хизматлар кўрсатиш, шунингдек наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш тартиби тўғрисидаги низомга
4-ИЛОВА

«ТАСДИҚЛАЙМАН»

Комиссия раиси, _____
Қорақалпоғистон Республикаси Ички ишлар
вазирлиги, Тошкент шаҳар ва Тошкент
вилояти ички ишлар бош бошқармалари,
вилоятлар ички ишлар бошқармалари
бошлигининг жамоат хавфсизлиги бўйича
ўринбосари _____

Хизмат итининг яроқсизлиги ҳақида ДАЛОЛАТНОМА

20__ йил «___» _____ тумани (шаҳар)

_____ Наслчилик питомнигидаги итларнинг хизматга яроқсизлигини аниқловчи комиссия раиси _____
(лавозими, Ф.И.О.)

ва қуйидаги аъзолар _____
(лавозими, Ф.И.О.)

_____ иборат комиссия, кинолог _____ га бириктирилган, _____ лақабли, _____ зотли, _____ жинсига мансуб, _____ да туғилган, _____ рангли хизмат итини текширувдан ўтказиб (сана), қуйидагиларни аниқлади: _____
(итнинг камчилиги, касаллиги ёки нуқсонни кўрсатиб ўтилади)

Комиссия хулосаси

«_____» лақабли ити ёки кучук боласи Наслчилик питомнигида итларни хизматга яроқсиз деб топиш учун асос бўлувчи жисмоний камчиликлар, касалликлар ва нуқсонлар рўйхатининг _____-бандига мувофиқ: _____

белгиланган тартибда сотувга қўйилсин.

Комиссия раиси:

Комиссия аъзолари:

ЎЗБЕКИСТОН РЕСПУБЛИКАСИ ИЧКИ ИШЛАР ВАЗИРИНИНГ
БУЙРУҒИ**504** Ички ишлар органларида хизматга номзодларни танлаб олиш тадбирларини ташкил этиш ва ўтказиш тартиби тўғрисидаги йўриқномани тасдиқлаш ҳақида*

*Ўзбекистон Республикаси Адлия вазирлиги томонидан 2023 йил
6 декабрда рўйхатдан ўтказилди, рўйхат рақами 3481*

Ўзбекистон Республикаси Президентининг 2017 йил 29 ноябрдаги ПҚ–3413-сон «Ички ишлар органлари кадрлари билан ишлаш ва уларнинг хизматини ташкил этиш тартибини тубдан такомиллаштириш чора-тадбирлари тўғрисида»ги ҳамда 2023 йил 20 январдаги ПҚ–10-сон «Ички ишлар органларини халқчил профессионал тузилмага айлантириш ва аҳоли билан янада яқин ҳамкорликда ишлашга йўналтириш бўйича қўшимча чора-тадбирлар тўғрисида»ги қарорлари ва Вазирлар Маҳкамасининг 2023 йил 31 августдаги 433-сон «Ички ишлар органларида хизматга номзодларни қабул қилиш учун тест синовларини ўтказиш тартиби тўғрисидаги низомни тасдиқлаш ҳақида»ги қарорига мувофиқ **буюраман:**

1. Ички ишлар органларида хизматга номзодларни танлаб олиш тадбирларини ташкил этиш ва ўтказиш тартиби тўғрисидаги йўриқнома 1-иловага мувофиқ тасдиқлансин.

2. Айрим идоравий норматив-ҳуқуқий ҳужжатлар 2-иловага мувофиқ ўз кучини йўқотган деб топилсин.

3. Мазкур буйруқ расмий эълон қилинган кундан эътиборан кучга киради.

Вазир

П. БОБОЖОНОВ

Тошкент ш.,
2023 йил 2 ноябрь,
601-сон

* Ушбу буйруқ «Қонунчилик маълумотлари миллий базаси»да 2023 йил 7 декабрда эълон қилинган.

Ўзбекистон Республикаси
ички ишлар вазирининг 2023 йил
2 ноябрдаги 601-сон буйруғига
1-ИЛОВА

Ички ишлар органларида хизматга номзодларни танлаб олиш тадбирларини ташкил этиш ва ўтказиш тартиби тўғрисидаги ЙЎРИҚНОМА

Мазкур Йўриқнома ички ишлар органларида хизматга (бундан буён матнда хизмат деб юритилади) номзодларни танлаб олиш тадбирларини (бундан буён матнда танлов деб юритилади) ташкил этиш ва ўтказиш тартибини белгилайди.

1-боб. Умумий қоидалар

1. Номзодлар хизматга ихтиёрий тартибда, ички ишлар органларидаги мавжуд бўш лавозимлардан келиб чиққан ҳолда ички ишлар органлари томонидан танлов асосида қабул қилинади.

Танловда иштирок этадиган номзодларнинг сони чекланмайди.

2. Номзодларга қўйиладиган умумий талаблар ҳамда танловдан муваффақиятли ўтган номзодларни хизматга қабул қилиш тартиби Ўзбекистон Республикаси Президентининг 2017 йил 29 ноябрдаги ПҚ–3413-сон қарори билан тасдиқланган Ички ишлар органларида хизматни ўташ тартиби тўғрисидаги низомга (бундан буён матнда Низом деб юритилади) мувофиқ амалга оширилади.

3. Низомга асосан:

а) хизмат мажбуриятларини бажариш чоғида ҳалок бўлган ички ишлар органлари ходимлари ва ҳарбий хизматчиларнинг фарзандлари танловнинг саралаш босқичидаги дастлабки ўрганиш ҳамда интеллектуал ривожланганлик даражаси ва психоэмоционал барқарорлигини баҳолаш босқичларидан муваффақиятли ўтган тақдирда, тест синовидан озод этилган ҳолда жисмоний тайёргарлик даражасини баҳолаш босқичига ўтказилади.

б) мазкур Йўриқноманинг 1-илоvasида* келтирилган рўйхатга мувофиқ ички ишлар органларининг тор ихтисослик бўйича мутахассисликлар талаб этиладиган айрим лавозимларига тегишли тор ихтисослик бўйича мутахассисликка эга бўлган номзодлар танловнинг саралаш босқичисиз, фақат ўрганиш босқичи орқали хизматга қабул қилинади;

в) мазкур Йўриқноманинг 2-илоvasида* келтирилган рўйхатга мувофиқ ички ишлар органларининг алоҳида мутахассислик талаб этиладиган лавозимларига ушбу мутахассисликка эга бўлган номзодларгина танлов асосида (бундан мазкур Йўриқноманинг 1-илоvasидаги рўйхатга мувофиқ тор ихтисослик бўйича мутахассисликлар талаб этиладиган лавозимлар учун номзодлар мустасно) қабул қилинади;

г) мазкур Йўриқноманинг 3-илоvasида* келтирилган рўйхатга мувофиқ

* 1 — 3-иловалар «Қонунчилик маълумотлари миллий базаси»да эълон қилинган.

ички ишлар органларининг айрим бўлинмалари ва лавозимларига ўттиз ёшдан катта бўлган фуқаролар қабул қилиниши мумкин;

д) қуйидаги номзодлар, истисно тариқасида, танлов тадбирларининг саралаш босқичидаги тест синови ва жисмоний тайёргарлик даражасини баҳолашдан озод қилинади:

илмий даража ёки илмий унвонга эга бўлган номзодлар;

олий таълим муассасаларини имтиёзли диплом билан тамомлаганлар;

профессор-ўқитувчи ва илмий таркиб лавозимларига номзодлар;

эксперт-криминалистика, иш юритиш, киберхавфсизлик, ахборот технологиялари, таҳлилий ва юридик таъминлаш бўлинмаларига номзодлар;

спорт мусобақаларининг (Олимпия спорт турлари бўйича Олимпия ва Осиё ўйинлари, жаҳон ва Осиё чемпионатларида охириги тўрт йилда ҳамда республика чемпионатларида охириги бир йилда ғолиб ва совриндор (1 — 3 ўрин) индивидуал турларида ғолиб чиққан номзодлар;

талабалар, магистрлар ёки докторантлар учун Ўзбекистон Республикаси Президентининг давлат стипендияси соҳиби бўлган номзодлар.

4. Ўзбекистон Республикаси Вазирлар Маҳкамасининг 2022 йил 15 январдаги 23-сон қарори билан тасдиқланган Аҳолининг жисмоний тайёргарлик даражасини баҳолаш бўйича спорт синовларини ташкил этиш ва ўтказиш тартиби тўғрисидаги низомга асосан, ёш кўрсаткичларидан келиб чиқиб, аҳолининг жисмоний тайёргарлик даражасини баҳолаш бўйича спорт синовларининг махсус талабларини муваффақиятли бажарган (1, 2 ва 3-ўрин ғолиблари) фуқаролар бир йил мобайнида танловнинг жисмоний тайёргарлик даражасини баҳолаш босқичидан озод қилинади ҳамда уларга ушбу босқич бўйича максимал баҳо берилади.

5. Хизматга қабул қилишда номзодлар бўйининг баландлиги қуйидаги махсус антропометрик параметрларга жавоб бериши талаб этилади (бундан мазкур банднинг тўртинчи хатбошида назарда тутилган лавозимлар бўйича номзодлар мустасно):

эркак жинсидаги номзодларнинг бўйи — 165 сантиметрдан паст бўлмаслиги керак;

аёл жинсидаги номзодларнинг бўйи — 160 сантиметрдан паст бўлмаслиги керак.

Мазкур Йўриқноманинг 4-илоvasида* келтирилган рўйхатга мувофиқ Ўзбекистон Республикаси Ички ишлар вазирлиги (бундан баён матнда Ички ишлар вазирлиги деб юритилади) Жамоат хавфсизлиги департаменти Йўл ҳаракати хавфсизлиги хизмати ва Жамоат тартибини сақлаш бўлинмаларининг айрим лавозимларига номзодлар бўйининг баландлиги алоҳида антропометрик параметрларга жавоб бериши талаб этилади.

6. Танлов тадбирларининг исталган битта босқичидан ўта олмаган номзодга уни такроран топширишга, шунингдек танлов тадбирларининг кейинги босқичига ўтишга рухсат берилмайди.

7. Танлов тадбирлари давомида фахрийлар кенгаши аъзолари, жамоат ташкилотлари вакиллари ва номзодларнинг яқин қариндошлари (бундан

* 4-илова «Қонунчилик маълумотлари миллий базаси»да эълон қилинган.

буён матнда жамоатчилик вакиллари деб юритилади) иштирок этишлари мумкин.

Бунда, жамоатчилик вакиллари саралаш тадбирларини ўтказиш жараёни ва унинг натижаларидан норози бўлган тақдирда танловнинг тегишли комиссияси раисига ёзма равишда мурожаат қилишлари ва ўз таклиф ҳамда эътирозларини билдиришлари мумкин. Жамоатчилик вакилларининг мурожаатлари Ўзбекистон Республикасининг «Жисмоний ва юридик шахсларнинг мурожаатлари тўғрисида»ги Қонунида белгиланган тартибда кўриб чиқиши лозим.

2-боб. Танлов тадбирларини ташкиллаштириш

8. Хизматга муносиб номзодларни танлаб олиш мақсадида мунтазам равишда тарғибот-ташвиқот ишлари олиб борилади, оммавий ахборот воситаларида ҳамда ички ишлар органларининг расмий нашрлари, веб-сайтларида бўш лавозимлар тўғрисида, шунингдек танлов ўтказилишидан камида уч ой олдин танлов ўтказиш жойи ва кунлари тўғрисида эълонлар жойлаштирилади.

9. Жамоатчилик вакиллари танловларни реал вақт режимида (онлайн) кузатиб боришлари учун танлов тадбирлари видеокузатув (онлайн трансляция) остида ўтказилади.

10. Танловни ташкил этиш ва ўтказиш учун Ички ишлар вазирлигининг тегишли таркибий тузилмалари, Қорақалпоғистон Республикаси ички ишлар вазири, Тошкент шаҳар ва Тошкент вилояти ички ишлар бош бошқармалари ва вилоятлар ички ишлар бошқармалари бошлиқлари (бундан буён матнда ички ишлар органлари бошлиқлари деб юритилади) буйруғи билан мазкур Йўриқноманинг 5-иловасига* мувофиқ таркибда, аъзолари сони тоқ сондан иборат бўлган Танлов тадбирларини ташкил этиш ва ўтказиш комиссиялари (бундан буён матнда Қабул комиссияси деб юритилади) тузилади.

Танловлар шаффоф ва ошкора тарзда ўтказилишини таъминлаш ҳамда жамоатчилик назоратини ўрнатиш мақсадида Қабул комиссияси фаолиятида иштирок этиш учун ихтиёрийлик асосида жамоатчилик вакиллари таклиф этилиши мумкин.

11. Ички ишлар органлари бошлиқларининг маънавий-маърифий ишлар ва кадрлар билан таъминлаш бўйича тегишли ўринбосарлари Қабул комиссиялари фаолиятига раҳбарлик қилади ва қўйидагиларни амалга оширади:

Қабул комиссияси ишини ташкиллаштиради ҳамда унга юклатилган вазифа ва функцияларнинг бажарилишини таъминлайди;

Қабул комиссияси аъзолари ўртасида вазифаларни тақсимлайди ҳамда уларнинг бажарилишини назорат қилади;

Қабул комиссияси таркибидаги кичик комиссияларни шакллантиради ва таркибини тасдиқлайди;

кичик комиссиялар фаолиятини мувофиқлаштиради ва назорат қилади;

танловларни видеокузатув қурилмалари орқали реал вақт режимида (онлайн) кузатиб бориш имконияти яратилишини ташкиллаштиради.

* 5-илова «Қонунчилик маълумотлари миллий базаси»да эълон қилинган.

12. Қабул комиссияси таркибда қуйидаги йўналишлар бўйича кичик комиссиялар тузилади:

тегишли соҳавий хизмат раҳбарлари ҳамда кадрлар билан таъминлаш бўлинмаси раҳбар ва ходимларидан иборат таркибда тузиладиган номзодларни дастлабки ўрганиш бўйича кичик комиссия;

касбий тайёргарлик, шахсий хавфсизлик, тиббиёт бўлинмалари, Ёшлар иттифоқи бошланғич ташкилоти етакчилари ва соҳавий хизмат ходимларидан иборат таркибда тузиладиган жисмоний тайёргарлик даражасини баҳолаш бўйича кичик комиссия;

мутахассис-психолог-полиграфологлар ва бевосита уларнинг бошлиқларидан иборат таркибда тузиладиган интеллектуал ривожланганлик даражаси ва психоэмоционал барқарорликни баҳолаш ҳамда психофизиологик (полиграф) текширув бўйича кичик комиссиялар.

13. Танловлар номзоднинг хоҳишига кўра, давлат, қорақалпоқ ёки рус тилларида ўтказилади.

14. Танлов тадбирлари қуйидаги босқичларни ўз ичига олади:

а) саралаш босқичи:

рўйхатдан ўтиш;

дастлабки ўрганиш (Низом ва мазкур Йўриқномада белгиланган талабларга мос келишни текшириш);

интеллектуал ривожланганлик даражаси ва психоэмоционал барқарорлигини баҳолаш (бундан буён матнда психологик ўрганиш деб юритилади);

тест синови (Ўзбекистоннинг энг янги тарихи, ҳуқуқшунослик ва тарбия фанлари бўйича билимларни баҳолаш);

жисмоний тайёргарлик даражасини баҳолаш;

б) ўрганиш босқичи:

хизматга яроқлилиқ даражасини аниқлаш мақсадида ҳарбий-тиббий комиссия кўригидан ўтказиш;

психофизиологик (полиграф) текширув (ички ишлар органларида хизмат қилиш учун тўсқинлик қиладиган салбий омилларни аниқлаш мақсадида).

3-боб. Танловнинг саралаш босқичида иштирок этиш учун рўйхатдан ўтиш

15. Танлов тўғрисида эълонлар берилгандан сўнг, хизматга кириш истагини билдирган номзодлар доимий яшаш жойи бўйича рўйхатга олинган жойидаги ички ишлар органининг расмий веб-сайти (бундан буён матнда веб-сайт деб юритилади) орқали рўйхатдан ўтади.

Бунда, номзодлар веб-сайтга ўзининг паспорт ёки идентификация ID-картаси маълумотларини киритади.

Ички ишлар вазирлиги марказий аппарати ва олий таълим муассасаларига (Ички ишлар вазирлиги Академияси ва Малака ошириш институтига), шунингдек Тошкент шаҳар Ички ишлар бош бошқармасига хизматга кириш истаги бўлган номзодлар, доимий яшаш жойи бўйича рўйхатга олинган жойидан қатъий назар, тегишлилигига кўра, Ички ишлар вазирлиги марказий ап-

парати, олий таълим муассасалари (Ички ишлар вазирлиги Академияси ва Малака ошириш институти) ёки Тошкент шаҳар Ички ишлар бош бошқармасининг расмий веб-сайтлари орқали рўйхатдан ўтишлари мумкин.

16. Рўйхатдан ўтиш жараёнида номзодларга веб-сайт орқали Низом ва мазкур Йўриқномада белгиланган талаблар эслатиб ўтилади.

17. Рўйхатдан ўтган номзодларга навбатдаги танлов тадбирлари бошланишидан беш иш куни олдин тегишли ички ишлар органлари томонидан саралаш тадбирларининг бошланиш вақти ва жойи ҳақида ёзма ёки электрон шаклда хабар берилади.

4-боб. Номзодларни дастлабки ўрганиш

18. Рўйхатдан ўтган ва дастлабки ўрганиш учун ҳозир бўлган номзодларнинг Низомда белгиланган умумий талаблар ва мазкур Йўриқноманинг 5-бандида назарда тутилган талабларга жавоб беришини аниқлаш мақсадида дастлабки ўрганиш бўйича кичик комиссия (бундан буён мазкур бобда кичик комиссия деб юритилади) томонидан номзодларни дастлабки ўрганиш ишлари амалга оширилади ҳамда уларнинг бўйи ўлчанади.

19. Номзоднинг бўйи талабга жавоб бермаган ҳолларда, унга дастлабки ўрганиш тадбирларида иштирок этишга рухсат берилмайди.

20. Дастлабки ўрганиш давомида Низом ва мазкур Йўриқномада белгиланган талабларга мос деб топилган номзодлар шу вақтнинг ўзида суҳбатдан ўтказилади.

21. Суҳбат кичик комиссиянинг суҳбат ўтказилишига масъул бўлган аъзоси (аъзолари) томонидан номзодга Низом ва мазкур Йўриқнома талаблари, унинг ҳуқуқ ва мажбуриятлари, хизматни ўташ билан боғлиқ шартлар ва имтиёзлар, хизматнинг зарарли ва хавфли жиҳатларини тушунтириш ҳамда номзоднинг хизматга кириш истаги бор ёки йўқлигини аниқлаш мақсадида ўтказилади.

22. Кичик комиссия томонидан номзодни дастлабки ўрганиш босқичида ўтказилган тадбирлар натижалари умумлаштирилиб, шу куннинг ўзида номзодни танловнинг кейинги босқичига ўтказиш ёки ўтказишни рад этиш ҳақида хулоса чиқарилади.

Бунда, номзоднинг бўйи талабга жавоб берганда ҳамда номзод хизматга кириш истагини билдирган ҳолларда, шунингдек номзод Низомда белгиланган талабларга жавоб берганда кичик комиссия томонидан номзодни кейинги босқичга ўтказиш тўғрисида қарор қабул қилиниши керак.

5-боб. Номзодларнинг интеллектуал ривожланганлик даражаси ва психоэмоционал барқарорлигини баҳолаш

23. Танловнинг дастлабки ўрганиш босқичидан муваффақиятли ўтган номзодларнинг интеллектуал ривожланганлик даражаси ва психоэмоционал барқарорлигини аниқлаш мақсадида психологик ўрганиш ўтказилади.

24. Номзодларни психологик ўрганиш психологик тест синовидан ўтказиш орқали амалга оширилади.

25. Психологик тестлар, уларнинг жавоблари ва жавоблар бланкалари Ўзбекистон Республикаси ички ишлар вазири ёки унинг ўринбосари томонидан тасдиқланади.

Психологик тестлар номзодларнинг қуйидаги психологик хусусиятларини аниқлашга йўналтирилади:

ақл-заковат, умумий интеллектуал салоҳият ва хотира;

мантикий фикрлаш, зийраклик, тафаккур шаклларининг ривожланганлик даражаси, фикрлаш тезлиги ва таҳлил қилиш қобилияти;

шахсга хос индивидуал хусусиятлар, киришимлилиқ, психик турғунлик, самимийлик.

26. Психологик тестлар ва уларнинг жавоблари Қабул комиссияси котибида сақланади, котиб тестлар ва уларнинг жавоблари ошкор қилинмаслиги учун масъул ҳисобланади.

27. Психологик ўрганиш бошланишидан аввал номзодлар интеллектуал ривожланганлик даражаси ва психоэмоционал барқарорликни баҳолаш бўйича кичик комиссия (бундан буён мазкур бобда кичик комиссия деб юритилади) аъзолари томонидан психологик ўрганишни ўтказиш тартиби, ҳар бир вазифа бўйича назарда тутилган баҳолаш мезонлари билан таништирилади.

28. Номзодлар психологик ўрганиш ўтказиладиган хонага ўзининг биометрик паспорти ёки идентификация ID-картасини кўрсатган ҳолда киритилади.

29. Тест синовлари ўтказилаётган хонага жадвал, китоб, уяли телефон, компьютер, калькулятор ҳамда бошқа телекоммуникация воситалари ва шпаргалкалар олиб кириш тақиқланади.

30. Номзодлар барча ҳаракатларни комиссия аъзолари кўрсатмаларига мувофиқ бажаради. Мазкур кўрсатмаларга амал қилмаган номзод хонадан чиқариб юборилади ҳамда у тест синовларини бажармаган ҳисобланади. Бунда, номзодга тест синовларини такроран топширишига, шунингдек танлов тадбирларининг кейинги босқичига ўтишига рухсат берилмайди.

31. Номзодлар билан тест синовлари якка тартибда ёки гуруҳ бўлиб ўтказилиши мумкин. Тест гуруҳ таркибида ўтказилганда, хонада номзодлар сони 30 нафардан ошмаслиги зарур.

32. Тест бошлангунга қадар номзодлар соғлигининг ҳолати суриштирилади. Ўзини ёмон ҳис қилаётганидан шикоят қилган номзодлар шу куни тест синовида қўйилмайди. Бундай ҳолларда номзодга бошқа куни, лекин уч иш кунидан кечикмай қайта тест синовидан ўтишига рухсат берилади.

33. Психологик ўрганиш давомида номзодларга икки қисмдан иборат бўлган тест асосида вазифалар берилади.

Бунда, биринчи қисмда (интеллектуал ривожланганлик даражасини ўрганиш) номзодларга 10 та топшириқдан иборат бўлган 2 та вазифа, иккинчи қисмда эса, (психоэмоционал барқарорлик даражасини ўрганиш) 71 та саволдан, шунингдек жавобларнинг самимий ёки носамимийлигини аниқлаш йўналиши бўйича бериладиган 15 та саволдан иборат 1 та вазифа берилади.

34. Номзодга берилган вазифаларни бажариш учун 55 дақиқа, шунингдек ҳар бир вазифани ўқиб чиқиш учун қўшимча 5 дақиқадан — умумий 1 соат 10 дақиқа вақт берилади.

35. Саволларнинг ўзига хослигидан келиб чиқиб, жавоб вариантлари берилиши ёки берилмаслиги мумкин. Номзодлар тест саволларига жавоб вариантларини белгилашда жавоблар варақасидаги вариантлардан фақат битта тўғри жавобни белгилаши лозим.

36. Тест синовларини топшириш вақтида номзоднинг хонадан чиқиши тақиқланади, бундан номзоднинг соғлиғи ёмонлашган ҳолатлар мустасно.

37. Тест синовларини ўтказиш вақтида синовлар ўтказилаётган хонада номзодлар ҳамда кичик комиссия аъзоларидан ташқари бошқа шахсларнинг бўлиши тақиқланади.

38. Номзоднинг психологик тест саволларига берган жавоблари мазкур Йўриқноманинг 6-иловасига* мувофиқ психологик тест натижаларини ҳисоблаш мезонлари асосида ҳисоблаб чиқилади.

39. Психологик тестларни бажармаган, шунингдек тест натижалари қониқарсиз баҳоланган номзодларга синовни қайта топширишга рухсат берилмайди.

40. Тест синовининг натижалари бўйича, у ўтказилган куннинг ўзида кичик комиссиянинг психологик ўрганиш тадбирларида иштирок этган аъзолари томонидан мазкур Йўриқноманинг 7-иловасига* мувофиқ шаклда қайднома расмийлаштирилади ва имзоланади.

Психологик ўрганишнинг умумий натижалари қайднома расмийлаштирилган куннинг ўзида номзодларга эълон қилиниши лозим.

41. Психологик ўрганиш натижаларига асосан қуйидаги хулосалардан бири чиқарилади:

ички ишлар органларида хизматга тавсия этиш ҳақида;

ички ишлар органларида хизматга тавсия этмаслик ҳақида.

42. Психологик ўрганиш натижаларига кўра, ички ишлар органларида хизматга тавсия этилган номзодларгина тест синовига қўйилади.

6-боб. Тест синови

43. Ўзбекистоннинг энг янги тарихи, ҳуқуқшунослик ва тарбия фанлари бўйича номзодларнинг билимларини баҳолаш мақсадида тест синови ўтказилади.

Тест синовлари Ўзбекистон Республикаси Олий таълим, фан ва инновациялар вазирлиги ҳузуридаги Билим ва малакаларни баҳолаш агентлиги (бундан буён матнда Билим ва малакаларни баҳолаш агентлиги деб юритилади) томонидан ўтказилади.

Интеллектуал ривожланганлик даражаси ва психоэмоционал барқарорликни баҳолаш натижалари асосида тест синовига қўйилган номзодларга тест синови ўтказиладиган жой ва вақт ҳақида ушбу синов ўтказилишидан уч кун олдин Билим ва малакаларни баҳолаш агентлиги томонидан хабар берилади.

Тест синовлари натижаларига кўра тўпланиши мумкин бўлган умумий 189 баллдан камида 134 балл тўплаган номзодлар жисмоний тайёргарлик даражасини баҳолаш босқичига ўтган деб ҳисобланади.

* 6-7-иловалар «Қонунчилик маълумотлари миллий базаси»да эълон қилинган.

44. Тест топшириқлари китоби ҳар бир фандан 30 та топшириқни ўз ичига олади ва ҳар бир тўғри жавоб учун қуйидагича балл берилади:

ҳуқуқшунослик фани бўйича ҳар бир тўғри жавоб учун — 3,1 балл ва жами — 93 балл;

Ўзбекистоннинг энг янги тарихи бўйича ҳар бир тўғри жавоб учун — 2,1 балл ва жами — 63 балл;

тарбия фани бўйича ҳар бир тўғри жавоб учун — 1,1 балл ва жами — 33 балл.

45. Билим ва малакаларни баҳолаш агентлиги томонидан тақдим этилган тест синовлари натижалари асосида Қабул комиссияси қотиби томонидан мазкур Йўриқноманинг 8-иловасига* мувофиқ шаклда қайднома расмийлаштирилади.

46. Қайднома Қабул комиссиясининг ҳар бир аъзоси томонидан имзоланиб, тасдиқлаш учун комиссия раисига тақдим этилади ҳамда тегишли ички ишлар органлари томонидан тест синовлари натижалари Билим ва малакаларни баҳолаш агентлиги томонидан тақдим этилган кундан бошлаб, икки иш куни ичида веб-сайтга жойлаштириш орқали номзодларга маълум қилинади.

7-боб. Номзодларнинг жисмоний тайёргарлик даражасини баҳолаш

47. Саралаш босқичининг тест синовидан муваффақиятли ўтган номзодларнинг жисмоний тайёргарлик даражасини аниқлаш мақсадида улар жисмоний тайёргарлик даражасини баҳолашдан ўтказилади.

48. Номзодлар жисмоний тайёргарлик даражасини баҳолаш машқларини бажаришни бошлашидан олдин уларга жисмоний тайёргарлик даражасини баҳолаш бўйича кичик комиссия (бундан буён мазкур бобда кичик комиссия деб юритилади) аъзолари томонидан машқларни бажаришга қўйиладиган талаблар, машқларни бажариш тартиби ҳамда баҳолаш мезонлари тушунтирилади.

49. Номзодларнинг жисмоний тайёргарлик даражасини баҳолаш уларнинг мазкур бобда назарда тутилган машқларни бажаришларини текшириш орқали амалга оширилади.

50. Жисмоний тайёргарлик даражасини баҳолаш тадбири бошланишидан олдин номзод кичик комиссиянинг масъул аъзоларига ўзини биометрик паспорти ёки идентификация ID-кارتасини кўрсатган ҳолда таништилади.

51. Номзодлар машқларни спорт кийимида бажаришлари тавсия этилади.

52. Номзодлар томонидан бажарилиши лозим бўлган жисмоний тайёргарлик машқлари ва уларни бажаришга қўйиладиган талаблар эркак ва аёл жинсидаги номзодлар учун алоҳида белгиланади.

53. Қуйидагилар эркак жинсидаги номзодлар томонидан бажарилиши лозим бўлган жисмоний тайёргарлик машқлари ҳисобланади:

куч ишлатиш машқи — тўсинда (турникда) тортилиш;

тезликка оид машқ — 100 метрга югуриш;

* 8-илова «Қонунчилик маълумотлари миллий базаси»да эълон қилинган.

чидамлиликка оид машқ — 3 000 метрга югуриш.

54. Қўйидагилар аёл жинсидаги номзодлар томонидан бажарилиши лозим бўлган жисмоний тайёргарлик машқлари ҳисобланади:

куч ишлатиш машқи — куч ишлатиш машқлари комплекси;

тезликка оид машқ — 100 метрга югуриш;

чидамлиликка оид машқ — 1000 метрга югуриш.

55. Жисмоний тайёргарлик машқлари қўйидаги кетма-кетликда бажарилади:

биринчи навбатда — куч ишлатиш машқлари;

иккинчи навбатда — тезликка оид машқлар;

учинчи навбатда — чидамлиликка оид машқлар.

56. Жисмоний тайёргарлик машқларини бажариш оралиғида номзодларга дам олиш учун камида 10 дақиқа вақт берилади.

57. 100 метрга югуриш машқи стадионнинг югуриш йўлакчасида ёхуд қаттиқ қопламали текис жойларда юқори ёки қўйи стартдан қўйидагича амалга оширилади:

«Старт» командаси бўйича старт олиш чизигига яқинлашиш;

«Диққат» командаси бўйича тананинг оғирлигини олдинда турган оёққа ўтказиш, гавда ва бошни олдинга эгиш, қўлларни тирсакка букиш;

«Олға» командаси бўйича югуришни бошлаш.

58. Қўйидагилар тўсинда (турникда) тортилиш машқига қўйиладиган талаблар ҳисобланади:

бош бармоқ тўсин ичкарасидан ушланади, тана бироз ростланади, тизза бўғими тўғриланади, оёқ учлари чўзилади, товонлар бирлаштирилади;

ияк тўсиндан (турникдан) ўтгунга қадар қўллар букилади;

ҳаракат тўлиқ амалга оширилиши билан дастлабки ҳолатга қайтилади (осилиш ҳолати 1-2 сония давом этиши мумкин);

оёқларни 45° гача кўтаришга рухсат этилади.

Ушбу машқни бажаришда оёқларни букиш ва кериш, танани ҳаракатсиз ҳолатда эгиш ҳамда оёқлар билан силтанма ҳаракатлар қилиш тақиқланади.

59. 3000 ва 1000 метрга югуриш машқлари стадионнинг югуриш йўлакчасида ёхуд қаттиқ қопламали текис жойларда, умумий ёки алоҳида старт берилган ҳолда ўтказилади.

Старт ва марра чизиқлари бир жойда белгиланиши мумкин. Бунда, югуриш ҳудудидан чиқиб кетган ёки югуришдан юриш ҳолатига ўтган иштирокчи машқни бажармаган ҳисобланади.

60. Номзод томонидан куч ишлатиш машқлари комплексини бажаришда 1 дақиқа ичида 2 та машқ узлуксиз бажарилиши керак.

Ҳар бир машқни бажариш учун 30 сониядан вақт ажратилади. Биринчи машқни бажариш учун ажратилган 30 сония вақт тугаганлиги эълон қилинганда, номзод дарҳол иккинчи машқни бажаришга киришади.

61. Қўйидагилар биринчи машқни бажаришга қўйиладиган талаблар ҳисобланади:

чалқанча ётилади;

қўллар белда, тиззалар букилмаган ҳолда оёқлар тўпиқ қисмидан бошқа бир шахс ёрдамида босилиб, ушланади;

дастлабки ҳолатдан гавда олдинга кўтарилиб, қўллар оёқ учига текканидан сўнг, дастлабки ҳолатга қайтилади.

Ушбу машқни бажариш вақтида тиззаларни букиш ва оёқларни тепага кўтариш тақиқланади.

62. Қўйдагилар иккинчи машқни бажаришга қўйиладиган талаблар ҳисобланади:

таяниб ётилади, қўллар елка кенглигида тиззалар букилмаган ҳолатда бўлади;

қўллар букилиб ёзилади (бунда, бел ҳамда елка қисмлари биргаликда ва текис тушиб чиқиши шарт);

қўллар букилиб тана ерга нисбатан параллел ҳолатга келтирилганидан сўнг, дастлабки ҳолатга қайтилади.

Ушбу машқни бажариш вақтида қўллар чала букилиб ёзилиши, бел ва елкалар ҳар хил тушиб чиқиши, тиззаларнинг ерга тегиши тақиқланади.

63. Мазкур бобда назарда тутилган машқларни бажариш тартибини бузган номзодга шу машқ бўйича баҳо қўйилмайди.

64. Номзодларнинг жисмоний тайёргарлик даражасини баҳолаш мазкур Йўриқноманинг 9-иловасига* мувофиқ амалга оширилади. Бунда, номзодга ҳар бир машқни бажарганлик учун баҳо қўйилади.

65. Жисмоний тайёргарлик даражасини баҳолаш тадбирлари ўтказилган кундан кейинги кундан кечиктирмай унинг натижалари бўйича мазкур Йўриқноманинг 10-иловасига* мувофиқ шаклда қайднома расмийлаштирилади ва натижалар номзодларга эълон қилинади.

66. Қайднома кичик комиссиянинг жисмоний тайёргарлик даражасини баҳолаш бўйича тадбирда иштирок этган аъзолари томонидан имзоланади.

67. Жисмоний тайёргарлик даражасини баҳолаш машқларидан фақат «яхши» ва «аъло» баҳо олган номзодлар ўрганиш босқичига ўтказилади.

8-боб. Номзодлар ҳужжатларини расмийлаштириш ва номзодларнинг тиббий текширувини ўтказиш

68. Саралаш босқичидан муваффақиятли ўтган номзодлар доимий яшаш жойи бўйича рўйхатга олинган жойидаги ички ишлар органига мазкур Йўриқноманинг 11-иловасига* мувофиқ шаклдаги ариза билан мурожаат этади.

69. Номзодларнинг шахсий ҳужжатлари йиғмажилдларини расмийлаштириш кадрлар билан таъминлаш бўлинмалари томонидан амалга оширилади.

70. Ҳужжатларида камчилик аниқланган номзодга ушбу камчиликни бартараф этиши кадрлар билан таъминлаш бўлинмалари томонидан тушунтирилади.

71. Ҳужжатларни йиғиш жараёни билан бир вақтда номзодларга хизматга яроқлилиқ даражасини аниқлаш мақсадида кадрлар билан таъминлаш бўлинмалари томонидан ҳарбий-тиббий комиссияга йўлланма берилади.

* 9 — 11-иловалар «Қонунчилик маълумотлари миллий базаси»да эълон қилинган.

72. Саралаш босқичидан муваффақиятли ўтган номзодларни тиббий текширувдан ўтказиш Вазирлар Маҳкамасининг 2017 йил 26 сентябрдаги 764-сон қарори билан тасдиқланган Ўзбекистон Республикаси ички ишлар органларида тиббий текширувни ташкил этиш ва ҳарбий-тиббий экспертизани ўтказиш тартиби тўғрисида низомга мувофиқ амалга оширилади.

9-боб. Номзодларни психофизиологик (полиграф) текширувдан ўтказиш тартиби

73. Тиббий текширув натижаларига кўра хизматга яроқли деб топилган номзодлар ички ишлар органларида хизмат қилиш учун тўсқинлик қиладиган салбий омиллар мавжудлигини аниқлаш мақсадида психофизиологик (полиграф) текширувдан (бундан буён матнда полиграф текшируви деб юритилади) ўтказилади.

74. Полиграф текширувини ўтказишда ҳар-хил турдаги стимуллар (саволлар, фотосуратлар) кетма-кетликда тақдим этилганда одам организмидagi физиологик кўрсаткичларни (параметрларни) қайд этишга мўлжалланган психофизиологик қурилма — полиграфдан фойдаланилади.

75. Полиграф текшируви ушбу текширувни ўтказиш ва у бўйича хулоса бериш ҳуқуқига эга масъул шахс — полиграфолог томонидан амалга оширилади.

76. Номзодлар полиграф текшируви ўтказиладиган хонага ўзининг биометрик паспорти ёки идентификация ID-картасини кўрсатган ҳолда киритилади.

77. Полиграф текшируви қуйидаги кетма-кетликда ўтказилади:

а) полиграфолог ва номзод ўртасида психологик алоқа ўрнатиш, полиграф текширувини ўтказиш тартибини, полиграф мосламаларининг (тугмалар) хусусиятларини тушунтириш мақсадида номзод билан текширув олди суҳбат ўтказиш;

б) номзодга полиграфнинг мосламаларини (тугмаларни) ўрнатиш;

в) полиграф текширувини ўтказиш (номзод билан савол-жавоб);

г) текширув якуни бўйича номзод билан қайта суҳбат ўтказиш (номзоднинг фикр-мулоҳазаларини тинглаш);

д) полиграф текшируви натижаси бўйича хулоса тайёрлаш.

78. Қуйидаги ҳолларда полиграф текширувини ўтказиш тўхтатилади:

полиграф текшируви вақтида номзоднинг соғлиғи ёки руҳий ҳолати ёмонлашганда;

номзод ўз хоҳиши билан полиграф текширувини давом эттиришдан бош тортганда.

Бунда, номзод ўз хоҳиши билан полиграф текширувини давом эттиришдан бош тортган ҳолларда унга полиграф текширувини қайта топширишга рухсат берилмайди ва бу ҳақда шу куннинг ўзида номзодга хабар берилади.

79. Полиграф текшируви вақтида номзоднинг соғлиғи ёки руҳий ҳолати ёмонлашганлиги сабабли полиграф текширувини ўтказиш тўхтатилганда, кичик комиссия томонидан номзодга бошқа куни, лекин уч иш кунидан кечикмай полиграф текширувидан ўтиш учун рухсат берилади.

80. Полиграф текшируви ўтказилаётганда хонада номзод ва полиграфологдан бошқа шахслар бўлишига йўл қўйилмайди.

81. Номзодга полиграф мосламалари (тугмалари) ўрнатилгандан сўнг уни хизматга қабул қилинишига тўсқинлик қилувчи маълумотлар бор ёки йўқлигини аниқлаш мақсадида 3 тадан 10 тагача саволлар берилади.

Номзод ҳар бир саволга самимийлик билан «Ҳа» ёки «Йўқ» деб жавоб бериши зарур.

Номзоднинг жавоблари бўйича полиграф мосламаларининг (тугмаларининг) ҳар биридан олинган кўрсаткич (маълумот)лар полиграфолог томонидан уч баллик тизим асосида (0 дан 2 баллгача) алоҳида баҳоланади.

Бунда, полиграфолог томонидан номзоднинг организмидаги реакция таҳлил қилинади ва у қўйидагича баҳоланади:

номзоднинг организмидаги реакция кучли бўлса — 2 балл;

номзоднинг организмидаги реакция ўрта даражада бўлса — 1 балл.

номзоднинг организмидаги реакция аниқланмаса — 0 балл.

82. Полиграфолог томонидан номзодларни полиграф текшируви натижаларига асосан қўйидаги хулосалардан бири чиқарилади:

номзод унга берилган саволлар бўйича ўрта арифметик ҳисобда 80 фоиздан юқори балл тўпласа, уни хизматга қабул қилиш мақсадга мувофиқ эмаслиги тўғрисида;

номзод унга берилган саволлар бўйича ўрта арифметик ҳисобда 80 фоиз ва ундан кам балл тўпласа, уни хизматга қабул қилиш мақсадга мувофиқлиги тўғрисида.

Бунда, ушбу хулоса полиграфолог томонидан психофизиологик (полиграф) текшируви ўтказилган куннинг ўзида тайёрланади ва кадрлар билан таъминлаш бўлинмасига тақдим этилади.

10-боб. Хизматга қабул қилиш ҳамда уларнинг апелляция шикоятларини кўриб чиқиш

83. Қабул комиссияси котиби томонидан танлов тадбирлари давомида расмийлаштирилган барча ҳужжатлар (дастлабки ўрганиш варақалари, қайдномалар ва комиссия баённомаларининг нусхалари) ҳамда ҳар бир номзоднинг танлов тадбирларидаги натижалари мазкур Йўриқноманинг 12-иловасига* мувофиқ шаклда чоп этилади ва номзоднинг шахсий ҳужжатлар йиғма жилдига бириктириб қўйилади.

Бунда, тегишли ички ишлар органлари томонидан веб-сайтга жойлаштириш орқали танлов натижалари номзодларга маълум қилинади.

84. Танловнинг барча босқичларидан муваффақиятли ўтиб, энг юқори балл тўплаган номзодлар мавжуд бўш лавозимлар сонини ҳисобга олган ҳолда хизматга қабул қилиниб, Ички ишлар вазирлиги Малака ошириш институтида ташкил этиладиган бошланғич касбий тайёргарлик курсларига юборилади.

85. Танловдан ўтмаган номзодлар бўйича танлов тадбирлари давомида расмийлаштирилган барча ҳужжатлар ҳамда танловнинг барча босқичлари

* 12-илова «Қонунчилик маълумотлари миллий базаси»да эълон қилинган.

акс этган видеотасвир материаллари кадрлар билан таъминлаш бўлинмаларида беш йил муддат давомида сақланади, кейин эса далолатнома асосида йўқ қилинади.

86. Танлов тадбирлари бошланишидан олдин саралаш ва ўрганиш босқичлари натижалари юзасидан номзодларнинг ариза ва шикоятларини кўриб чиқиш учун Қабул комиссияси раисининг буйруғига асосан ички ишлар органларининг камида беш нафар мутахассисларидан иборат таркибда Апелляция комиссияси ташкил этилади.

Саралаш ва ўрганиш босқичларида танлов тадбирларини ўтказишга масъул бўлган шахсларнинг Апелляция комиссияси таркибига киритилишига йўл қўйилмайди.

87. Номзодлар томонидан ариза ва шикоятлар танловнинг тегишли тадбири бўйича натижалар эълон қилинган кундан бошлаб уч иш куни ичида Апелляция комиссиясига ёзма ёки электрон шаклда беришлари мумкин.

88. Апелляция комиссияси апелляция шикоятини, у келиб тушган кундан бошлаб икки ҳафта ичида кўриб чиқади. Номзод апелляцияни кўриб чиқиш жараёнида иштирок этиш ҳуқуқига эга.

Апелляция кўриб чиқиладиган кун ҳақида номзодга уч кун олдин хабар берилади.

89. Апелляция комиссияси унда аъзоларнинг камида учдан икки қисми иштирок этганда ваколатли ҳисобланади. Апелляция комиссиясининг қарори оддий кўпчилик овоз билан қабул қилинади ва мажлисда иштирок этган барча аъзолар томонидан тасдиқланадиган баённома билан расмийлаштирилади.

90. Апелляция комиссияси томонидан апелляция шикоятини кўриб чиқиш давомида номзодга уни қайта баҳолашга қаратилган саволлар берилишига йўл қўйилмайди.

91. Шикоятни кўриб чиқиш натижалари бўйича Апелляция комиссияси томонидан қуйидаги қарорлардан бири қабул қилинади:

дастлабки ва психологик ўрганиш, тест синови, полиграф текширув ҳамда жисмоний тайёргарлик даражасини баҳолаш натижаларини ўзгаришсиз қолдириш;

дастлабки ва психологик ўрганиш, тест синови, полиграф текширув ҳамда жисмоний тайёргарлик даражасини баҳолаш натижаларига ўзгартириш киритиш.

Апелляция шикоятини кўришда номзоднинг синов натижасида олган бабини пасайтиришга йўл қўйилмайди.

92. Апелляция комиссияси апелляция шикояти билан мурожаат қилган номзодга ўз қарорини у қабул қилинган куннинг ўзида маълум қилиши керак.

93. Апелляция комиссиясининг психологик ўрганиш, тест синови, полиграф текширув ва жисмоний тайёргарлик даражасини баҳолаш натижаларига ўзгартириш киритиш ва номзодни Ушбу танлов тадбирларини муваффақиятли топширган деб топиш тўғрисидаги қарори асосида у кейинги босқичга ўтказиш учун тавсия этилади.

94. Апелляция комиссияси қарори устидан номзод юқори турувчи органга ёки судга шикоят қилиши мумкин.

11-боб. Яқуний қоида

95. Мазкур Йўриқнома талабларининг бузилишида айбдор бўлган шахслар қонунчилик ҳужжатларига мувофиқ жавоб беради.

Ўзбекистон Республикаси
ички ишлар вазирининг 2023 йил 2 ноябрдаги
601-сон буйруғига
2-ИЛОВА

**Ўз кучини йўқотган деб топилаётган идоравий
норматив-ҳуқуқий ҳужжатлар
РЎЙХАТИ**

1. Ўзбекистон Республикаси ички ишлар вазирининг 2022 йил 5 мартдаги 52-сон «Ички ишлар органларида хизматга номзодларни танлаб олиш тадбирларини ташкил этиш ва ўтказиш тартиби тўғрисидаги йўриқномани тасдиқлаш ҳақида»ги буйруғи (рўйхат рақами 3352, 2022 йил 9 март) (Қонунчилик маълумотлари миллий базаси, 09.03.2022 й., 10/22/3352/0199-сон).

2. Ўзбекистон Республикаси ички ишлар вазирининг 2022 йил 24 октябрдаги 450-сон «Ички ишлар органларида хизматга номзодларни танлаб олиш тадбирларини ташкил этиш ва ўтказиш тартиби тўғрисидаги йўриқномага ўзгартириш ва қўшимчалар киритиш ҳақида»ги буйруғи (рўйхат рақами 3352-1, 2022 йил 11 ноябрь) (Қонунчилик маълумотлари миллий базаси, 11.11.2022 й., 10/22/3352-1/1013-сон).

ЎЗБЕКИСТОН РЕСПУБЛИКАСИ
ЭКОЛОГИЯ, АТРОФ-МУҲИТНИ МУҲОФАЗА ҚИЛИШ ВА
ИҚЛИМ ЎЗГАРИШИ ВАЗИРЛИГИ
ЎЗБЕКИСТОН РЕСПУБЛИКАСИ
ҚИШЛОҚ ХЎЖАЛИГИ ВАЗИРЛИГИ
ЎЗБЕКИСТОН РЕСПУБЛИКАСИ
ИҚТИСОДИЁТ ВА МОЛИЯ ВАЗИРЛИГИНИНГ
ҚАРОРИ

505 «Бошоқли дон экинлари сомонини ёқиб юборилиши натижасида етказиладиган зарарни аниқлаш ҳамда ушбу ҳолатларни содир этган юридик ва жисмоний шахсларга нисбатан жарималар қўллаш бўйича низомни тасдиқлаш ҳақида»ги қарорга ўзгартиришлар киритиш тўғрисида*

*Ўзбекистон Республикаси Адлия вазирлиги томонидан 2023 йил
7 декабрда рўйхатдан ўтказилди, рўйхат рақами 1647-3*

Ўзбекистон Республикаси Президентининг 2022 йил 21 декабрдаги ПФ–269-сон «Янги Ўзбекистон маъмурий ислохотларини амалга ошириш чора-тадбирлари тўғрисида»ги ва 2023 йил 31 майдаги ПФ–81-сон «Экология ва атроф-муҳитни муҳофаза қилиш соҳасини трансформация қилиш ва ваколатли давлат органи фаолиятини ташкил этиш чора-тадбирлари тўғрисида»ги фармонлари, 2023 йил 31 майдаги ПҚ–171-сон «Экология, атроф-муҳитни муҳофаза қилиш ва иқлим ўзгариши вазирлиги фаолиятини самарали ташкил этиш чора-тадбирлари тўғрисида»ги қарорига мувофиқ Ўзбекистон Республикаси Экология, атроф-муҳитни муҳофаза қилиш ва иқлим ўзгариши вазирлиги, Қишлоқ хўжалиги вазирлиги ҳамда Иқтисодиёт ва молия вазирлиги **қарор қилади:**

1. Ўзбекистон Республикаси Табиатни муҳофаза қилиш давлат қўмитаси, Қишлоқ ва сув хўжалиги вазирлиги, Молия вазирлигининг 2006 йил 27 ноябрдаги 11-1481, 10/8, 91-сон «Бошоқли дон экинлари сомонини ёқиб юборилиши натижасида етказиладиган зарарни аниқлаш ҳамда ушбу ҳолатларни содир этган юридик ва жисмоний шахсларга нисбатан жарималар қўллаш бўйича низомни тасдиқлаш ҳақида»ги қарорига (рўйхат рақами 1647, 2006 йил 25 декабрь) (Ўзбекистон Республикаси қонун ҳужжатлари тўплами, 2006 й., 51-52-сон, 522-модда) иловага мувофиқ ўзгартиришлар киритилсин.

2. Мазкур қарор расмий эълон қилинган кундан эътиборан кучга киради.

**Экология, атроф-муҳитни муҳофаза
қилиш ва иқлим ўзгариши вазири**

А. АБДУХАКИМОВ

Тошкент ш.,
2023 йил 23 ноябрь,
МХ-16-сон

* Ушбу қарор «Қонунчилик маълумотлари миллий базаси»да 2023 йил 11 декабрда эълон қилинган.

Қишлоқ хўжалиги вазири

И. АБДУРАҲМОНОВ

Тошкент ш.,
2023 йил 23 ноябрь,
01/24-09-305-сон

Иқтисодиёт ва молия вазири

Д. КУЧКАРОВ

Тошкент ш.,
2023 йил 23 ноябрь,
88-сон

Ўзбекистон Республикаси
Экология, атроф-муҳитни муҳофаза қилиш
ва иқлим ўзгариши вазирлиги, Қишлоқ
хўжалиги вазирлиги ҳамда Иқтисодиёт ва
молия вазирлигининг 2023 йил 23 ноябрдаги
МХ-16, 01/24-09-305 ва 88-сон қарорига
ИЛОВА

**«Бошоқли дон экинлари сомонини ёқиб юборилиши натижасида
етказиладиган зарарни аниқлаш ҳамда ушбу ҳолатларни содир
этган юридик ва жисмоний шахсларга нисбатан жарималар
қўллаш бўйича низомни тасдиқлаш ҳақида»ги қарорга
киритилаётган ўзгартиришлар**

1. Қарор муқаддимасидан «ва 2006 йил 17 майдаги «2006 йил бошоқли дон экинлари ҳосилини йиғиштириб олишга доир ташкилий чора-тадбирлар тўғрисида»ги ПҚ–351-сон қарорининг 4-банди» деган сўзлар чиқариб ташлансин.

2. Низомда:

а) Муқаддимадан «Ўзбекистон Республикасининг «Табиатни муҳофаза қилиш тўғрисида»ги Қонуни, Ўзбекистон Республикаси Президентининг 2005 йил 16 майдаги «2005 йил бошоқли дон экинлари ҳосилини йиғиштириб олишга доир ташкилий чора-тадбирлар тўғрисида»ги ПҚ–76-сон ва 2006 йил 17 майдаги «2006 йил бошоқли дон экинлари ҳосилини йиғиштириб олишга доир ташкилий чора-тадбирлар тўғрисида»ги ПҚ–351-сон қарорларининг 4-бандларига мувофиқ,» деган сўзлар чиқариб ташлансин;

б) 6-банднинг ўн олтинчи хатбошисидаги «Молия вазирлиги» деган сўзлар «Иқтисодиёт ва молия вазирлиги» деган сўзлар билан алмаштирилсин;

в) 7 ва 8-бандлардаги «Экология ва атроф-муҳитни муҳофаза қилиш давлат қўмитаси» деган сўзлар «Экология, атроф-муҳитни муҳофаза қилиш ва иқлим ўзгариши вазирлиги» деган сўзлар билан алмаштирилсин;

г) 9-бандда:

«а» ва «б» кичик бандлардан «, атроф-муҳитни муҳофаза қилиш ва чиқиндилар билан боғлиқ ишларни амалга ошириш» деган сўзлар чиқариб ташлансин;

тўртинчи хатбошидаги «Экология ва атроф-муҳитни муҳофаза қилиш давлат қўмитаси ҳузуридаги Экология, атроф-муҳитни муҳофаза қилиш ва чиқиндилар билан боғлиқ ишларни амалга ошириш» деган сўзлар «Экология, атроф-муҳитни муҳофаза қилиш ва иқлим ўзгариши вазирлиги ҳузуридаги Экология» деган сўзлар билан алмаштирилсин.

ЎЗБЕКИСТОН РЕСПУБЛИКАСИ
ИҚТИСОДИЁТ ВА МОЛИЯ ВАЗИРИНИНГ
БУЙРУҒИ

506 «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномани тасдиқлаш ҳақида»ги буйруқ, шунингдек унга ўзгартириш ва қўшимчаларни ўз кучини йўқотган деб топиш тўғрисида*

*Ўзбекистон Республикаси Адлия вазирлиги томонидан 2023 йил
7 декабрда рўйхатдан ўтказилди, рўйхат рақами 2282-9*

Ўзбекистон Республикаси Вазирлар Маҳкамасининг 2023 йил 19 сентябрдаги 481-сон «Вазирлар Маҳкамасининг «Давлат пенсияларини тайинлаш ва тўлаш тартиби тўғрисидаги низомни тасдиқлаш ҳақида» 2022 йил 13 октябрдаги 592-сон қарорига фуқароларнинг пенсия таъминотига оид миллий қонунчилик ҳужжатларини тизимлаштириш, соҳага замонавий ахборот технологияларини янада кенг жорий этишга қаратилган ўзгартириш ва қўшимчалар киритиш, шунингдек, Ҳукуматнинг айрим қарорларини ўз кучини йўқотган деб ҳисоблаш тўғрисида»ги қарорига мувофиқ **буюраман:**

1. Айрим идоравий норматив-ҳуқуқий ҳужжатлар иловага мувофиқ ўз кучини йўқотган деб топилсин.

2. Мазкур буйруқ расмий эълон қилинган кундан эътиборан кучга киради.

Вазир

Д. КУЧКАРОВ

Тошкент ш.,
2023 йил 13 ноябрь,
84-сон

* Ушбу буйруқ «Қонунчилик маълумотлари миллий базаси»да 2023 йил 11 декабрда эълон қилинган.

Ўзбекистон Республикаси
иқтисодиёт ва молия вазирининг 2023 йил
13 ноябрдаги 84-сон буйруғига
ИЛОВА

**Ўз кучини йўқотган деб топилаётган идоравий
норматив-ҳуқуқий ҳужжатлар
РЎЙХАТИ**

1. Ўзбекистон Республикаси молия вазирининг 2011 йил 14 октябрдаги 63-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномани тасдиқлаш ҳақида»ги буйруғи (рўйхат рақами 2282, 2011 йил 27 ноябрь) (Ўзбекистон Республикаси қонун ҳужжатлари тўплами, 2011 й., 45-46-сон, 483-модда).

2. Ўзбекистон Республикаси молия вазирининг 2012 йил 23 августдаги 61-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномага ўзгартириш киритиш ҳақида»ги буйруғи (рўйхат рақами 2282-1, 2012 йил 5 сентябрь) (Ўзбекистон Республикаси қонун ҳужжатлари тўплами, 2012 й., 36-сон, 417-модда).

3. Ўзбекистон Республикаси молия вазирининг 2014 йил 24 июндаги 45-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномага ўзгартириш ва қўшимчалар киритиш ҳақида»ги буйруғи (рўйхат рақами 2282-2, 2014 йил 8 июль) (Ўзбекистон Республикаси қонун ҳужжатлари тўплами, 2014 й., 28-сон, 347-модда).

4. Ўзбекистон Республикаси молия вазирининг 2014 йил 10 декабрдаги 82-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқноманинг 51-бандига ўзгартириш киритиш ҳақида»ги буйруғи (рўйхат рақами 2282-3, 2014 йил 15 декабрь) (Ўзбекистон Республикаси қонун ҳужжатлари тўплами, 2014 й., 51-сон, 615-модда).

5. Ўзбекистон Республикаси молия вазирининг 2016 йил 11 майдаги 28-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномага ўзгартириш ва қўшимчалар киритиш ҳақида»ги буйруғи (рўйхат рақами 2282-4, 2016 йил 6 июнь) (Ўзбекистон Республикаси қонун ҳужжатлари тўплами, 2016 й., 23-сон, 270-модда).

6. Ўзбекистон Республикаси молия вазирининг 2017 йил 19 июлдаги 108-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқноманинг 48-бандига ўзгартириш киритиш ҳақида»ги буйруғи (рўйхат рақами 2282-5, 2017 йил 26 июль) (Ўзбекистон Республикаси қонун ҳужжатлари тўплами, 2017 й., 30-сон, 751-модда).

7. Ўзбекистон Республикаси молия вазирининг 2019 йил 29 майдаги

67-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномага ўзгартириш ва қўшимчалар киритиш ҳақида»ги буйруғи (рўйхат рақами 2282-6, 2019 йил 17 июнь) (Қонун ҳужжатлари маълумотлари миллий базаси, 17.06.2019 й., 10/19/2282-6/3292-сон).

8. Ўзбекистон Республикаси молия вазирининг 2019 йил 16 сентябрдаги 99-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномага ўзгартиришлар ва қўшимча киритиш ҳақида»ги буйруғи (рўйхат рақами 2282-7, 2019 йил 3 октябрь) (Қонун ҳужжатлари маълумотлари миллий базаси, 03.10.2019 й., 10/19/2282-7/3850-сон).

9. Ўзбекистон Республикаси молия вазирининг 2020 йил 20 мартдаги 12-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномага ўзгартириш ва қўшимчалар киритиш ҳақида»ги буйруғи (рўйхат рақами 2282-8, 2020 йил 20 апрель) (Қонун ҳужжатлари маълумотлари миллий базаси, 20.04.2020 й., 10/20/2282-8/0478-сон).

ЎЗБЕКИСТОН РЕСПУБЛИКАСИ АДЛИЯ ВАЗИРИНИНГ
БУЙРУҒИ

507 Товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш учун талабномаларни тузиш, топшириш ва кўриб чиқиш қоидаларини тасдиқлаш тўғрисида*

*Ўзбекистон Республикаси Адлия вазирлиги томонидан 2023 йил
7 декабрда рўйхатдан ўтказилди, рўйхат рақами 3482*

Ўзбекистон Республикасининг «Товар белгилари, хизмат кўрсатиш белгилари ва товар келиб чиққан жой номлари тўғрисида»ги Қонунига мувофиқ **буюраман:**

1. Товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш учун талабномаларни тузиш, топшириш ва кўриб чиқиш қоидалари 1-иловага мувофиқ тасдиқлансин.

2. Айрим идоравий норматив-ҳуқуқий ҳужжатлар 2-иловага мувофиқ ўз кучини йўқотган деб топилсин.

3. Ушбу буйруқ расмий эълон қилинган кундан эътиборан кучга киради.

Вазир

А. ТАШКУЛОВ

Тошкент ш.,
2023 йил 7 декабрь,
21-мҳ-сон

* Ушбу буйруқ «Қонунчилик маълумотлари миллий базаси»да 2023 йил 11 декабрда эълон қилинган.

Ўзбекистон Республикаси
адлия вазирининг 2023 йил 7 декабрдаги
21-мх-сон буйруғига
1-ИЛОВА

**Товар келиб чиққан жой номини ва товар келиб чиққан жой
номидан фойдаланиш ҳуқуқини рўйхатдан ўтказиш учун
талабномаларни тузиш, топшириш ва кўриб чиқиш
ҚОИДАЛАРИ**

Мазкур Қоидалар товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш учун талабномаларни тузиш, топшириш ва кўриб чиқиш тартибини белгилайди.

1-боб. Умумий қоидалар

1. Мазкур Қоидаларда қуйидаги тушунчалар қўлланилади:

Қонун — Ўзбекистон Республикасининг «Товар белгилари, хизмат кўрсатиш белгилари ва товар келиб чиққан жой номлари тўғрисида»ги Қонуни;

Вазирлик — Ўзбекистон Республикаси Адлия вазирлиги;

Давлат муассасаси — Ўзбекистон Республикаси Адлия вазирлиги ҳузуридаги «Интеллектуал мулк маркази» давлат муассасаси;

талабнома — товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш учун талабнома, шунингдек аввал рўйхатдан ўтказилган товар келиб чиққан жой номидан фойдаланиш ҳуқуқини бериш учун талабнома;

товар келиб чиққан жой номи — мамлакат, аҳоли пункти, жой ёки бошқа жўғрофий объектнинг (бундан буён матнда жўғрофий объект деб юритилади) товарни белгилаш учун ишлатиладиган, унинг алоҳида хусусиятлари тамомила ёки асосан мазкур жўғрофий объектга хос табиий шароитлар билан ёки бошқа омиллар ёхуд табиий шароитлар ва ушбу омилларнинг бирикмаси билан белгиланадиган номи;

Реестр — Товар келиб чиққан жой номлари давлат реестри.

**2-боб. Товар келиб чиққан жой номини ва товар келиб
чиққан жой номидан фойдаланиш ҳуқуқини рўйхатдан ўтказиш
учун талабномаларни тузиш ва топшириш**

1-§. Талабнома

2. Товар келиб чиққан жой номи сифатида рўйхатга олинадиган белги жўғрофий объектнинг замонавий номи, ушбу объектнинг тарихий номи ёки улардан келиб чиққан ном бўлиши мумкин.

Товар келиб чиққан жой номи сифатида рўйхатга олинадиган белги қўшимча равишда товарнинг турига оид белгини кўрсатиб туриши мумкин.

3. Товар келиб чиққан жой номи сифатида рўйхатга олинадиган белгилар, агар уларнинг алоҳида хусусиятлари тамомила ёки асосан мазкур

жўғрофий объектга хос табиий шароитлар билан ёки бошқа омиллар ёхуд табиий шароитлар ва ушбу омилларнинг бирикмаси билан белгиланадиган товарни англатиш учун ишлатилса, товар келиб чиққан жой номи сифатида рўйхатдан ўтказилиши мумкин.

4. Қонуннинг 11-моддасига мувофиқ қўйидаги белгилар товар келиб чиққан жой номи сифатида рўйхатдан ўтказилиши мумкин эмас:

а) товар келиб чиққан жой хусусида истёъмолчини чалғитиб қўядиган жўғрофий ном бўлган белгилар;

б) товар келиб чиққан ҳақиқий жойни расман кўрсатувчи, лекин товар бошқа ҳудудда чиқарилаётганлиги ҳақида янглиш тасаввур берувчи белгилар;

в) товар тайёрланган жой номи билан боғлиқ бўлмаган жўғрофий номни англатувчи ва Ўзбекистон Республикасида муайян турдаги товар белгиси сифатида умум фойдаланишда бўлган белгилар;

г) шу турдаги товарга нисбатан товар келиб чиққан жой номи ёки географик кўрсаткич сифатида рўйхатдан ўтказилган белгилар.

5. Қонуннинг 8-моддаси биринчи қисмига мувофиқ талабномаларнинг қўйидаги турлари мавжуд:

а) товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш учун талабнома;

б) аввал рўйхатдан ўтказилган товар келиб чиққан жой номидан фойдаланиш ҳуқуқини бериш учун талабнома.

6. Қонуннинг 9-моддаси биринчи қисмига мувофиқ товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш учун бериладиган талабнома бир товар келиб чиққан бир жой номига тааллуқли бўлиши лозим.

7. Талабнома қўйидагиларни ўз ичига олиши керак:

а) товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш ҳақидаги ариза (бундан буён матнда ариза деб юритилади);

б) талабномада кўрсатилган белги;

в) товар ишлаб чиқарилган жойни жўғрофий объект чегарасида кўрсатган ҳолда товар келиб чиққан жой номини ёки товар келиб чиққан жой номидан фойдаланиш ҳуқуқини рўйхатдан ўтказиш ёхуд аввал рўйхатдан ўтказилган товар келиб чиққан жой номидан фойдаланиш ҳуқуқини бериш сўралаётган товар турининг номи ҳамда унинг алоҳида хусусиятлари тавсифи.

8. Талабномага қўйидагилар илова қилиниши керак:

а) талабнома патент вакили орқали берилган тақдирда талабнома берувчининг ишончномаси;

б) талабнома берувчининг зикр этилган жўғрофий объектда жойлашганлигини ва алоҳида хусусиятлари мазкур жўғрофий объектга хос табиий шароитлар ёки бошқа омиллар билан ёхуд табиий шароитлар ва ушбу омилларнинг бирикмаси билан боғлиқ товар ишлаб чиқаришини тасдиқловчи ҳужжатлар;

в) чет эллик талабнома берувчининг товар келиб чиққан жойнинг талабномада фойдаланган номидан товар келиб чиққан мамлакатда фойдаланиш ҳуқуқини тасдиқловчи ҳужжат.

9. Талабнома берганлик учун Ўзбекистон Республикасининг «Давлат божи тўғрисида»ги Қонунда белгиланган миқдорда патент божи тўланади.

Бунда, Ўзбекистон Республикаси жисмоний ва юридик шахслари томонидан патент божи тўланганлиги қўшимча ҳужжат талаб қилмасдан Вазирлик томонидан ахборот тизимлари орқали мустақил равишда текширилади.

Чет эл юридик ва жисмоний шахслари томонидан талабномага белгиланган миқдорда патент божи тўланганлиги тўғрисидаги тўлов ҳужжати илова қилинади.

2-§. Талабноманинг таркиби

10. Товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш учун талабнома ушбу Қоидаларнинг 1-илласида* келтирилган шаклга мувофиқ топширилади.

Аввал рўйхатдан ўтказилган товар келиб чиққан жой номидан фойдаланиш ҳуқуқини бериш учун талабнома мазкур Қоидаларнинг 2-илласида* келтирилган шаклга мувофиқ топширилади.

Талабнома Вазирликка келиб тушгандан кейин реквизитлар киритилиши учун «Талабнома» сўзидан юқорида жойлашган графалар талабнома берувчи томонидан тўлдирилмайди.

Агар маълумотлар кўплиги сабабли, уларни тегишли графаларда тўлиқ жойлаштириш имкони бўлмаса, улар ўша шакл бўйича қўшимча варақда келтирилади ва талабноманинг тегишли графасида «давоми қўшимча варақда» деб кўрсатилади.

11. «Талабнома берувчи» графасида талабнома берувчи (талабнома берувчилар) тўғрисидаги маълумотлар (юридик шахснинг тўлиқ номи ёки жисмоний шахснинг фамилияси, исми ва отасининг исми) келтирилади, бунда фамилия исмдан аввал кўрсатилади. Талабнома берувчининг номи давлат тилида кўрсатилади.

Шунингдек, талабномада талабнома берувчининг почта манзили, шу жумладан мамлакатнинг расмий номи, телефон ва факс рақамлари ҳамда электрон почта манзили (агар мавжуд бўлса) кўрсатилади.

12. Ўз номларига товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш ва/ёки товар келиб чиққан жой номидан фойдаланиш ҳуқуқини бериш сўралаётган Ўзбекистон Республикаси ташкилотлари учун Корхона ва ташкилотнинг умумдавлат таснифи коди (КТУТ коди) (агар мавжуд бўлса) кўрсатилади. Агар бундай код мавжуд бўлмаса, талабноманинг тегишли жойида «мавжуд эмас» деб кўрсатилади.

13. Ўз номларига товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш ва/ёки товар келиб

* 1-2-илловалар «Қонунчилик маълумотлари миллий базаси»да эълон қилинган.

чиққан жой номидан фойдаланиш ҳуқуқини бериш сўралаётган Ўзбекистон Республикаси ҳудудидан ташқарида яшайдиган (жойлашган) чет эл жисмоний (юридик) шахслари учун Бутунжаҳон интеллектуал мулк ташкилотининг (БИМТ) ST.3 стандарти бўйича мамлакат коди кўрсатилади (агар мавжуд бўлса).

14. «Ёзишмалар олиб бориш учун манзил» графасида ёзишмалар олиб бориш учун почта индекси кўрсатилган манзил, хат олувчининг исми ёки номи, телефон, факс рақамлари ва электрон почта манзили (агар мавжуд бўлса) кўрсатилади. Ёзишмалар олиб бориш учун манзил сифатида Ўзбекистон Республикасида доимий яшовчи талабнома берувчи-жисмоний шахснинг яшаш манзили, Ўзбекистон Республикасида жойлашган талабнома берувчи-юридик шахснинг жойлашган жойи ёхуд Вазирликда рўйхатдан ўтказилган патент вакилининг манзили кўрсатилиши мумкин.

15. «Патент вакили» графаси талабнома берувчи томонидан патент вакили тайинланган ҳолда тўлдирилади ва у ҳақидаги маълумотлар (фамилияси, исми, отасининг исми, Вазирликда рўйхатдан ўтказилган рақами) келтирилади.

«Патент вакилининг манзили» графасида патент вакилининг почта индекси кўрсатилган манзили, телефон, факс рақамлари ва электрон почта манзили (агар мавжуд бўлса) келтирилади.

16. «Талабнома берилган белги» графасида талабнома берилган белги одатдаги шрифтда ёзилган ҳолда келтирилади.

17. «Товар тури ёки муайян товар» графасида Қонуннинг 9-моддаси иккинчи қисми бешинчи хатбошисига мувофиқ товар келиб чиққан жой номи учун мўлжалланган товар (товарлар) кўрсатилиши керак. Бунда, алоҳида хусусиятларга жўғрофий объектнинг (тамомила ёки асосан) табиий шароитлари ва/ёки бошқа омиллари асосида эга бўлган, ҳақиқатда ишлаб чиқарилаётган товарларгина кўрсатилиши лозим.

18. Қонуннинг 9-моддаси иккинчи қисми бешинчи хатбошисига мувофиқ тақдим этилаётган тавсифда белгиси рўйхатдан ўтказилаётган товарнинг ўзига айнан ўхшаш товарлардан фарқлайдиган алоҳида хусусиятлари рўйхати келтирилади. Бунда, товарнинг алоҳида хусусиятлари ушбу жўғрофий объект учун хос бўлган табиий шароитлар ва/ёки бошқа омилларга боғлиқ эканлиги англашилиши керак.

Товарнинг хусусиятлари умум қабул қилинган махсус терминологияга мувофиқ аниқ ва равшан таърифланиши лозим.

Тавсиф ахборот кўринишида бўлиши, хусусан ушбу жўғрофий объектда хом ашёнинг, тегишли иқлим, геологик ёки бошқа табиий шароитларнинг ҳамда товарни анъанавий усулда тайёрлай оладиган одамларнинг (жамоанинг) мавжудлигини кўрсатиши лозим.

19. Маъданли сувнинг алоҳида хусусиятларини тавсифлашда ушбу Қоидаларнинг 8-банди «б» кичик бандида кўрсатилган ҳужжатларда товарнинг ўзига хослигини ҳисобга олган ҳолда қуйидаги маълумотлар бўлиши керак:

а) органолептик хусусиятлари (таъми, ранги, хиди ёки ушбу хусусиятларнинг мавжуд эмаслиги);

б) ион таркибининг қисқача таърифи («дан» «гача» оралиғида берилиши зарур);

в) маъданлашганлиги;

г) газ таркиби, микроэлементлар, радиоактив элементлар, органик моддалар, фаол реакциянинг ва оксидланиш-қайтарилиш потенциалининг таърифи;

д) бальнеологик хусусиятлари.

20. Талабномада товар ишлаб чиқарилаётган жой кўрсатилиши лозим. Товар ишлаб чиқарилаётган жой жўғрофий объектнинг чегараларини кўрсатиш йўли билан тавсифланиши мумкин. Жўғрофий объектнинг чегаралари координаталар, жойнинг табиий чегаралари — дарёлар, тоғлар, қўллар кўрсатилган ҳолда, маъмурий чегаралар, кўп йиллик иншоотлар, коммуникациялар ёрдамида тавсифланиши мумкин.

21. «Илова қилинадиган ҳужжатлар рўйхати» графаси тегишли катакчаларда «Х» белгисини қўйиб чиқиш орқали ва илова қилинаётган ҳужжатлардаги варақлар сони кўрсатилган ҳолда тўлдирилади. Талабнома шаклида кўзда тутилмаган ҳужжатлар илова қилинганда, уларнинг аниқ мақсади «бошқа ҳужжат» ўрнида кўрсатилади.

22. Қонуннинг 9-моддаси учинчи қисми тўртинчи хатбошисига мувофиқ талабномага илова қилинадиган ҳужжатларда талабнома берувчи кўрсатилган жўғрофий объектда жойлашганлиги, шунингдек алоҳида хусусиятлари тамомила ёки асосан мазкур жўғрофий объектга хос табиий шароитлар билан ёки бошқа омиллар ёхуд табиий шароитлар ва ушбу омилларнинг бирикмаси билан белгиланадиган товар ишлаб чиқараётганлиги тасдиқланган бўлиши керак. Бунда, ушбу ҳужжатлар товарни тайёрловчининг номи товарни белгилаш учун қўлланган жўғрофий объектнинг чегараларида жойлашганини тасдиқлайдиган ташкилот томонидан тақдим этилиши лозим.

Бунда, мазкур ҳужжатлар битта ёки бир нечта ташкилотлар томонидан тақдим этилиши мумкин (масалан, талабнома берувчининг яшаш ёки жойлашган жойи, шунингдек ваколатли давлат органининг товар ишлаб чиқариш чегаралари ҳақидаги ҳулосаси ёки товарнинг алоҳида хусусиятлари ҳақида бошқа ташкилотларнинг ҳулосалари).

23. Қонуннинг 9-моддаси учинчи қисми бешинчи хатбошисига мувофиқ хорижий талабнома берувчининг талабнома берилган товар келиб чиққан жой номига бўлган ҳуқуқини тасдиқлайдиган ҳужжат сифатида товар келиб чиққан мамлакатнинг ваколатли давлат органи томонидан берилган, товар келиб чиққан жой номидан фойдаланиш ҳуқуқини тасдиқловчи ҳужжат мазкур Қоидаларнинг 25-банди талабларини инобатга олган ҳолда тақдим қилиниши мумкин.

24. Талабноманинг «Имзо» графасини имзо қўйилган сана кўрсатилган ҳолда тўлдириш мажбурийдир.

Талабнома талабнома берувчи томонидан имзоланади. Юридик шахс номидан талабнома ташкилот раҳбари томонидан унинг лавозими кўрсатилган ҳолда имзоланади.

Талабнома патент вакили орқали берилганда, талабнома патент вакили томонидан имзоланади.

Имзо имзоловчи шахснинг фамилияси, исми, отасининг исми кўрсатилган ҳолда очиб берилади.

Талабномада қўшимча варақлар мавжуд бўлса, улар ҳам худди шу тартибда имзоланади.

3-§. Хужжатларни тақдим этиш

25. Талабнома берилган белгини рўйхатдан ўтказиш ҳақидаги ариза давлат тилида тақдим этилади.

Агар талабнома хужжатлари хорижий тилда тақдим этилган бўлса, талабномага уларнинг давлат тилидаги таржимаси, талабнома берувчи ёки патент вакилининг имзоси билан тасдиқланган ҳолда илова қилинади.

Агар хорижий тилдаги талабнома хужжатларига уларнинг таржимаси илова қилинмасдан тақдим этилган бўлса, таржима кейинчалик тақдим этилиши мумкин.

Бунда, хорижий тилда топширилган хужжатлар, агар уларнинг таржималари ушбу хорижий тилдаги хужжатлар келиб тушган санадан бошлаб икки ой ичида тақдим қилинса, хужжатлар Вазирликка келиб тушган санадан бошлаб топширилган деб ҳисобланади, акс ҳолда хужжатлар, уларнинг таржималари келиб тушган санадан бошлаб топширилган деб ҳисобланади.

4-§. Талабномани топшириш

26. Талабнома юридик ва жисмоний шахслар — талабнома берувчилар томонидан Вазирликка ахборот тизими орқали топширилади.

27. Номи товар келиб чиққан жой номи сифатида фойдаланилаётган жўғрофий объектда жойлашган юридик ва жисмоний шахслар, агар улар томонидан ишлаб чиқарилаётган товарлар Қонуннинг 5-моддаси талабларига мувофиқ бўлса, улар Қонуннинг 6-моддаси иккинчи, учинчи ва тўртинчи қисмларига биноан товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш учун талабнома топширишлари мумкин.

28. Талабнома бевосита талабнома берувчи томонидан ёки Вазирликда рўйхатдан ўтган патент вакили орқали топширилиши мумкин.

Ўзбекистон Республикасидан ташқарида доимий яшовчи жисмоний шахслар ёки чет эллик юридик шахслар ёхуд уларнинг патент вакиллари товар келиб чиққан жой номларини ва товар келиб чиққан жой номларидан фойдаланиш ҳуқуқини рўйхатдан ўтказиш ишларини юритишни ҳамда бу ишлар билан боғлиқ юридик аҳамиятга молик ҳаракатларни Вазирликда рўйхатдан ўтган патент вакиллари орқали амалга оширадilar.

Патент вакили орқали топширилаётган талабномага талабнома берувчи томонидан берилган ва унинг ваколатларини тасдиқлайдиган ишончнома ёхуд ишончноманинг қонунчилик хужжатларига мувофиқ расмийлаштирилган нусхаси илова қилинади.

Вазирлик ва Давлат муассасаси олдида вакиллик қилиш учун Ўзбекис-

тон Республикасида расмийлаштириладиган ишончнома оддий ёзма шаклда тузилади ва нотариал тарзда тасдиқланиши талаб этилмайди.

Ишончнома талабнома билан бир вақтда ёки талабнома келиб тушган санадан бошлаб икки ойдан кечиктирмай тақдим этилади.

Ўзбекистон Республикасидан ташқарида яшайдиган жисмоний шахсга ёки чет эл юридик шахсига вакиллик қилиш учун Вазирликда рўйхатдан ўтказилган патент вакилига ушбу жисмоний ёки юридик шахснинг ўзи томонидан ёхуд уларнинг патент вакили томонидан ишончнома ёки ишончноманинг қонунчилик ҳужжатларига мувофиқ расмийлаштирилган нусхаси берилиши мумкин.

Агар ишончнома Вазирликда рўйхатдан ўтказилган бир нечта патент вакиллари номига берилган бўлса, у ҳолда талабнома бўйича товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказишга оид ишлар ушбу патент вакилларининг исталган биттаси томонидан олиб борилиши мумкин.

Патент вакилининг ҳар бир ҳаракати талабнома берувчининг ҳаракати сифатида баҳоланади.

3-боб. Товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш ва аввал рўйхатдан ўтказилган товар келиб чиққан жой номидан фойдаланиш ҳуқуқини бериш бўйича ишларни олиб бориш

1-§. Вакил тайинлаш

29. Талабнома топширилгандан кейин у бўйича ишларни олиб бориш ва талабномани кўриб чиқиш давомида ўз манфаатларини ҳимоя қилиш учун талабнома берувчи ишончнома берган ҳолда вакил тайинлаши мумкин.

Вазирликда рўйхатдан ўтказилган патент вакиллари юридик ва жисмоний шахсларнинг, шу жумладан Ўзбекистон Республикасидан ташқарида яшайдиган жисмоний шахслар ёки чет эл юридик шахсларининг вакили бўлиши мумкин.

30. Вакиллик қилиш учун ишончнома талабнома топшириладиган вақтда ёки иш юритиш давомида тақдим этилиши мумкин. Ишончнома талабнома ҳужжатларига қўшиб қўйилади.

31. Вакилнинг ишончнома топширилгунга қадар амалга оширган ҳаракатлари ҳақиқий эмас деб ҳисобланади ва экспертиза жараёнида инobatга олинмайди. Вакилнинг унга тақдим этилган ваколатлари доирасидаги ҳар қандай ҳаракати ёки Давлат муассасасининг унга нисбатан ҳар қандай ҳаракати талабнома берувчининг ҳаракати ёки талабнома берувчига нисбатан ҳаракат сифатида баҳоланади.

32. Вакил ишончномада кўрсатилган ваколатларидан ишончноманинг амал қилиш муддати тугагунга қадар фойдаланади. Ишончномада кўрсатилган ваколатларни муддатидан аввал тўхтатиш талабнома берувчи томонидан Вазирликка тегишли ариза бериш (ишончномани чақириб олиш) йўли билан амалга оширилиши мумкин.

2-§. Вазирлик ва Давлат муассасаси билан ёзишмалар олиб бориш

33. Ёзишмалар талабнома берувчи ёки унинг вакили томонидан ҳар бир талабнома бўйича алоҳида олиб борилади.

Талабнома топширилгандан кейин тақдим этиладиган материалларда талабнома рақами кўрсатилиши ва уларда талабнома берувчи ёки унинг вакилининг имзоси бўлиши шарт. Талабнома рақами кўрсатилмаган материаллар кўриб чиқилмасдан қайтариб юборилади.

34. Вазирлик ва Давлат муассасаси билан ёзишмалар давлат тилида олиб борилади. Талабнома берувчи томонидан хорижий тилда тақдим этилган ҳужжатларга уларнинг давлат тилидаги таржимаси талабнома берувчи ёки патент вакилининг имзоси билан тасдиқланган ҳолда илова қилинади.

3-§. Муддатлар

35. Йилларда ифодаланган ҳар қандай муддат кейинги келадиган йилда, муддатни ҳисоблаш бошланган ой номи ва кун рақами қандай бўлса, худди шу номли ойда ва ўша кунда тугайди, бунда агар кейинги тегишли ой ўша рақамли кунга эга бўлмаса, муддат ушбу ойнинг охириг кунда тугайди.

36. Ойларда ифодаланган ҳар қандай муддат кейинги келадиган ойда ва муддатни ҳисоблаш бошланган кун рақами нечанчи бўлса, ўша кунда тугайди, бунда агар тегишли ой ўша рақамли кунга эга бўлмаса, муддат ушбу ойнинг охириг кунда тугайди.

37. Кунларда ифодаланган ҳар қандай муддат кўриб чиқиладиган куннинг кейингисидан ҳисобланиб, сўнгги куннинг охирида тугайди.

38. Агар Вазирлик ва Давлат муассасасига хат-ҳужжатлар келиб тушиши учун ёки патент божи тўланиши учун белгиланган муддатнинг охириг кун иш кун бўлмаган кунга тўғри келса, ушбу муддат кейинги иш кунигача узайтирилади.

4-§. Талабнома ҳужжатларига ўзгартиришлар киритиш

39. Талабнома берувчи ўз ташаббусига кўра талабнома экспертизаси ўтказиладиган даврда қарор қабул қилингунга қадар талабнома ҳужжатларига ўзгартиришлар (қўшимчалар, тузатишлар ва аниқликлар) киритиши мумкин.

Талабнома ҳужжатларига ўзгартиришлар (қўшимчалар, тузатишлар ва аниқликлар) киритиш талабнома берувчи томонидан мазкур Қоидаларнинг 3 ва 4-иловаларида* келтирилган шаклларга мувофиқ тегишли аризани ахборот тизими орқали Вазирликка топшириш йўли билан амалга оширилади.

Талабнома берувчи-юримдик шахснинг номи ёки талабнома берувчи-жисмоний шахснинг фамилияси, исми, отасининг исми ўзгарган тақдирда, Вазирликка ушбу ўзгаришларни тасдиқлайдиган ҳужжат тақдим этилиши керак.

40. Талабнома берувчи аризани кўриб чиқиш натижалари тўғрисида ариза келиб тушган кундан бошлаб 10 кун ичида хабардор қилинади.

* 3-4-иловалар «Қонунчилик маълумотлари миллий базаси»да эълон қилинган.

41. Талабнома ҳужжатларига ўзгартиришлар (қўшимчалар, тузатишлар ва аниқликлар) киритиш ҳақидаги аризани кўриб чиққанлик учун Ўзбекистон Республикасининг «Давлат божи тўғрисида»ги Қонунида белгиланган миқдорда патент божи тўланади. Белгиланган миқдордаги давлат божи тўланмаган тақдирда юридик аҳамиятга молик ҳаракатлар амалга оширилмай турилади ва бу ҳақда талабнома берувчига билдиришнома юборилади.

Бунда, талабнома берувчи ўзига Давлат муассасаси томонидан билдиришнома юборилган санадан бошлаб уч ой мобайнида давлат божининг етмаётган қисмини тўлаши мумкин.

42. Талабнома берувчи томонидан тақдим этилган қўшимча ҳужжатлар мазкур Қоидаларнинг 94 — 97-бандларига мувофиқ кўриб чиқилади.

5-§. Талабнома материаллари билан танишиш

43. Талабнома берувчи (ёки унинг вакили) топширилган талабнома ва унга оид ҳужжатлар билан олдиндан Давлат муассасаси билан куни ва соатини келишган ҳолда бевосита Давлат муассасасининг ўзида ёки талабнома ҳужжатларининг ёхуд уларнинг бирор қисмининг нусхасини сўраб олиш йўли билан танишиши мумкин.

44. Тергов учун зарур бўлган ҳолларда талабнома ҳужжатлари ҳуқуқни муҳофаза қилувчи органларга танишиш учун бепул тақдим этилади.

6-§. Талабномани кўриб чиқиш жараёнида экспертиза ҳужжатлари билан танишиш

45. Талабнома берувчи экспертиза ўтказиш жараёнидаги ҳужжатлар билан танишиш ҳуқуқига эга.

46. Талабнома берувчига у томонидан сўралган экспертиза ўтказиш жараёнидаги ҳужжатларнинг нусхалари юборилади.

7-§. Талабномани талабнома берувчининг иштирокида кўриб чиқиш

47. Талабнома билан боғлиқ масалалар, жумладан, талабнома берилган белги, у билан белгиланиши мўлжалланган товар, товарнинг алоҳида хусусиятлари ҳамда унинг жўғрофий объект табиий шароитлари ёки бошқа омиллари ёхуд бир вақтнинг ўзида табиий шароитлар ва бошқа омилларга боғлиқлиги бўйича қўшимча тушунтиришлар олиш ва талабнома берилган белгининг муҳофаза қилишга яроқлилиги, товар келиб чиққан жой номини ва ундан фойдаланиш ҳуқуқини рўйхатдан ўтказиш ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш имконияти бўйича экспертизанинг ва талабнома берувчининг позициясини аниқлаш мақсадида талабнома берувчи (ёки унинг вакили) иштирокида кўриб чиқилади.

48. Талабнома Давлат муассасасининг таклифига ёки талабнома берувчининг илтимосига кўра талабнома берувчининг иштирокида кўриб чиқилади.

Бунда, талабнома бўйича экспертизанинг саволлари Давлат муассасасининг таклифида, талабнома берувчининг саволлари эса унинг илтимосномасида баён қилиниши мумкин.

49. Талабномани талабнома берувчининг иштирокида кўриб чиқиш сана-си ва вақти олдиндан келишиб олинади. Бунда, талабнома берувчи белгиланган вақтда талабномани кўриб чиқишда қатнаша олмаслиги маълум бўлса, дарҳол Давлат муассасасини бу ҳақда хабардор қилади.

Талабнома берувчининг вакили ушбу Қоидаларнинг 28 — 32-бандларида белгиланган талаблар бажарилган тақдирда талабномани кўриб чиқишда иштирок этиши мумкин.

8-§. Талабнома берувчи томонидан қўшимча ҳужжатларни тақдим этиш муддатини узайтириш

50. Давлат муассасасининг сўровномасига кўра талабнома берувчи томонидан қўшимча ҳужжатлар, унга сўровнома юборилган санадан эътиборан уч ой ичида Давлат муассасасига тақдим этилиши лозим. Бунда, ҳужжатларни тақдим этиш муддати талабнома берувчининг ёзма илтимосномасига кўра узайтирилиши мумкин.

51. Талабнома берувчининг муддатни узайтириш тўғрисидаги илтимосномасини кўриб чиққанлик учун Ўзбекистон Республикасининг «Давлат божи тўғрисида»ги Қонунида белгиланган миқдорда патент божи тўланади.

52. Талабнома берувчининг муддатни узайтириш ҳақидаги илтимосномаси талабнома берувчига Давлат муассасаси томонидан сўровнома юборилган санадан эътиборан уч ой ичида Давлат муассасасига топширилиши керак.

53. Давлат муассасаси томонидан талабнома берувчига сўровнома асосида сўралган ҳужжатларни тақдим этиш муддати узайтирилганлиги тўғрисида билдиришнома юборилади.

54. Агар талабнома берувчининг муддатни узайтириш ҳақидаги илтимосномаси ушбу Қоидаларнинг 52-бандида белгиланган муддат бузилган ҳолда берилган бўлса, шунингдек патент божи тўланмаган бўлса ёки тўланган патент божи суммаси Ўзбекистон Республикасининг «Давлат божи тўғрисида»ги Қонунида белгиланган миқдордан кам бўлса, сўровнома асосида сўралган ҳужжатларни тақдим этиш муддати узайтирилмайди. Бунда, талабнома берувчига унинг илтимоси рад этилганлиги ҳақида билдиришнома юборилади.

9-§. Ўтказиб юборилган муддатларни тиклаш

55. Талабнома берувчи томонидан ўтказиб юборилган қуйидаги муддатлар тикланиши мумкин:

а) экспертиза сўровномаси бўйича қўшимча материалларни тақдим этиш муддати;

б) экспертиза сўровномасига жавоб бериш муддати.

56. Ўтказиб юборилган муддатни тиклаш тўғрисидаги илтимоснома талабнома берувчи томонидан муддат ўтиб кетган кундан эътиборан икки ой

мобайнида муддат ўтказиб юборилганлигининг сабаблари кўрсатилган ҳолда Давлат муассасасига топширилади.

57. Талабнома берувчининг ўтказиб юборилган муддатни тиклаш ҳақидаги илтимосномасини кўриб чиққанлик учун Ўзбекистон Республикасининг «Давлат божи тўғрисида»ги Қонунида белгиланган миқдорда патент божи тўланади.

58. Давлат муассасаси томонидан талабнома берувчига ўтказиб юборилган муддат тикланганлиги тўғрисида хабарнома юборилади.

59. Ушбу Қоидаларнинг 56 ва 57-бандларида кўрсатилган талаблардан ақалли биттаси бажарилмаган тақдирда, илтимоснома қондирилмайди ва бу ҳақда талабнома берувчига хабарнома юборилади.

10-§. Талабнома берувчи томонидан талабноманинг чақириб олиниши

60. Қонуннинг 17-моддасига мувофиқ талабнома берувчи талабномани чақириб олиш ҳуқуқига эга.

61. Талабномани чақириб олиш тўғрисидаги ариза талабнома кўриб чиқишнинг исталган босқичида, бироқ товар келиб чиққан жой номи ва ундан фойдаланиш ҳуқуқи рўйхатга олинган санадан ёки товар келиб чиққан жой номидан фойдаланиш ҳуқуқини бериш масаласи ҳал этилган санадан кечикмай топширилиши мумкин.

Давлат муассасаси томонидан талабнома берувчига унинг талабномани чақириб олиш тўғрисидаги аризаси қабул қилинганлиги ҳақидаги билдиришнома юборилган санадан эътиборан талабнома чақириб олинган ҳисобланади.

62. Чақириб олинган талабнома бўйича юридик аҳамиятга молик ҳаракатлар амалга оширилмайди (хусусан, бундай талабнома экспертизаси ўтказилмайди, товар келиб чиққан жой номи ва ундан фойдаланиш ҳуқуқи рўйхатга олинмайди ва/ёки товар келиб чиққан жой номидан фойдаланиш ҳуқуқи тақдим этилмайди). Бошқа талабномаларнинг экспертизасини ўтказишда чақириб олинган талабнома эътиборга олинмайди.

4-боб. Талабномани кўриб чиқиш

1-§. Келиб тушган талабномани рўйхатга олиш

63. Вазирликка келиб тушган талабнома ҳужжатлари, агар ушбу ҳужжатлар таркибида камида давлат тилида топширилган товар келиб чиққан жой номини ва ундан фойдаланиш ҳуқуқини рўйхатдан ўтказиш тўғрисидаги ариза ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш тўғрисидаги ариза мавжуд бўлса, шунингдек талабнома бўйича Ўзбекистон Республикасининг «Давлат божи тўғрисида»ги Қонунида белгиланган миқдорда патент божи тўланган бўлса, улар келиб тушган сана кўрсатилган ҳолда рўйхатга олинади.

64. Талабномага Вазирликнинг учта ҳарфли ва саккиз хонали рақамли коддан иборат қайд рақами берилади.

Коддаги биринчи ҳарф (J) саноат мулки объектининг турини — товар келиб чиққан жой номини ва ундан фойдаланиш ҳуқуқини рўйхатдан ўтказиш ёки аввал рўйхатдан ўтказилган товар келиб чиққан жой номидан фойдаланиш ҳуқуқини беришни, кейинги икки ҳарф (GU) муҳофаза ҳужжатининг турини — товар келиб чиққан жой номини ва ундан фойдаланиш ҳуқуқини рўйхатдан ўтказиш ҳақидаги гувоҳномани ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш ҳақидаги гувоҳномани билдиради.

Талабнома рақамидаги сонлар талабнома топширилган йилни (катта разряддаги тўртта сон) ва шу йилда келиб тушган талабномалар сериясидаги тартиб рақамини билдиради (кичик разрядли тўртта сон). Ҳар бир йил сериясидаги тартиб рақам 1 (бир)дан бошланади.

65. Рўйхатга олинган талабнома қайтарилмайди.

66. Талабнома тўғрисидаги маълумотлар, талабнома Вазирликка келиб тушгандан бошлаб эълон қилингунга қадар бўлган муддат давомида махфий ҳисобланади ва ошкор қилинмайди.

2-§. Расмий экспертиза

67. Қонуннинг 14-моддаси биринчи қисмига мувофиқ расмий экспертизанинг ўтказилиш муддати талабнома Вазирликка келиб тушган санадан бошлаб 30 кунни ташкил қилади. Талабнома берувчига мазкур Қоидаларга мувофиқ сўровнома юборилган тақдирда, бу муддат сўровномада назарда тутилган талаб бажарилгунга қадар бўлган муддатга мутаносиб равишда узайтирилади.

68. Расмий экспертизани ўтказиш мобайнида талабнома ҳужжатларининг таркиби, ҳужжатларнинг мавжудлиги, шунингдек уларнинг мазкур Қоидаларда белгиланган талабларга мувофиқлиги текширилади. Бунда, Давлат муассасаси томонидан ушбу текшириш натижалари бўйича талабномани кўриб чиқишга қабул қилиш ёки қабул қилишни рад этиш ҳақида қарор қабул қилинади.

69. Расмий экспертизани ўтказишда талабнома берувчи томонидан тақдим этилган ҳужжатлар ичида қуйидагиларнинг мавжудлиги ва уларнинг мазкур Қоидаларда белгиланган талабларга мувофиқлиги текширилади:

а) товар келиб чиққан жой номини ва ундан фойдаланиш ҳуқуқини рўйхатдан ўтказиш ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш тўғрисидаги ариза;

б) талабнома берувчининг расмий номи (юридик шахс учун) ёки исми, фамилияси, отасининг исми (жисмоний шахс учун) ҳамда манзилининг кўрсатилганлиги;

в) патент вакилининг (агар талабнома у томонидан берилган бўлса) исми, фамилияси, отасининг исми ва манзили;

г) талабномада рўйхатдан ўтказиш сўралаётган белги;

д) товарни белгилаш учун товар келиб чиққан жой номини ва ундан фойдаланиш ҳуқуқини рўйхатдан ўтказиш ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш сўралаётган

товарнинг тури (бунда, товар ишлаб чиқарилаётган жой (жўғрофий объектнинг чегаралари) кўрсатилади);

е) товарнинг алоҳида хусусиятлари тавсифи;

ж) патент вакилига берилган ишончнома (ёки унинг қонунчилик ҳужжатларига мувофиқ расмийлаштирилган нусхаси);

з) талабнома берувчи кўрсатилган жўғрофий объектда жойлашганлиги ва алоҳида хусусиятлари тамомила ёки асосан мазкур жўғрофий объектга хос табиий шароитлар билан ёки бошқа омиллар ёхуд табиий шароитлар ва ушбу омилларнинг бирикмаси билан белгиланадиган товар ишлаб чиқараётганлигини тасдиқловчи ҳужжат;

и) хорижий талабнома берувчининг товар келиб чиққан мамлакатда унинг томонидан талабнома берилган товар келиб чиққан жой номига бўлган ҳуқуқини тасдиқлайдиган ҳужжат;

к) хорижий тилда топширилган ҳужжатларнинг талабномага илова қилинган давлат тилидаги таржимаси.

70. Расмий экспертизани ўтказишда ушбу Қоидаларнинг 69-бандида кўрсатилган ҳужжатлар ва маълумотларнинг мавжудлиги ҳамда ушбу 69-банднинг «а», «б», «г», «д» ва «е» кичик бандларида санаб ўтилган ҳужжатларнинг ушбу Қоидаларда белгиланган талабларга мувофиқлиги текширилади.

71. Талабнома топширилган сана ушбу Қоидаларнинг 69-банди «а», «б», «г», «д» ва «е» кичик бандларида санаб ўтилган ҳужжатлар ва маълумотлар келиб тушган сана ёки, агар ушбу ҳужжатлар ва маълумотларнинг ҳаммаси бир вақтда тақдим этилмаган бўлса, охириги ҳужжат ёки маълумот келиб тушган сана бўйича белгиланади.

72. Хорижий тилда топширилган талабнома ҳужжатларининг давлат тилидаги таржимаси (ушбу Қоидаларнинг 69-банди «к» кичик банди) тақдим этилмагунга қадар, талабнома берувчи томонидан ҳужжатлар топширилмаган деб ҳисобланади.

73. Агар расмий экспертиза ўтказиш жараёнида талабнома ҳужжатлари ушбу Қоидаларда белгиланган талабларга риоя қилинмасдан расмийлаштирилганлиги аниқланса, бу ҳолда талабнома берувчига Қонуннинг 13-моддаси бешинчи қисмига мувофиқ аниқланган камчиликлар кўрсатилган сўровнома юборилади ва талабнома берувчига сўровнома жўнатилган санадан эътиборан уч ой ичида етишмаган ёки тузатилган ҳужжатлар ва/ёки маълумотларни тақдим этиш таклиф қилинади.

74. Агар талабнома берувчи томонидан тақдим этилган жавобда сўралган барча маълумотлар ва/ёки ҳужжатлар бўлмаса, унга қайта сўровнома юборилиши мумкин.

Расмий экспертиза сўровига жавоб олинмаган, жавоб бериш учун белгиланган муддат бузилган ва бу муддат ичида уни узайтириш ҳақидаги илтимоснома тақдим этилмаган бўлса, талабнома берувчига Давлат муассасаси томонидан талабномани кўриб чиқиш учун қабул қилиш рад этилганлиги тўғрисида қарор юборилади.

75. Талабнома материаллари белгиланган талабларга мувофиқ бўлган, шунингдек сўралган маълумотлар талабнома берувчи томонидан ўз вақтида

тақдим этилган бўлса, талабнома топширилган сана белгиланади ва талабнома берувчига Давлат муассасаси томонидан ушбу санадан эътиборан талабнома кўриб чиқишга қабул қилинганлиги тўғрисидаги қарор юборилади.

Бунда, талабноманинг кўриб чиқишга қабул қилинганлиги тўғрисидаги қарорда талабнома берувчи Қонун ва ушбу Қоидаларда кўзда тутилган бошқа маълумотлар ва/ёки ҳужжатларни тақдим этишига зарурият бўлиши мумкинлиги ҳақида ёзув киритилиши мумкин.

76. Агар расмий экспертизанинг такрорий сўровномасига ҳам талабнома берувчи томонидан тақдим этилган жавобда сўралган маълумотлар ва/ёки ҳужжатлар бўлмаса, Давлат муассасаси томонидан талабномани кўриб чиқишга қабул қилишни рад этиш тўғрисидаги қарор қабул қилинади.

77. Талабномани кўриб чиқишга қабул қилишни рад этиш тўғрисидаги қарорда бундай қарорни қабул қилиш учун асослар кўрсатилади.

3-§. Талабнома берилган белгининг экспертизаси

78. Товар келиб чиққан жой номини рўйхатдан ўтказиш ва (ёки) товар келиб чиққан жой номидан фойдаланиш ҳуқуқини беришда талабнома берилган белгининг экспертизаси ўтказилиб, бунда унинг Қонуннинг 6 ва 11-моддалари қоидаларига мувофиқлиги текширилади.

Талабнома берилган белгининг экспертизаси натижалари бўйича Давлат муассасаси томонидан товар келиб чиққан жой номини ва ундан фойдаланиш ҳуқуқини рўйхатдан ўтказиш тўғрисидаги ёки товар келиб чиққан жой номини ва ундан фойдаланиш ҳуқуқини рўйхатдан ўтказишни рад этиш тўғрисидаги қарор ёхуд аввал рўйхатдан ўтказилган товар келиб чиққан жой номидан фойдаланиш ҳуқуқини бериш ёки ундан фойдаланиш ҳуқуқини беришни рад этиш тўғрисидаги қарор қабул қилинади.

79. Талабнома берилган белгининг экспертизаси кўриб чиқишга қабул қилинган талабномалар бўйича расмий экспертиза ўтказилгандан сўнг амалга оширилади.

80. Талабнома берилган белгининг экспертизасини ўтказиш давомида қуйидагилар текширилади:

а) талабноманинг ўзи ва унга илова қилинган ҳужжатларнинг мазмуни ва расмийлаштириш тартиби ушбу Қоидаларнинг 5 — 25-бандлари билан талабнома ҳужжатларига қўйиладиган талабларга мувофиқлиги, бундан текшируви расмий экспертиза давомида амалга ошириладиган талабнома ҳужжатлари мустасно (ушбу Қоидаларнинг 70 — 73-бандлари);

б) талабнома берилган белгининг Қонуннинг 5 ва 11-моддаларида унга нисбатан ўрнатилган талабларга мувофиқлиги;

в) талабнома берувчининг кўрсатилган жўғрофий объектда жойлашганлигини ва алоҳида хусусиятлари мазкур жўғрофий объектга хос табиий шароитлар билан ёки бошқа омиллар ёхуд табиий шароитлар ва бошқа омилларнинг бирикмаси билан белгиланадиган товар ишлаб чиқараётганлигини тасдиқловчи ҳужжатнинг мавжудлиги ва мазмуни;

г) агар талабнома берилган белги товар келиб чиққан жой номи сифатида рўйхатдан ўтказилган бўлса, товарни белгилаш учун товар келиб чиққан

жой номидан фойдаланиш ҳуқуқи берилиши сўралаётган товарга хос алоҳида хусусиятлар тавсифининг Реестрдаги маълумотларга мувофиқлиги.

81. Талабнома берилган белгининг Қонуннинг 5-моддасида товар келиб чиққан жой номига нисбатан белгиланган талабларга мувофиқлигини аниқлашда қуйидагилар текширилади:

а) талабнома берилган белгининг жўғрофий объектнинг замонавий расмий номига ёки тарихий номига мувофиқлиги (ушбу Қоидаларнинг 5-бандини эътиборга олган ҳолда);

б) талабномада номи товар келиб чиққан жой номи сифатида келтириладиган жўғрофий объектнинг чегаралари айнан ўша ерда жойлашганлигини тасдиқлайдиган маълумотларнинг мавжудлиги;

в) талабнома топширилган санада жўғрофий объект номи ушбу жўғрофий объектнинг табиий шароитлари ва/ёки бошқа омиллари билан белгиланган алоҳида хусусиятларига эга бўлган товарни аниқлаштириш учун қўлланадиган белги сифатида мавжудлиги;

г) агар жўғрофий объектнинг номи аввал товарни индивидуаллаштириш учун қўлланган бўлиб, бироқ талабнома топширилган вақтга келиб товарнинг ҳақиқатдан ҳам келиб чиққан жойи ва алоҳида хусусиятларини кўрсатувчи дастлабки қобилиятини йўқотган бўлса, бу ҳолда у Ўзбекистонда тайёрланиш жойи билан боғлиқ бўлмаган маълум турдаги (тур тушунчаси) товарнинг белгиси сифатида умумистеъмолга кирган белги деб ҳисобланиши;

д) товар келиб чиққан жой номи ва ундан фойдаланиш ҳуқуқини рўйхатдан ўтказиш ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш сўралаётган товарнинг кўрсатилганлиги (бунда, у ишлаб чиқарилган жой (жўғрофий объект чегаралари) кўрсатилди);

е) товарнинг алоҳида хусусиятлари тавсифининг мавжудлиги ва уларнинг тасдиқловчи ҳужжатларга мувофиқлиги.

82. Ваколатли ташкилотлар томонидан тақдим этилган тасдиқловчи ҳужжатларнинг мазмуни текшириладиганда, уларда қуйидаги маълумотларнинг мавжудлиги аниқланади:

а) талабнома берувчининг, номи товар келиб чиққан жой номи сифатида талабнома берилган жойда эканлиги;

б) талабномада кўрсатилган товарнинг талабнома берувчи томонидан, номи товар келиб чиққан жой номи сифатида талабнома берилган жой ҳудудида ишлаб чиқарилганлиги;

в) талабнома берувчи томонидан ишлаб чиқариладиган товарда талабномада кўрсатилган жўғрофий объектнинг тамомила ёки асосан табиий шароитлари ва/ёки бошқа омиллар туфайли эга бўлган алоҳида хусусиятларнинг мавжудлиги.

83. Товарнинг алоҳида хусусиятлари тавсифи ваколатли ташкилот томонидан тақдим этилган тасдиқловчи ҳужжатга мувофиқ бўлиши ва ушбу ҳужжат талабномага Қонуннинг 9-моддаси учинчи қисмида кўзда тутилган ҳолда илова қилинган бўлиши лозим.

84. Талабнома ҳужжатлари Қонунда ўрнатилган талабларга мос келма-

ган ҳолларда, талабнома берувчига аниқланган камчиликлар кўрсатилган сўровнома юборилиб, унда сўровнома жўнатилган санадан эътиборан уч ой мобайнида етишмаган ёки тузатилган ҳужжатлар ва/ёки маълумотларни тақдим этиш таклиф қилинади.

85. Талабнома берувчига сўровнома юбориш учун қўйидагилар асос бўлиши мумкин:

а) талабнома берилган белгини аниқлаш зарурияти;

б) ушбу Қоидаларнинг 7, 21, ва 22-бандларида кўрсатилган ҳужжатларни тақдим этиш зарурияти;

в) товар келиб чиққан жой номи ва ундан фойдаланиш ҳуқуқини рўйхатдан ўтказиш ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш сўралаётган товар турини аниқлаш зарурияти;

г) товар келиб чиққан жой номи ва ундан фойдаланиш ҳуқуқини рўйхатдан ўтказиш ёки аввал рўйхатдан ўтказилган товар келиб чиққан жой номидан фойдаланиш ҳуқуқини бериш сўралаётган товарнинг ишлаб чиқарилаётган жойини аниқлаш зарурияти;

д) талабномада кўрсатилган товарнинг алоҳида хусусиятлари тавсифини аниқлаш зарурияти;

е) ушбу Қоидаларнинг 80-банди «в» кичик бандида кўрсатилган маълумотларга, хусусан товарда алоҳида хусусиятлар мавжудлигини, уларнинг талабномада кўрсатилган жўғрофий объектга хос табиий шароитлар ва/ёки бошқа омилларга боғлиқлигини тасдиқлайдиган маълумотларга аниқлик киритиш зарурияти.

86. Ушбу Қоидаларнинг 85-бандида кўрсатилган асосларга кўра талабнома берувчига юборилаётган сўровномага, шу жумладан талабнома кўриб чиқишда пайдо бўладиган бошқа турдаги саволлар ва таклифлар ҳам киритилиши мумкин.

Талабнома берилган белгининг экспертизаси бўйича сўровномада бирон-бир савол келтирилганда у Қонун ва ушбу Қоидаларга асосланган бўлиши лозим.

87. Талабнома берилган белгининг экспертизаси сўровномаси бўйича талабнома берувчи томонидан тақдим этилган қўшимча материаллар ушбу Қоидаларнинг 94 — 97-бандларига мувофиқ кўриб чиқилади.

88. Агар талабнома берувчи сўровномада сўралган материалларни ёки уларни тақдим этиш муддатини узайтириш ҳақидаги илтимосномани ушбу Қоидаларда белгиланган муддатда ва шартларга риоя қилган ҳолда тақдим этмаса, талабнома чақириб олинган деб ҳисобланади ва бу ҳақда талабнома берувчига хабарнома юборилади. Бунда, талабнома бўйича иш юритиш тўхтатилади.

Мазкур Қоидаларнинг 55 — 59-бандларига асосан ўтказиб юборилган муддат Давлат муассасаси томонидан тикланса, бу ҳолда иш юритиш давом эттирилади.

89. Талабнома берилган белгининг Қонуннинг 5-моддасида белгиланган талабларга мувофиқлиги аниқланса, Давлат муассасаси томонидан товар ке-

либ чиққан жой номини ва ундан фойдаланиш ҳуқуқини рўйхатдан ўтказиш ҳақида қарор қабул қилинади.

90. Талабнома берилган белгининг Қонуннинг 5-моддасида белгиланган талабларга мувофиқлиги аниқланган вақтда, ушбу белгининг Реестрда рўйхатдан ўтказилганлиги ҳақидаги қайд мавжуд бўлса, Давлат муассасаси томонидан аввал рўйхатдан ўтказилган товар келиб чиққан жой номидан фойдаланиш ҳуқуқини бериш ҳақидаги қарор қабул қилинади.

91. Агар ўтказилган экспертиза натижасида талабнома берилган белги Қонуннинг 5-моддасида кўзда тутилган талабларга мос келмаслиги аниқланган бўлса, бу ҳолда Давлат муассасаси томонидан товар келиб чиққан жой номини ва ундан фойдаланиш ҳуқуқини рўйхатдан ўтказиш ёки товар келиб чиққан жой номидан фойдаланиш ҳуқуқини беришни рад этиш ҳақида қарор қабул қилинади.

92. Агар ўтказилган экспертиза натижасида талабнома берилган белгининг Қонуннинг 5-моддаси ва 6-моддаси тўртинчи қисмида кўзда тутилган талабларга мос келмаслиги аниқланган вақтда, ушбу белгининг Реестрда рўйхатдан ўтказилганлиги ҳақидаги қайд мавжуд бўлса, аввал рўйхатдан ўтказилган товар келиб чиққан жой номидан фойдаланиш ҳуқуқини беришни рад этиш ҳақидаги қарор қабул қилинади.

93. Товар келиб чиққан жой номини ва ундан фойдаланиш ҳуқуқини рўйхатдан ўтказишни ёки аввал рўйхатдан ўтказилган товар келиб чиққан жой номидан фойдаланиш ҳуқуқини беришни рад этиш ҳақидаги қарорларда ушбу қарорларни қабул қилишга асос бўлган сабаблар келтирилади.

4-§. Қўшимча материалларни текшириш

94. Давлат муассасасининг сўровномаси бўйича талабнома берувчи томонидан тақдим этилган қўшимча материалларни текширишда уларни тақдим этиш учун белгиланган муддатларга риоя қилинганлиги текширилади.

95. Талабнома берувчи томонидан ўз ташаббусига кўра ёки Давлат муассасасининг сўровномаси бўйича тақдим этилган қўшимча материалларнинг талабнома моҳиятини ўзгартирмаслиги текширилади.

96. Қўйидаги ҳолларда қўшимча материаллар талабнома моҳиятини ўзгартиради деб эътироф этилади, агар уларда, жумладан:

а) тасдиқловчи ҳужжатларга кўра ушбу товар эга бўлмаган хусусиятлар кўрсатилган бўлса;

б) талабнома берилган белги товар келиб чиққан жой номи учун мўлжалланган товарнинг номини ўз ичига олганда, бошқа товар (товарлар) кўрсатилган бўлса;

в) талабнома берилган белги ўзгартирилган ёки тўлдирилган бўлса;

г) товарлар рўйхати кенгайтирилган бўлса.

97. Қўшимча материаллар талабнома моҳиятини ўзгартиради деб эътироф этилганда, талабнома берувчига экспертизанинг шундай хулоса чиқариши учун қўшимча материалларга киритилган қайси маълумотлар асос бўлганлиги маълум қилинади. Бунда, бошқа маълумотлар экспертиза ўтказишда ҳисобга олинади.

Ўзбекистон Республикаси
адлия вазирининг 2023 йил 7 декабрдаги
21-мх-сон буйруғига
2-ИЛОВА

**Ўз кучини йўқотган деб топилаётган идоравий
норматив-ҳуқуқий ҳужжатлар
РЎЙХАТИ**

1. Ўзбекистон Республикаси Давлат патент идораси директорининг 2002 йил 11 октябрдаги 52-сон «Товар келиб чиққан жой номини рўйхатдан ўтказиш ва товар келиб чиққан жой номидан фойдаланиш ҳуқуқини бериш учун талабномани тузиш, топшириш ва кўриб чиқиш қоидаларини тасдиқлаш тўғрисида»ги буйруғи (рўйхат рақами 1185, 2002 йил 1 ноябрь) (Ўзбекистон Республикаси вазирликлари, давлат кўмиталари ва идораларининг меъёрий ҳужжатлари ахборотномаси, 2002 й., 21-сон).

2. Ўзбекистон Республикаси Давлат патент идораси директорининг 2007 йил 17 октябрдаги 72-сон «Товар келиб чиққан жой номини ва товар келиб чиққан жой номидан фойдаланиш ҳуқуқини беришни рўйхатдан ўтказишга доир талабнома тузиш, топшириш ва кўриб чиқиш қоидаларига ўзгартириш ва қўшимчалар киритиш тўғрисида»ги буйруғи (рўйхат рақами 1185-1, 2007 йил 13 ноябрь) (Ўзбекистон Республикаси қонун ҳужжатлари тўплами, 2007 й., 46-47-сон, 474-модда).

3. Ўзбекистон Республикаси Интеллектуал мулк агентлиги бош директорининг 2011 йил 26 августдаги 27-сон «Товар келиб чиққан жой номини рўйхатдан ўтказиш ва товар келиб чиққан жой номидан фойдаланиш ҳуқуқини бериш учун талабномани тузиш, топшириш ва кўриб чиқиш қоидаларига ўзгартиришлар киритиш тўғрисида»ги буйруғи (рўйхат рақами 1185-2, 2011 йил 30 сентябрь) (Ўзбекистон Республикаси қонун ҳужжатлари тўплами, 2011 й., 40-сон, 431-модда).

ЎЗБЕКИСТОН RESPUBLIKACI ИЧКИ ИШЛАР ВАЗИРИНИНГ
БУЙРУҒИ**508** Ўзбекистон Республикаси Ички ишлар вазирлиги озод-
ликдан маҳрум қилиш туридаги жазони ижро этиш муас-
сасаларининг ички тартиб қоидаларига ўзгартириш ва қўшимчалар
киритиш тўғрисида*

*Ўзбекистон Республикаси Адлия вазирлиги томонидан 2023 йил
11 декабрда рўйхатдан ўтказилди, рўйхат рақами 2495-7*

Ўзбекистон Республикасининг Жиноят-ижроия кодекси, Ўзбекистон Ре-
спубликаси Президентининг 2021 йил 26 мартдаги ПФ–6196-сон «Жамоат
хавфсизлигини таъминлаш ва жиноятчиликка қарши курашиш соҳасида
ички ишлар органлари фаолиятини сифат жиҳатидан янги босқичга кўтариш
чора-тадбирлари тўғрисида»ги Фармони, 2022 йил 30 августдаги ПҚ–365-сон
«Саховат» ва «Мурувват» интернат уйлари ҳамда Уруш ва меҳнат фахрий-
лари учун Республика пансионати фаолиятини ривожлантиришга доир қў-
шимча чора-тадбирлар тўғрисида»ги қарори ҳамда Ўзбекистон Республикаси
Вазирлар Маҳкамасининг 2022 йил 15 августдаги 445-сон «Ўзбекистон Рес-
публикаси Ички ишлар вазирлиги ҳузуридаги Жазони ижро этиш департа-
менти фаолиятини янада самарали ташкил этиш бўйича қўшимча чора-тад-
бирлар тўғрисида»ги қарорига мувофиқ **буюраман:**

1. Ўзбекистон Республикаси ички ишлар вазирининг 2012 йил 29 декабр-
даги 174-сон буйруғи (рўйхат рақами 2495, 2013 йил 29 июль) (Ўзбекистон
Республикаси қонун ҳужжатлари тўплами, 2013 й., 31-сон, 414-модда) билан
тасдиқланган Ўзбекистон Республикаси Ички ишлар вазирлиги озодликдан
маҳрум қилиш туридаги жазони ижро этиш муассасаларининг ички тартиб
қоидаларига иловага мувофиқ ўзгартириш ва қўшимчалар киритилсин.

2. Мазкур буйруқ расмий эълон қилинган кундан эътиборан кучга
киради.

Вазир

П. БОБОЖОНОВ

Тошкент ш.,
2023 йил 2 ноябрь,
503-сон

* Ушбу буйруқ «Қонунчилик маълумотлари миллий базаси»да 2023 йил 12 декабрда эълон қилинган.

Ўзбекистон Республикаси
ички ишлар вазирининг 2023 йил
2 ноябрдаги 503-сон буйруғига
ИЛОВА

**Ўзбекистон Республикаси Ички ишлар вазирлиги озодликдан
маҳрум қилиш туридаги жазони ижро этиш муассасаларининг
ички тартиб қоидаларига киритилаётган ўзгартириш ва
қўшимчалар**

1. 2-банд қўйидаги таҳрирда баён этилсин:

«2. ЖИЭМларга қўйидагилар кирази:

жазони ижро этиш колониялари, шу жумладан даволаш ҳуқуқи асосида-
ги колониялар;

тарбия колониялари;

турмалар;

маҳкумлар учун ихтисослашган касалхоналар.»

2. Қўйидаги мазмундаги 6¹-банд билан тўлдирилсин:

«6¹. Маҳкумлар учун ихтисослашган касалхоналар бемор маҳкумларни
сақлаш ва уларга малакали тиббий ёрдам кўрсатиш учун мўлжалланган.»

3. 9-бандда:

биринчи хатбошидаги «ижобий тавсифга эга» деган сўзлар «тузалиш йў-
лига ўтган» деган сўзлар билан алмаштирилсин;

иккинчи хатбошидаги «тўртдан бир» деган сўзлар «учдан бир» деган сўз-
лар билан алмаштирилсин;

учинчи хатбошидаги «учдан бир қисмини» деган сўзлар «ярмини» деган
сўз билан алмаштирилсин.

4. 10-бандда:

қўйидаги мазмундаги тўртинчи ва бешинчи хатбошилар билан тўлдирил-
син:

«жазони ўташ даврида ЖИКнинг 112¹-моддасида назарда тутилган тар-
тибда манзил-колониядан умумий тартибли колонияга ўтказилган, шунинг-
дек умумий ёки қаттиқ тартибли колонияга қайтарилган маҳкумлар суд то-
монидан бу ҳақда ажрим чиқарилган кундан эътиборан камида икки йил
мобайнида;

манзил-колониёда жазони ўташ вақтида жиноят содир этган ва суд то-
монидан озодликдан маҳрум қилиш тариқасидаги жазога ҳукм қилинган
маҳкумлар.»;

тўртинчи — олтинчи хатбошилар тегишли равишда олтинчи — саккизин-
чи хатбошилар деб ҳисоблансин;

олтинчи хатбоши қўйидаги таҳрирда баён этилсин:

«ёпиқ турдаги тиббиёт муассасаларида махсус даволаниш талаб этилади-
ган юқумли касалликларга чалинган беморлар.»

5. 12-бандда:

олтинчи хатбоши қўйидаги таҳрирда баён этилсин:

«пул ва қимматли буюмларни сақлашлари, улардан чекланмаган миқдорда фойдаланишлари мумкин;»;

еттинчи хатбоши қуйидаги таҳрирда баён этилсин:

«ишдан бўш вақтларида чекланмаган миқдорда телефон орқали сўзлашишлари, шу жумладан фотосуратга олиш, аудио ёки видео ёзиб олиш функциялари мавжуд бўлмаган ҳамда Интернет тармоғига уланиш имконияти бўлмаган уяли алоқа воситаларидан фойдаланиш, посилка, йўқлов ва бандероллар олишлари ҳамда жўнатишлари мумкин;»;

қуйидаги мазмундаги саккизинчи хатбоши билан тўлдирилсин:

«ўз шахсий маблағлари ҳисобига харид қилинган озиқ-овқат маҳсулотларидан ва йўқловлардаги маҳсулотлардан мустақил равишда овқат тайёрлашни амалга оширади.».

6. Қуйидаги мазмундаги 12¹-12²-бандлар билан тўлдирилсин:

«12¹. Маҳкумларнинг уяли алоқа воситалари манзил-колония маъмурияти томонидан Маҳкумларнинг уяли алоқа воситаларини рўйхатга олиш журналида қайд этилади.

Уяли алоқа воситаларини қайд этиш учун қуйидаги ҳужжатлар илова қилиниши лозим:

маҳкумнинг манзил-колония бошлиғи номига телефон аппаратининг маркази, абонент рақами (SIM/RUIM-карта) тўғрисидаги аризаси;

агар абонент рақами маҳкумнинг қариндоши номига расмийлаштирилган бўлса, ушбу қариндошнинг абонент рақамидан маҳкум фойдаланишига розилиги тўғрисидаги ариза.

Манзил-колония маъмурияти томонидан Маҳкумларнинг уяли алоқа воситаларини рўйхатга олиш журналида қайд этилмаган уяли алоқа воситаларидан фойдаланиш тақиқланади.

12². Манзил-колонияси маъмурияти маҳкумлар томонидан фойдаланилаётган уяли алоқа воситаларининг маркалари, абонент рақамларини мунтазам равишда Маҳкумларнинг уяли воситаларини рўйхатга олиш журналида қайд этилган маълумотлар билан таққослаб боради.

Манзил-колонияси маъмурияти томонидан таққослаш учун уяли алоқа воситаларини тақдим қилиш сўралганда, маҳкумлар уяли алоқа воситаларини дарҳол тақдим этишлари шарт.

7. 13-банд қуйидаги таҳрирда баён этилсин:

«13. Маҳкумлар чекланмаган миқдорда қисқа муддатли учрашувлар, йил мобайнида йигирма тўрт марта узоқ муддатли учрашувлар олиш ҳуқуқига эга. Учрашувлар, қоида тариқасида, ишдан бўш вақтда берилади.

Манзил-колония ҳудудида узоқ муддатли учрашув ўтказиш имконияти бўлмаса, учрашув маҳкумнинг аризасига биноан манзил-колония ҳудудидан ташқарида, ушбу колония жойлашган туман (шаҳар) ҳудудида ўтказилиши мумкин.

Узоқ муддатли учрашувлар колония бошлиғининг ёрдамчиси-тезкор навбатчи (бундан буён матнда тезкор навбатчи деб юритилади) томонидан қайд этиб борилади.

Манзил-колония ҳудудидан ташқарида ҳаракатланиш чегаралари маҳкум-

ларга тилхат олиниб, маълум қилинади ва тилхат уларнинг шахсий ҳужжатлар йиғмажилдига қўшиб қўйилади.

Маҳкумларга мазкур Қоидаларнинг 1-иловасига мувофиқ шаклда қатъий ҳисобда турувчи гувоҳнома берилади.»

8. 15-бандда:

мазкур банддаги «ундан ташқарида» деган сўзлар «манзил-колония жойлашган туман (шаҳар) ҳудудида» деган сўзлар билан алмаштирилсин;

қуйидаги мазмундаги иккинчи хатбоши билан тўлдирилсин:

«Манзил-колония ҳудудидан ташқарида яшаш ҳуқуқи ЖК 73-моддаси тўртинчи қисмининг «в» ва «г» бандларида кўрсатилган маҳкумларга берилмайди».

9. 21-банддаги «Ижобий тавсифга эга» деган сўзлар «Тузалиш йўлига ўтган» деган сўзлар билан алмаштирилсин.

10. 25-банддаги «энг кам иш ҳақи миқдорининг икки бараваригача» деган сўзлар «меҳнатга ҳақ тўлаш энг кам миқдорининг 70,3 фоизигача» деган сўзлар билан алмаштирилсин.

11. 26-банд қуйидаги таҳрирда баён этилсин:

«26. Маҳкумлар йил мобайнида:

олти марта қисқа муддатли ва олти марта узоқ муддатли учрашув;

ўн икки марта телефон орқали сўзлашув;

ўн иккита посылка ёки йўқлов;

ўн иккита бандерол олиш ҳуқуқига эга.»

12. 29-банддаги «Ижобий тавсифга эга» деган сўзлар «Тузалиш йўлига ўтган» деган сўзлар билан алмаштирилсин.

13. 32-банддаги «энг кам иш ҳақи миқдорининг бир ярим бараваригача» деган сўзлар «меҳнатга ҳақ тўлаш энг кам миқдорининг 52,7 фоизигача» деган сўзлар билан алмаштирилсин.

14. 33-банд қуйидаги таҳрирда баён этилсин:

«33. Маҳкумлар йил мобайнида:

беш марта қисқа муддатли ва беш марта узоқ муддатли учрашув;

саккиз марта телефон орқали сўзлашув;

саккизта посылка ёки йўқлов;

саккизта бандерол олиш ҳуқуқига эга.»

15. 37-банддаги «Ижобий тавсифга эга» деган сўзлар «Тузалиш йўлига ўтган» деган сўзлар билан алмаштирилсин.

16. 40-банддаги «энг кам иш ҳақи миқдори суммасигача» деган сўзлар «меҳнатга ҳақ тўлаш энг кам миқдорининг 35,2 фоизигача бўлган суммага» деган сўзлар билан алмаштирилсин.

17. 41-банд қуйидаги таҳрирда баён этилсин:

«41. Маҳкумлар йил мобайнида:

тўрт марта қисқа муддатли ва тўрт марта узоқ муддатли учрашув;

олти марта телефон орқали сўзлашув;

олтита посылка ёки йўқлов;

олтита бандерол олиш ҳуқуқига эга.»

18. 45-банддаги «Ижобий тавсифга эга» деган сўзлар «Тузалиш йўлига ўтган» деган сўзлар билан алмаштирилсин.

19. 47-банддаги «энг кам иш ҳақи миқдорининг икки ярим бараваригача» деган сўзлар «меҳнатга ҳақ тўлаш энг кам миқдорининг 87,9 фоизигача» деган сўзлар билан алмаштирилсин.

20. 48-банд қуйидаги таҳрирда баён этилсин:

«48. Тарбия колонияларида маҳкумлар йил мобайнида:

йигирма тўрт марта қисқа муддатли ва саккиз марта узоқ муддатли учрашув;

йигирма тўрт марта телефон орқали сўзлашув;

ўн иккита посылка ёки йўқлов;

ўн иккита бандерол олиш ҳуқуқига эга.».

21. Қуйидаги мазмундаги 48¹-банди билан тўлдирилсин:

«48¹. Вояга етмаган маҳкумларга ота-онаси ва уларнинг ўрнини босувчи шахслар билан учрашувлар чекланмаган миқдорда берилади».

22. 52-банддаги «ўн уч» деган сўзлар «ўн тўрт» деган сўзлар билан алмаштирилсин.

23. 62-банддаги «I ва II гуруҳ ногиронлари» деган сўзлар «I ва II гуруҳ ногиронлиги бўлган шахслар» деган сўзлар билан алмаштирилсин.

24. 64-банддаги «энг кам иш ҳақи миқдорининг етмиш беш фоизигача» деган сўзлар «меҳнатга ҳақ тўлаш энг кам миқдорининг 26,5 фоизигача» деган сўзлар билан алмаштирилсин.

25. 65-банд қуйидаги таҳрирда баён этилсин:

«65. Турмаларда маҳкумлар ҳар куни муддати бир соатлик сайр қилиш ҳамда йил мобайнида:

тўрт марта қисқа муддатли ва бир марта узоқ муддатли учрашув;

тўрт марта телефон орқали сўзлашув;

тўртта посылка ёки йўқлов;

тўртта бандерол олиш ҳуқуқига эга.».

26. Қуйидаги мазмундаги 67¹-банд билан тўлдирилсин:

«67¹. Маҳкумларга нисбатан қийноққа солиш, зўравонлик, бошқа шафқатсиз, ғайриинсоний ёки инсон қадр-қимматини камситувчи муомала ёхуд жазо турларининг қўлланилишига йўл қўйилмайди.».

27. 69-банднинг бешинчи хатбошиси «таржимоннинг» деган сўздан кейин «, шу жумладан сурдотаржимоннинг» деган сўзлар билан тўлдирилсин.

28. Қуйидаги мазмундаги 70¹-70²-бандлар билан тўлдирилсин:

«70¹. Оғир ва ўта оғир жиноятлар содир этганлик учун суднинг ҳукмига кўра ЖИЭМда сақланаётган маҳкумлар сайловда иштирок этиш ҳуқуқидан фақат қонунга мувофиқ ҳамда суднинг қарори асосида маҳрум этилиши мумкин. Бошқа ҳар қандай ҳолларда маҳкумларнинг сайлов ҳуқуқларини тўғридан-тўғри ёки билвосита чеклашга йўл қўйилмайди.

70². Маҳкум шахсий хавфсизлик ҳуқуқига эга.

Интизомий қисмга жўнатишга ёки озодликдан маҳрум этишга ҳукм қилинган шахснинг шахсий хавфсизлигига таҳдид юзага келган тақдирда, у ўз шахсий хавфсизлигини таъминлаш тўғрисидаги ариза (хабар) билан

ЖИЭМнинг ҳар қандай ходимиغا оғзаки ёки ёзма равишда мурожаат қилишга ҳақли. Маҳкумнинг аризасини (хабарини) қабул қилган ходим зудлик билан уни ЖИЭМнинг ёки органининг бошлиғига тақдим этади.

Маҳкумнинг шахсий хавфсизлигини таъминлаш тўғрисидаги аризаси (хабари) маҳкумларнинг шахсий хавфсизлигини таъминлаш тўғрисидаги аризаларини (хабарларини) қайд этиш китобида ЖИЭМнинг масъул шахси томонидан рўйхатдан ўтказилади.

ЖИЭМ бошлиғи шахсий хавфсизликни таъминлаш тўғрисидаги аризани (хабарни) олгандан сўнг маҳкумни хавфсиз жойга вақтинчалик жойлаштириши шарт.

ЖИЭМ бошлиғи шахсий хавфсизликни таъминлаш тўғрисидаги аризани (хабарни) кўриб чиқади ва маҳкумга нисбатан хавфсизлик чораларини қўллаш тўғрисида ёхуд уларни қўллашни рад этиш ҳақида уч сутка ичида қарор қабул қилади. Кечиктириб бўлмайдиган ҳолларда маҳкумга нисбатан хавфсизлик чораларини қўллаш тўғрисидаги қарор дарҳол қабул қилинади.

Маҳкум қабул қилинган қарор билан имзо қўйдириб таништирилади.

Хавфсизлик чораларини қўллаш тўғрисидаги ёки уларни қўллашни рад этиш ҳақидаги қарор устидан юқори турувчи органга, прокурорга ёки судга шикоят қилиниши мумкин. Шикоят берилган пайтдан эътиборан йигирма тўрт соат ичида кўриб чиқилиши лозим.

ЖИЭМ бошлиғи маҳкумнинг хавфсизлигини таъминлаш мақсадида «Жабрланувчиларни, гувоҳларни ва жиноят процессининг бошқа иштирокчиларини ҳимоя қилиш тўғрисида»ги Ўзбекистон Республикасининг Қонунида белгиланган хавфсизлик чораларини қўллайди.

Хавфсиз жойга ўтказилган маҳкум жазони бу ерга ўтказилгунига қадар белгиланган сақлаш шароитларида ўтайди.»

29. Қуйидаги мазмундаги 89²-банд билан тўлдирилсин:

«89². Ўзбекистон Республикаси Коррупцияга қарши курашиш агентлиги ходимлари ўз ваколатлари доирасида коррупцияга оид ҳуқуқбузарликлар содир этилишининг сабаблари ва шарт-шароитларини ўрганиш ҳамда таҳлил қилиш мақсадида ЖИЭМга монеликсиз киришга, зарур ҳужжатлар билан танишишга ҳақли.»

30. 90-банд қуйидаги таҳрирда баён этилсин:

«90. Маҳкумларни кино-, фото-, видеотасвирга тушириш, улардан интервью олишга уларнинг ёзма розилиги ва ЖИЭМ рухсатига асосан йўл қўйилади.

Маҳкумларнинг хавфсизлигини ва қўриқланишини таъминловчи объектларни тасвирга олишга эса, ЖИЭМ рухсати бўлган тақдирда йўл қўйилади.»

31. 93-банддаги «касб-ҳунар таълими» деган сўзлар «профессионал таълим» деган сўзлар билан алмаштирилсин.

32. 100-банднинг биринчи хатбошисидаги «нарса ва буюмлари ҳамда кийимлари» деган сўзлар «буюмлари ва кийимлари» деган сўзлар билан алмаштирилсин.

33. 101-банд қуйидаги таҳрирда баён этилсин:

«101. Шахсий тинтув маҳкум билан бир жинсда бўлган шахслар томонидан амалга оширилади.».

34. Қўйидаги мазмундаги 101¹-101²-бандлар билан тўлдирилсин:

«101¹. Тайёрланаётган ёки содир этилаётган жиноятлар, тақиқланган нарсалар ва буюмлар сақланаётганлиги ҳақида ахборот келиб тушган ҳолларда, ЖИЭМнинг турар жойларини уларда маҳкумлар бўлганда тинтув қилишга йўл қўйилади.

101². Тинтув ўтказиш чоғида маҳкумларга нисбатан жисмоний куч ва махсус воситалар қўлланилиши тақиқланади, бундан маҳкумларнинг тинтувни амалга ошираётган ходимга, бошқа маҳкумларга ёки ўзга шахсларга нисбатан ғайриҳуқуқий хатти-ҳаракатларининг, шунингдек маҳкумлар томонидан ўзига ўзи зарар етказишининг олдини олиш ҳоллари мустасно.».

35. VII боб 5-параграфининг номидан «ҳамда тинчлантириш кўйлаги» деган сўзлар чиқариб ташлансин.

36. 108-банддан «(бундан буён матнда тезкор навбатчи деб юритилади)» деган сўзлар чиқариб ташлансин.

37. 118-банд қўйидаги таҳрирда баён этилсин:

«118. Жисмоний куч ишлатилиши натижасида маҳкумнинг ҳаёти ва соғлиғига зарар етказилган ҳар бир ҳолат тўғрисида прокурорга дарҳол хабар берилади.».

38. 124-банд «ҳодиса ҳақида» деган сўзлардан кейин «дарҳол» деган сўз билан тўлдирилсин.

39. 125 — 128-бандлар ўз кучини йўқотган деб топилсин.

40. 139-банддаги «молия бўлимига» деган сўзлар «молия ва моддий-техника таъминоти бўлимига» деган сўзлар билан алмаштирилсин.

41. 146-банддаги «молия бўлимига» деган сўзлар «молия ва моддий-техника таъминоти бўлимига» деган сўзлар билан алмаштирилсин.

42. 160-банддаги «молия бўлимига» деган сўзлар «молия ва моддий-техника таъминоти бўлимига» деган сўзлар билан алмаштирилсин.

43. 161-банднинг бешинчи хатбошиси қўйидаги таҳрирда баён этилсин:

«маҳкумнинг умумий ўрта ва ўрта махсус, профессионал таълимга оид хужжатлари;».

44. 170-банддаги «туркум бошлиқлари» деган сўзлар «ижтимоий ходим» деган сўзлар билан алмаштирилсин.

45. 173-банддаги «туркум бошлиқлари» деган сўзлар «ижтимоий ходим» деган сўзлар билан алмаштирилсин.

46. VIII боб қўйидаги мазмундаги 5¹-параграф билан тўлдирилсин:

«5¹-§. Маҳкум овқат ейишни рад этганда қўлланиладиган чоралар

185¹. Маҳкумнинг овқат ейишни рад этганлиги факти аниқланганда ЖИЭМ бошлиғи ёхуд унинг ўрнини босувчи шахс бу ҳақда зудлик билан прокурорни хабардор қилади.

185². Овқат ейишни рад этадиган маҳкум имкон қадар бошқа маҳкумлардан алоҳида сақланади ва тиббиёт ходимининг кузатуви остида бўлади.

185³. Овқат ейишни рад этган маҳкумнинг соғлигини сақлаб туришга қаратилган мажбурлов йўсинидаги (сунъий ва мажбурий овқатлантириш тарзидаги) чоралар, агар унинг ҳаётига ёки соғлиғига хавф таҳдид солса, шифокорнинг ёзма хулосаси асосида ҳамда тиббиёт ходими ҳозирлигида амалга оширилади.

185⁴. Маҳкумнинг овқат ейишни рад этганлиги уни бошқа ЖИЭМга ўтказишга ёхуд тергов ҳаракатларида ва суд мажлисларида иштирок этиш учун бошқа ерга кўчиришга тўсқинлик қилмайди. Зарур ҳолларда, маҳкумни бошқа ерга кўчириш тиббиёт ходими кузатувида амалга оширилади».

47. 186-банднинг биринчи хатбошисидаги «туркум бошлиқлари» деган сўзлар «ижтимоий ходим» деган сўзлар билан алмаштирилсин.

48. 187-банддаги «туркум бошлиқлари» деган сўзлар «ижтимоий ходим» деган сўзлар билан алмаштирилсин.

49. 190-банд қўйидаги таҳрирда баён этилсин:

«190. ЖИЭМ маъмурияти томонидан шахсан қабул қилинган маҳкумларнинг ҳисоби мазкур Қоидаларнинг 20-иловасига мувофиқ шаклдаги дафтарда, Ўзбекистон Республикаси Ички ишлар вазирлигининг, шунингдек Жазони ижро этиш департаменти (бундан буён матнда ЖИЭД деб юритилади) ва тегишли минтақавий мувофиқлаштириш марказларининг (бундан буён матнда Минтақа деб юритилади) ходимлари томонидан қабул қилинган маҳкумларнинг ҳисоби эса алоҳида дафтарда қайд этилади ва улар ЖИЭМнинг девонхона котибида сақланади.».

50. 197-банднинг иккинчи хатбошисидаги «туркум бошлиқлари» деган сўзлар «ижтимоий ходим» деган сўзлар билан алмаштирилсин.

51. 198-банднинг иккинчи хатбошисидаги «молия бўлимига» деган сўзлар «молия ва моддий-техника таъминоти бўлимига» деган сўзлар билан алмаштирилсин.

52. 200-банддаги «энг кам иш ҳақи белгиланган миқдорининг ўн фоизигача» деган сўзлар «меҳнатга ҳақ тўлаш энг кам миқдорининг 3,6 фоизигача» деган сўзлар билан алмаштирилсин.

53. 202-банд қўйидаги таҳрирда баён этилсин:

«202. Бир ой давомида сарфлашга рухсат этилган пулнинг умумий суммаси қўйидаги миқдорлардан ошмаслиги лозим:

умумий тартибли колонияларда — белгиланган меҳнатга ҳақ тўлаш энг кам миқдорининг 1,06 бараваридан;

қаттиқ тартибли колонияларда — белгиланган меҳнатга ҳақ тўлаш энг кам миқдорининг 87,9 фоизидан;

махсус тартибли колонияларда — белгиланган меҳнатга ҳақ тўлаш энг кам миқдорининг 70,3 фоизидан;

турмаларда — белгиланган меҳнатга ҳақ тўлаш энг кам миқдорининг 52,7 фоизидан;

тарбия колонияларида, ихтисослаштирилган даволаш муассасаларида, шунингдек маҳкум биринчи ва иккинчи гуруҳ ногиронлиги бўлган шахслар, ҳомиладор аёллар ҳамда ЖИЭМдаги болалар уйида болалари бўлган аёллар учун — белгиланган меҳнатга ҳақ тўлаш энг кам миқдорининг 120 фоизидан.

Ушбу бандда белгиланган миқдордан ортиқча пулга маҳкумлар тиббий хулоса асосида қўшимча равишда озиқ-овқат маҳсулотлари, шунингдек кийим ва пойабзал сотиб олиш ҳуқуқига эга.».

54. 203-банддаги «энг кам иш ҳақи миқдорининг элик фоизигача, манзил-колонияларда эса — тўлиқ миқдоригача» деган сўзлар «меҳнатга ҳақ тўлаш энг кам миқдорининг 17,6 фоизигача, манзил-колонияларда эса — 35,2 фоизигача» деган сўзлар билан алмаштирилсин.

55. 222-банддаги «ногиронларининг» деган сўз «ногиронлиги бўлган шахсларининг» деган сўзлар билан алмаштирилсин.

56. 230-банд қуйидаги таҳрирда баён этилсин:

«230. Маҳкумларнинг хатлари ва бошқа жўнатмалари цензурадан ўтказилади, жазони манзил-колонияларда ўтаётган шахсларнинг хатлари ва бошқа жўнатмалари бундан мустасно.».

57. 241-бандда:

биринчи хатбошидаги «(омбудсман)» деган сўз «(омбудсманнинг)» деган сўз билан алмаштирилсин;

учинчи хатбоши қуйидаги таҳрирда баён этилсин:

«Прокурор ёки суд номига йўлланган таклиф, ариза ва шикоятлар кўздан кечирилмайди ҳамда бир суткалик муддат ичида тегишлилиги бўйича жўнатилади. Хавфсизлик чораларини қўллаш ҳақидаги ёки уларни қўллашни рад этиш тўғрисидаги қарорлар устидан шикоятлар тегишлилиги бўйича дарҳол жўнатилади.».

58. 243-банддаги «туркум бошлиқлари» деган сўзлар «ижтимоий ходим» деган сўзлар билан алмаштирилсин.

59. 252-банд қуйидаги таҳрирда баён этилсин:

«252. Маҳкумлар қариндошлари билан ёки ЖИЭМ бошлигининг руҳсатига асосан бошқа шахслар билан муддати тўрт соатгача бўлган қисқа муддатли учрашув олиши мумкин.».

60. 257-банд қуйидаги таҳрирда баён этилсин:

«257. Юқумли касалликларга чалинган ва стационар даволанишда бўлган маҳкумларга учрашувлар шифокор руҳсати билан берилади.».

61. 262-банднинг биринчи хатбошисидаги «ЖИЭББ» ва «ЖИЭБ» деган сўзлар тегишли равишда «ЖИЭД» ва «Минтақа» деган сўзлар билан алмаштирилсин.

62. 264-банд қуйидаги таҳрирда баён этилсин:

«264. Маҳкумнинг илтимосига кўра узоқ муддатли учрашув қисқа муддатли учрашувга ёки масофали видео-учрашувга ёхуд телефон орқали сўзлашувга, қисқа муддатли учрашув эса масофали видео-учрашувга ёки телефон орқали сўзлашувга алмаштирилади.».

Маҳкумлар учун масофали видео-учрашувлар ЖИЭМ томонидан ташкил этилади. Масофали видео-учрашув ҳимояланган алоқа каналлари орқали видеоконференция тизими воситасида амалга оширилади.».

63. 268'-банднинг биринчи хатбошисидаги «ЖИЭББга» деган сўз «ЖИЭДга» деган сўз билан алмаштирилсин.

64. 272-банд қуйидаги таҳрирда баён этилсин:

«272. Маҳкумларга телефон орқали сўзлашувлар ҳуқуқи берилади.

Умумий, қаттиқ, махсус тартибли колонияларда, тарбия колонияларида, турмаларда ва маҳкумлар учун ихтисослашган касалхоналарда жазони ўтаётган маҳкумларнинг телефон орқали сўзлашувлари ЖИЭМ маъмурияти назорати остида ўтказилади ҳамда уларнинг ҳақи маҳкумнинг шахсий ҳисобварағидан тўланади.».

65. 274-банддаги «туркум бошлиқлари» деган сўзлар «ижтимоий ходим» деган сўзлар билан алмаштирилсин.

66. 298-банд қуйидаги таҳрирда баён этилсин:

«298. Маҳкума аёлларга вояга етмаган болалари билан бир йил ичида тўрт марта, муддати беш суткагача бўлган узоқ муддатли учрашув, манзил-колонияда сақланаётганларга эса, ишдан бўш вақтда ЖИЭМ ҳудудидан ташқарида яшаш имконияти билан узоқ муддатли учрашувлар чекланмаган миқдорда берилади.

Маҳкума аёлларнинг вояга етмаган болалари билан учрашишига ўзининг шахсини, қариндошлигини ёки васийлигини (ҳомийлигини) тасдиқловчи ҳужжатларини тақдим этган тақдирда битта яқин қариндоши ёки васий (ҳомий) кузатувида йўл қўйилади.

Маҳкума аёлларнинг вояга етмаган болалари билан учрашувлари ЖИҚда белгиланган учрашувларга қўшиб ҳисобланмайди.

Маҳкума аёлларнинг ЖИЭМдан ташқаридаги болалар уйларидаги вояга етмаган болалар билан учрашувлари маҳкума аёлларнинг илтимосига кўра амалга оширилади.».

67. 299-банддаги «Ижобий тавсифга эга» деган сўзлар «Тузалиш йўлига ўтган» деган сўзлар билан алмаштирилсин.

68. 307-банд қуйидаги таҳрирда баён этилсин:

«307. Маҳкума аёллар уч ёшга тўлмаган болаларини ЖИЭМ қошидаги болалар уйига жойлаштиришга ва ишдан бўш вақтида улар билан чекланмаган миқдорда мулоқотда бўлишга ҳақли.».

69. 310-банддаги «ногирон» деган сўз «ногиронлиги бўлган» деган сўзлар билан алмаштирилсин.

70. 312-банд қуйидаги таҳрирда баён этилсин:

«312. Маҳкумлар жинси, ёши, соғлигининг ҳолати, меҳнат қобилияти ва иложи борича, ихтисослиги ҳисобга олинган ҳолда ишлаши керак. Маҳкумларнинг меҳнатга оид муносабатлари меҳнат тўғрисидаги қонунчилик билан, ЖИҚда назарда тутилган истисно ва чеклашларни ҳисобга олган ҳолда, тартибга солинади.».

71. 313-банднинг биринчи хатбошисидаги «ЖИЭМларнинг корхоналарида» деган сўзлар «ЖИЭМ ва улар ташкилотларининг корхоналарида» деган сўзлар билан алмаштирилсин.

72. 315-банддаги «ногиронлари» деган сўз «ногиронлиги бўлган шахслар» деган сўзлар билан алмаштирилсин.

73. 323-банддаги «ногиронларига» деган сўз «ногиронлиги бўлган шахсларга» деган сўзлар билан алмаштирилсин.

74. 331-банддаги «ногиронларининг» деган сўз «ногиронлиги бўлган шахсларнинг» деган сўзлар билан алмаштирилсин.

75. 337-банд қуйидаги таҳрирда баён этилсин:

«337. ЖИЭМларнинг маҳкумлар меҳнатига ҳақ тўлашга доир харажатлари ижтимоий солиқ бўйича солиқ солиш объектидир.

Ижтимоий солиқ тўланган давр маҳкумларнинг умумий меҳнат стажига қўшиб ҳисобланади.

ЖИЭМ маъмурияти маҳкумнинг жазони ўташи даврида солиқ тўланганлиги ҳақидаги маълумотномани:

маҳкум ЖИЭМдан озод қилинишидан камида уч иш куни олдин Ўзбекистон Республикаси Иқтисодиёт ва молия вазирлиги ҳузуридаги бюджетдан ташқари Пенсия жамғармасининг туман (шаҳар) бўлимига электрон тарзда юборади;

ЖИЭМдан озод қилинаётганида маҳкумга қоғоз шаклида беради.

Маҳкумларга тайинланган пенсияни тўлаш озодликдан маҳрум қилинган вақтда тўхтатиб турилади, бундан манзил-колонияларда жазони ўтаётган маҳкумлар мустасно.

Манзил-колонияларда жазони ўтаётган маҳкумлар пенсияни қонунчиликда белгиланган тартибда олиши мумкин.

Манзил-колонияларда жазони ўтаётган озодликдан маҳрум этишга ҳукм қилинган шахсларга пенсия тайинлаш ва тўлаш манзил-колония жойлашган ердаги Ўзбекистон Республикаси Иқтисодиёт ва молия вазирлиги ҳузуридаги бюджетдан ташқари Пенсия жамғармасининг туман (шаҳар) бўлимлари томонидан тегишли пенсия суммаларини маҳкумларнинг шахсий ҳисобва-рақларига ўтказиш йўли билан амалга оширилади.

Маҳкумлар жазодан озод бўлганларидан сўнг қонунчилик ҳужжатларига мувофиқ давлат пенсия таъминоти ҳуқуқига эга бўлади.»

76. 344-банддаги «Ижобий тавсифга эга» деган сўзлар «Тузалиш йўлига ўтган» деган сўзлар билан алмаштирилсин.

77. 352-банддаги «ЖИЭББ» ва «ЖИЭББга» деган сўзлар тегишли равишда «ЖИЭД» ва «ЖИЭДга» деган сўзлар билан алмаштирилсин.

78. 362-банднинг тўртинчи хатбошиси «аёллар» деган сўздан кейин «, I ва II гуруҳ ногиронлиги бўлган шахслар» деган сўзлар билан тўлдирилсин.

79. Қуйидаги мазмундаги 363¹-банди билан тўлдирилсин:

«363¹. I ва II гуруҳ ногиронлиги бўлган шахслар учун мўлжалланган умумий турар жойлар махсус воситалар ва мосламалар билан жиҳозланади.»

80. 364-банд қуйидаги таҳрирда баён этилсин:

«364. Маҳкумларга организмнинг энергияга ва озуқавий моддаларга бўлган физиологик эҳтиёжини таъминлайдиган овқат қонунчиликда белгиланган тартибда республика бюджети ҳисобидан берилади, бундан манзил-колонияларда жазони ўтаётганлар мустасно.»

81. 366-банддаги «ногиронларига» деган сўз «ногиронлиги бўлган шахсларга» деган сўзлар билан алмаштирилсин.

82. Қуйидаги мазмундаги 367¹-367²-бандлар билан тўлдирилсин:

«367¹. Манзил-колонияларда жазони ўтаётган хомиладор аёлларга ва

эмизикли оналарга ишдан озод этилган даврида республика бюджети ҳисобидан овқат берилади.

367². Манзил-колонияларда жазони ўтаётган, касаллиги туфайли ёки интизомий бўлинмага киритилиб ишдан озод қилинган маҳкумларга манзил-колонияларнинг корхоналари, муассасалари ва ташкилотлари ҳисобидан овқат берилиб, овқатнинг қиймати кейинчалик маҳкумларнинг ойлик иш ҳақидан ушлаб қолинади.».

83. XV боб 5-параграфининг номи қуйидаги таҳрирда баён этилсин:

«5-§. Маҳкумларни даволаш ҳуқуқи асосидаги колониялар ва маҳкумлар учун ихтисослашган касалхоналарда сақлаш».

84. 371-банддаги «мактабгача таълим муассасаларига» деган сўзлар «мактабгача таълим ташкилотларига» деган сўзлар билан алмаштирилсин.

85. 382-банддаги «Ихтисослашган даволаш муассасаларида» деган сўзлар «Даволаш ҳуқуқи асосидаги колониялар ва маҳкумлар учун ихтисослашган касалхоналарда» деган сўзлар билан алмаштирилсин.

86. 383-банддаги «Ихтисослашган даволаш муассасаларида» деган сўзлар «Даволаш ҳуқуқи асосидаги колониялар ва маҳкумлар учун ихтисослашган касалхоналарда» деган сўзлар билан алмаштирилсин.

87. 384-банддаги «ихтисослашган даволаш муассасаси» деган сўзлар «даволаш ҳуқуқи асосидаги колония ёки маҳкумлар учун ихтисослашган касалхона» деган сўзлари билан алмаштирилсин.

88. 385-банд қуйидаги таҳрирда баён этилсин:

«385. Интизомий бўлинмаларда сақланаётган маҳкумлар ўзини қасдан жароҳатлаб ёки касалликка солиб, даволаш ҳуқуқи асосидаги колониялар ёки маҳкумлар учун ихтисослашган касалхоналарга ўтказилган бўлса, уларнинг даволаш ҳуқуқи асосидаги колонияда ёки маҳкумлар учун ихтисослашган касалхонасида бўлган вақти интизомий жазони ўташ муддатига киритилмайди.».

89. 386-банддаги «Ихтисослашган даволаш муассасаларидан» деган сўзлар «Даволаш ҳуқуқи асосидаги колониялар ёки маҳкумлар учун ихтисослашган касалхоналардан» деган сўзлар билан алмаштирилсин.

90. 391-банд қуйидаги таҳрирда баён этилсин:

«391. Ногиронликни белгилаш ва меҳнат қобилиятини йўқотганлик даражасини аниқлаш маҳкумлар учун ихтисослашган касалхоналарда қонунчилик ҳужжатларига мувофиқ тиббий-ижтимоий эксперт комиссиялари томонидан амалга оширилади.».

91. 392-банддаги «Тиббий-меҳнат эксперт комиссияси» деган сўзлар «Тиббий-ижтимоий эксперт комиссияси» деган сўзлар билан алмаштирилсин.

92. Қуйидаги мазмундаги 399¹-399²-бандлар билан тўлдирилсин:

«399¹. ЖИЭМда жазони ўтаётган маҳкумларнинг тузалиш йўлига ўтганлиги ЖИКнинг 102¹-моддасида назарда тутилган комиссия томонидан ҳар чорак якунларига кўра қуйидаги мезонлардан бири асосида белгиланади:

маҳкумнинг меҳнатга виждонан муносабатда бўлиши, белгиланган

меҳнат нормаларини бажариши, онгли равишда мустақил ишлаш кўникмаларининг шаклланганлиги, ўқишга ва касб-хунар ўрганишга бўлган қизиқиши; маҳкумнинг ЖИЭМда ташкил этиладиган маданий-маърифий тадбирлардаги иштироки, унинг ташаббуси, бошқа маҳкумларга ибрат бўлишга интилиши;

маҳкумнинг ЖИЭМда ўрнатилган ички тартиб-қоидаларга риоя этиши, маҳкумга нисбатан рағбатлантириш чоралари қўлланилганлиги, унга нисбатан интизомий жазо чораси қўлланилмаганлиги.

399². Маҳкумни тузалиш йўлига ўтган ёки ўтмаган деб топиш тўғрисидаги хулоса ЖИКнинг 102¹-моддасида назарда тутилган комиссия томонидан расмийлаштирилади ва маҳкумнинг шахсий йиғмажилдига қўшиб қўйилади.

Комиссия томонидан тузалиш йўлига ўтмаган деб топилган маҳкумлар билан тарбиявий-профилактика ишлари муассаса психологини жалб этган ҳолда алоҳида режа асосида амалга оширилади.

Тузалиш йўлига ўтмаган деб топилган маҳкум комиссиянинг хулосаси устидан ЖИКнинг 107-моддасида белгиланган тартибда шикоят қилишга ҳақли».

93. 401-банддаги «касб-хунар таълими» деган сўзлар «профессионал таълим» деган сўзлар билан алмаштирилсин.

94. 403-банд қуйидаги таҳрирда баён этилсин:

«403. Маҳкумлар ишдан бўш соатларда, тунги дам олиш учун ажратилган вақтдан ташқари, кинофильмлар ва телекўрсатувлар кўриш, радио эшитиришлар эшитиш ҳуқуқига эга.»

95. 409-банддан иккинчи хатбоши чиқариб ташлансин.

96. 418-банддаги «ногиронлари» деган сўз «ногиронлиги бўлган шахслар» деган сўзлар билан алмаштирилсин.

97. 422-банддаги «касб-хунар таълими» деган сўзлар «профессионал таълим» деган сўзлар билан алмаштирилсин.

98. 423-банддаги «касб-хунар таълими» деган сўзлар «профессионал таълим» деган сўзлар билан алмаштирилсин.

99. 424-банднинг биринчи хатбошиси қуйидаги таҳрирда баён этилсин:

«424. Маҳкумларга нисбатан ЖИКнинг 97¹-моддасининг биринчи қисмида назарда тутилган мезонлар асосида қуйидаги рағбатлантириш чоралари қўлланилади:».

100. Қуйидаги мазмундаги 425¹-банди билан тўлдирилсин:

«425¹. Маҳкумларга нисбатан рағбатлантириш чораларини қўллаш ҳар йили камида икки марта, шунингдек байрам кунлари муносабати билан кўриб чиқилади.»

101. Қуйидаги мазмундаги 426¹-426²-бандлари билан тўлдирилсин:

«426¹. Маҳкумларни рағбатлантириш масалалари, шу жумладан қўлланилаётган рағбатлантириш чораларининг ЖИКнинг 97¹-моддасининг биринчи қисмида назарда тутилган мезонларга мувофиқлиги ЖИЭМда тузилган комиссия томонидан кўриб чиқилади ва улар бўйича хулоса қабул қилинади.

Комиссия ЖИЭМнинг ходимлари, шунингдек жамоатчилик вакиллари орасидан камида саккиз нафар аъзодан иборат таркибда тузилади.

Комиссия таркибига жамоатчилик вакилларида, қоида тариқасида, халқ депутатлари маҳаллий Кенгашлари депутатлари, Ўзбекистон Республикаси Олий Мажлиси Инсон ҳуқуқлари бўйича вакилининг (омбудсманнинг) минтақавий вакиллари, ўзини ўзи бошқариш органларининг, жамоат ташкилотларининг ҳаётий тажрибага ва аҳоли ўртасида обрў-эътиборга эга бўлган вакиллари кирази.

Жамоатчилик вакиллари комиссия аъзолари умумий сонининг ярмини ташкил этиши керак. ЖИЭМ бошлиғи комиссиянинг раиси ҳисобланади.

426². Маҳкумни рағбатлантириш учун тавсия этиш, зарур ҳужжатларни тайёрлаш ва комиссия аъзоларига тақдим этиш отряд бошлиғи томонидан амалга оширилади.

Комиссия мажлиси ЖИК 102¹-моддасининг биринчи қисмида кўрсатилган муддатлардан бир ҳафта илгари ўтказилади.

Комиссия аъзолари рағбатлантириш учун тавсия этилган маҳкум билан унинг хулқ-атвори белгиланган мезонларга мувофиқлиги юзасидан суҳбат ўтказилади.

Комиссия қарори мажлисда иштирок этаётган аъзоларнинг кўпчилик овози билан, очиқ овоз бериш орқали қабул қилинади. Овозлар сони тенг бўлган тақдирда, маҳкумни рағбатлантириш тўғрисида қарор қабул қилинади.

Комиссия қарори мажлисда ҳозир бўлган комиссия аъзолари томонидан имзоланадиган баённома билан расмийлаштирилади ва комиссия раиси томонидан тасдиқланади.

Комиссиянинг маҳкумга нисбатан рағбатлантириш чорасини қўллаш тўғрисидаги қарорни ўз ичига олган баённомасига мувофиқ ЖИЭМ бошлиғининг буйруғи уч иш куни ичида чиқарилади ва унинг мазмуни маҳкумга эълон қилинади.»

102. 436-банд қўйидаги таҳрирда баён этилсин:

«436. Жазони ўташ тартибини бузганлик учун озодликдан маҳрум қилиш тариқасидаги жазони ўтаётган маҳкумларга нисбатан қўйидаги интизомий жазо чоралари қўлланилиши мумкин:

огоҳлантириш;

ҳайфсан;

енгиллаштирилган сақлаш шароитларини бекор қилиш;

навбатдаги учрашувдан маҳрум қилиш;

интизомий бўлинмага киритиб қўйиш».

103. 437-банд қўйидаги таҳрирда баён этилсин:

«437. Маҳкумлар қўйидаги ҳолларда интизомий жавобгарликка тортилмайдилар:

меҳнат нормаларини бажармаганлиги учун, агар бу маҳкумнинг меҳнатдан бўйин товлашнинг оқибати бўлмаса,

маҳкум руҳий ҳолати бузилишининг бевосита оқибати ҳисобланган бирор-бир қоидабузарлиги учун.

Агар маҳкум қўйидаги ҳаракатлардан бирини содир этса, меҳнатдан бўйин товланган деб ҳисобланади:

узрли сабабларсиз ишга чиқмасликни ёки ишга бир ой ичида икки ва ундан ортиқ марта кечикишни;

иш вақти давомида иш жойини узрли сабабларсиз ўзбошимчалик билан тарк этишни ёки ишлаб чиқариш вазифаларини қасддан бажармасликни ёхуд бажаришни рад этишни.»

104. 441-банд қўйидаги мазмундаги иккинчи хатбоши билан тўлдирилсин:

«Интизомий бўлинмага киритиб қўйиш тариқасидаги жазо чораси жазони ўташ тартибини биринчи марта бузган маҳкумларга нисбатан қўлланилмайди, бундан жазони ўташ тартибини қўпол тарзда бузиш мустасно».

105. Қўйидаги мазмундаги 441¹ — 441⁴-бандлари билан тўлдирилсин:

«441¹. Навбатдаги учрашувдан маҳрум қилиш тариқасидаги интизомий жазо чораси қўлланилганда ҳуқуқбузарлик содир этилган кундан бошлаб бир ой ичида маҳкум биринчи навбат билан келадиган учрашуви (қисқа муддатли ёки узоқ муддатли)дан маҳрум этилади.

Интизомий жазо чораси сифатида навбатдаги учрашувдан маҳрум қилинганда, маҳкумга учрашувлар унинг йил мобайнида олиши мумкин бўлган учрашувлар туридан келиб чиқиб, ўн икки ойга бўлганда ҳосил бўладиган даврни ҳисобга олиб, интизомий жазо чораси сифатида маҳрум қилинган учрашувдан ташқари, навбатдаги учрашув тақдим этилади.

441². Маҳкумларга навбатдаги учрашувдан маҳрум қилиш тариқасидаги интизомий жазо чорасини йилига икки мартадан кўп қўллаш тақиқланади.

441³. Жазони ўташ тартибини камида икки марта кўпол тарзда бузган ва бунинг учун интизомий бўлинмага киритиб қўйиш тариқасидаги жазога тортилган маҳкум, агар ҳар бир интизомий жазо белгиланган тартибда олиб ташланмаган ёки бекор бўлмаган бўлса, сақлаш режимини ашаддий бузувчи деб ҳисобланади.

ЖИЭМ ҳудудини ёки маъмурият йўлланмаси билан бўлиши керак бўлган бошқа жойни ўзбошимчалик билан ўн икки соатдан кўпроқ муҳлат мобайнида ташлаб кетган маҳкум ҳам манзил-колонияда сақлаш режимини ашаддий бузувчи деб топилади.

441⁴. Сақлаш режимини ашаддий бузувчи деб топилган маҳкумларга нисбатан судга қўйидагилар тўғрисида тақдимнома киритилади:

манзил-колониядан умумий тартибли колонияга, умумий, қаттиқ ёки маҳсус тартибли колониялардан — турмага ўтказиш тўғрисида;

манзил-колониядан умумий ёки қаттиқ тартибли колонияга, қаттиқ тартибли колониядан — маҳсус тартибли колонияга, колониядан — турмага қайтариш ҳақида.

Тақдимнома ЖПКнинг 537-моддасида назарда тутилган тартибда суд томонидан кўриб чиқилади.»

106. 454-банднинг иккинчи хатбошисидаги «энг кам иш ҳақи миқдорининг етмиш беш фоизигача» деган сўзлар «меҳнатга ҳақ тўлаш энг кам миқдорининг 26,5 фоизигача» деган сўзлар билан алмаштирилсин.

107. 458-банддаги «режим» деган сўз «сақлаш режими» деган сўзлар билан алмаштирилсин.

108. 463-банднинг иккинчи хатбошисидаги «ногиронлари» деган сўз «ногиронлиги бўлган шахслар» деган сўзлар билан алмаштирилсин.

109. 469-банддаги «туркум бошлиқлари» деган сўзлар «ижтимоий ходимлари» деган сўзлар билан алмаштирилсин.

110. 470-банднинг иккинчи хатбошисидаги «бекор қилиш» деган сўзлар «бекор қилиш, навбатдаги учрашувдан маҳрум қилиш» деган сўзлар билан алмаштирилсин.

111. Қуйидаги мазмундаги 473¹-банд билан тўлдирилсин:

«473¹. Маҳкумни жазони ўташдан муддатидан илгари шартли равишда озод қилишга ёки жазони енгилроғи билан алмаштиришга тақдим этиш масаласини маъмурият томонидан қайта кўриб чиқиш ЖИЭМ маъмуриятининг жазони ўташдан муддатидан илгари шартли равишда озод қилишни ёки жазони енгилроғи билан алмаштиришни рад этиш ҳақидаги қарори чиқарилган кундан эътиборан уч ой ўтгач, башарти маҳкум тузалиш йўлига ўтган бўлса, амалга оширилади.»

112. 474-банддаги «туркум бошлиқларига» деган сўзлар «ижтимоий ходимларга» деган сўзлар билан алмаштирилсин.

113. 475-банддаги «туркум бошлиқлари» деган сўзлар «ижтимоий ходимлари» деган сўзлар билан алмаштирилсин.

114. 478-банддаги «туркум бошлиқлари» деган сўзлар «ижтимоий ходимлари» деган сўзлар билан алмаштирилсин.

115. 482-банднинг иккинчи хатбошисидаги «маҳкумларга мўлжалланган Республика ихтисослашган даволаш муассасасида» деган сўзлар «маҳкумлар учун ихтисослашган касалхоналарда» деган сўзлар билан алмаштирилсин.

116. 504-банднинг иккинчи хатбошисидаги «ногиронларига» деган сўз «ногиронлиги бўлган шахсларга» деган сўзлар билан алмаштирилсин.

117. 505-банд қуйидаги таҳрирда баён этилсин:

«505. Маҳкумларни озод этиш устидан назорат қилиш учун ЖИЭМнинг махсус бўлими озод этилиши лозим бўлган маҳкумларнинг ойлик рўйхатини тайёрлайди. Бу рўйхатнинг бир нусхаси молия ва моддий-техника таъминоти бўлимига, иккинчи нусхаси эса маҳкумларни таништириш учун ижтимоий ходимларга берилади.»

118. 506-банд қуйидаги таҳрирда баён этилсин:

«506. Озод этилаётган маҳкумга жазони ўташ муддати тугашига икки кун қолганида ҳисоб-китоб қилиш учун ЖИЭМ молия ва моддий-техника таъминоти бўлими томонидан тегишли варақа берилади. Мазкур варақа ЖИЭМ бошлиғининг тартибот ва тарбиявий ишлар бўйича ўринбосари томонидан имзолангач, тўлиқ ҳисоб-китоб қилиш учун молия ва моддий-техника таъминоти бўлимига топширилади.»

119. 514-банд қуйидаги таҳрирда баён этилсин:

«514. Ногиронлиги бўлган шахслар ва кексалар ўз илтимосига кўра, кексалар ва ногиронлиги бўлган шахслар учун интернат уйларига (пансионатларга) юборилади.»

120. 2-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

121. 7-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

122. 8-илова ўз кучини йўқотган деб топилсин.

123. 9-илованинг матнидаги «УЯ-64/___», «молия бўлимига» деган сўзлар тегишли равишда «___-сон», «молия ва моддий-техника таъминоти бўлимига» деган сўзлар билан алмаштирилсин.

124. 12-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

125. 13-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

126. 14-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

127. 15-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

128. 16-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

129. 18-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

130. 19-илованинг матнидаги «УЯ-64/___», «Умумий ва касб-хунар таълими» деган сўзлар тегишли равишда «___-сон», «Умумий ўрта ва профессионал таълим» деган сўзлар билан алмаштирилсин.

131. 20-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

132. 23-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

133. 24-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

134. 25-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

135. 26-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

136. 27-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

137. 28-илованинг матнидаги «УЯ-64/___», «Туркум бошлиқлиғи» деган сўзлар тегишли равишда «___-сон», «Ижтимоий ходим» деган сўзлар билан алмаштирилсин.

138. 29-илованинг матнидаги «УЯ-64/___», «Туркум бошлиқлиғи» деган сўзлар тегишли равишда «___-сон», «Ижтимоий ходим» деган сўзлар билан алмаштирилсин.

139. 30-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

140. 31-илованинг матнидаги «УЯ-64/___», «ижобий тавсифга эгаллиги» деган сўзлар тегишли равишда «___-сон» ва «тузалиш йўлига ўтганлиги» деган сўзлар билан алмаштирилсин.

141. 32-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

142. 34-илованинг матнидаги «УЯ-64/___», «энг кам ойлик иш ҳақининг ўн фоизи миқдориди» деган сўзлар тегишли равишда «___-сон», «меҳнатга ҳақ тўлаш энг кам миқдорининг 3,6 фоизигача бўлган миқдорда» деган сўзлар билан алмаштирилсин.

143. 35-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

144. 36-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

145. 37-илованинг матнидаги «УЯ-64/___», «туркум бошлиқлари (тарбиячилар)» деган сўзлар тегишли равишда «___-сон», «ижтимоий ходимлар» деган сўзлар билан алмаштирилсин.

146. 38-илованинг матнидаги «УЯ-64/___» деган сўзлар «___-сон» деган сўзлар билан алмаштирилсин.

ЎЗБЕКИСТОН РЕСПУБЛИКАСИ
ИҚТИСОДИЁТ ВА МОЛИЯ ВАЗИРИНИНГ
БУЙРУҒИ

509 Кадастр йиғмажилдининг муқоваси ва таркибидаги электрон ахборот тизимида шаклланадиган маълумотларнинг намунавий жадваллари, қайдномалари ва бланкалари шакллари тасдиқлаш ҳақида*

*Ўзбекистон Республикаси Адлия вазирлиги томонидан 2023 йил
12 декабрда рўйхатдан ўтказилди, рўйхат рақами 3483*

Ўзбекистон Республикаси Президентининг 2022 йил 21 декабрдаги ПФ–269-сон «Янги Ўзбекистон маъмурий ислохотларини амалга ошириш чора-тадбирлари тўғрисида»ги Фармони ҳамда Ўзбекистон Республикаси Президентининг 2022 йил 21 декабрдаги ПҚ–447-сон «Янги Ўзбекистон маъмурий ислохотлари доирасида республика ижро этувчи ҳокимият органлари фаолиятини самарали ташкил этиш чора-тадбирлари тўғрисида»ги қарори ҳамда Вазирлар Маҳкамасининг 2021 йил 22 июндаги 389-сон «Давлат кадастрларини юритиш соҳасини тартибга солувчи айрим норматив-ҳуқуқий ҳужжатларни тасдиқлаш тўғрисида»ги қарорига мувофиқ **буюраман:**

1. Кадастр йиғмажилдининг муқоваси ва таркибидаги электрон ахборот тизимида шаклланадиган маълумотларнинг намунавий жадваллари, қайдномалари ва бланкалари шакллари иловага** мувофиқ тасдиқлансин.

2. Ўзбекистон Республикаси Давлат солиқ қўмитаси ҳузуридаги Кадастр агентлиги директорининг 2022 йил 21 апрелдаги 3-2022-сонли «Кадастр йиғмажилдининг муқоваси ва таркибидаги электрон ахборот тизимида шаклланадиган маълумотларнинг намунавий жадваллари, қайдномалари ва бланкалари шакллари тасдиқлаш ҳақида»ги буйруғи (рўйхат рақами 3369, 2022 йил 20 май) (Қонунчилик маълумотлари миллий базаси, 20.05.2022 й., 10/22/3369/0444-сон) ўз кучини йўқотган деб топилсин.

3. Ушбу буйруқ Ўзбекистон Савдо-саноат палатаси билан келишилган.

4. Мазкур буйруқ расмий эълон қилинган кундан эътиборан кучга киради.

Вазир

Д. КУЧКАРОВ

Тошкент ш.,
2023 йил 4 ноябрь,
82-сон

* Ушбу буйруқ «Қонунчилик маълумотлари миллий базаси»да 2023 йил 14 декабрда эълон қилинган.

** Илова «Қонунчилик маълумотлари миллий базаси»да эълон қилинган.

Келишилди:

*Ўзбекистон Савдо-саноат
палатаси раиси*

Д. ВАХАБОВ

2023 йил 1 ноябрь

**Ўзбекистон Республикаси Адлия вазирлигининг
вазирликлар, давлат қўмиталари ва идораларнинг
норматив-ҳуқуқий ҳужжатларини давлат рўйхатидан
ўтказиш ҳолати тўғрисида
МАЪЛУМОТИ**

1. Давлат рўйхатидан ўтказилди:

1. Ўзбекистон Республикаси ёшлар сиёсати ва спорт вазирининг 2023 йил 10 ноябрдаги 18-мх-сон «Ўзбекистон Республикаси Ёшлар сиёсати ва спорт вазирлиги стипендиясини тайинлаш ва тўлаш тартиби тўғрисидаги низомни тасдиқлаш ҳақида»ги буйруғи.

2023 йил 4 декабрда рўйхатдан ўтказилди, рўйхат рақами 3479.

2. Ўзбекистон Республикаси ички ишлар вазирининг 2023 йил 2 ноябрдаги 602-сон «Жисмоний ва юридик шахсларга тегишли итларни умумий бўйсунувчанлик ва химоя-қоровул кўникмалари бўйича тайёрлаш учун пуллик хизматлар кўрсатиш, шунингдек наслчилик питомнигида етиштирилган ва ички ишлар органларининг эҳтиёжидан ортиқ бўлган ҳамда хизматга яроқсиз деб топилган итларни сотиш тартиби тўғрисидаги низомни тасдиқлаш ҳақида»ги буйруғи.

2023 йил 5 декабрда рўйхатдан ўтказилди, рўйхат рақами 3480.

3. Ўзбекистон Республикаси ички ишлар вазирининг 2023 йил 2 ноябрдаги 601-сон «Ички ишлар органларида хизматга номзодларни танлаб олиш тадбирларини ташкил этиш ва ўтказиш тартиби тўғрисидаги йўриқномани тасдиқлаш ҳақида»ги буйруғи.

2023 йил 6 декабрда рўйхатдан ўтказилди, рўйхат рақами 3481.

4. Экология, атроф-муҳитни муҳофаза қилиш ва иқлим ўзгариши вазирлиги, Қишлоқ хўжалиги вазирлиги ҳамда Иқтисодиёт ва молия вазирлигининг 2023 йил 23 ноябрдаги МХ-16, 01/24-09-305 ва 88-сон «Бошоқли дон экинлари сомонини ёқиб юборилиши натижасида етказиладиган зарарни аниқлаш ҳамда ушбу ҳолатларни содир этган юридик ва жисмоний шахсларга нисбатан жарималар қўллаш бўйича низомни тасдиқлаш ҳақида»ги қарорга ўзгартиришлар киритиш тўғрисида»ги қарори.

2023 йил 7 декабрда рўйхатдан ўтказилди, рўйхат рақами 1647-3.

5. Ўзбекистон Республикаси иқтисодиёт ва молия вазирининг 2023 йил 13 ноябрдаги 84-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномани тасдиқлаш ҳақида»ги буйруқ, шунингдек унга ўзгартириш ва қўшимчаларни ўз кучини йўқотган деб топиш тўғрисида»ги буйруғи.

2023 йил 7 декабрда рўйхатдан ўтказилди, рўйхат рақами 2282-9.

6. Ўзбекистон Республикаси адлия вазирининг 2023 йил 7 декабрдаги 21-мх-сон «Товар келиб чиққан жой номини ва товар келиб чиққан жой номидан фойдаланиш ҳуқуқини рўйхатдан ўтказиш учун талабномаларни тузиш, топшириш ва кўриб чиқиш қоидаларини тасдиқлаш тўғрисида»ги буйруғи.

2023 йил 7 декабрда рўйхатдан ўтказилди, рўйхат рақами 3482.

7. Ўзбекистон Республикаси ички ишлар вазирининг 2023 йил 2 ноябрдаги 503-сон «Ўзбекистон Республикаси Ички ишлар вазирлиги озодликдан маҳрум қилиш туридаги жазони ижро этиш муассасаларининг ички тартиб қоидаларига ўзгартириш ва қўшимчалар киритиш тўғрисида»ги буйруғи.

2023 йил 11 декабрда рўйхатдан ўтказилди, рўйхат рақами 2495-7.

8. Ўзбекистон Республикаси иқтисодиёт ва молия вазирининг 2023 йил 4 ноябрдаги 82-сон «Кадастр йиғмажилдининг муқоваси ва таркибидаги электрон ахборот тизимида шаклланадиган маълумотларнинг намунавий жадваллари, қайдномалари ва бланкалари шакллари тасдиқлаш ҳақида»ги буйруғи.

2023 йил 12 декабрда рўйхатдан ўтказилди, рўйхат рақами 3483.

II. Давлат реестридан чиқарилди:

1. Ўзбекистон Республикаси ички ишлар вазирининг 2022 йил 5 мартдаги 52-сон «Ички ишлар органларида хизматга номзодларни танлаб олиш тадбирларини ташкил этиш ва ўтказиш тартиби тўғрисидаги йўриқномани тасдиқлаш ҳақида»ги буйруғи (рўйхат рақами 3352, 2022 йил 9 март), шунингдек унга ўзгартириш ва қўшимчалар (рўйхат рақами 3352-1, 2022 йил 11 ноябрь).

2023 йил 6 декабрда давлат реестридан чиқарилди.

2. Ўзбекистон Республикаси молия вазирининг 2011 йил 14 октябрдаги 63-сон «Пенсия ишларини расмийлаштириш ва юритиш тартиби ҳамда пенсия ҳужжатларининг шакллари ва уларни тўлдириш қоидалари тўғрисидаги йўриқномани тасдиқлаш ҳақида»ги буйруғи (рўйхат рақами 2282, 2011 йил 27 ноябрь), шунингдек унга ўзгартиришлар ва қўшимчалар (рўйхат рақами 2282-1, 2012 йил 5 сентябрь), (рўйхат рақами 2282-2, 2014 йил 8 июль), (рўйхат рақами 2282-3, 2014 йил 15 декабрь), (рўйхат рақами 2282-4, 2016 йил 6 июнь), (рўйхат рақами 2282-5, 2017 йил 26 июль), (рўйхат рақами 2282-6, 2019 йил 17 июнь), (рўйхат рақами 2282-7, 2019 йил 3 октябрь), (рўйхат рақами 2282-8, 2020 йил 20 апрель).

2023 йил 7 декабрда давлат реестридан чиқарилди.

3. Ўзбекистон Республикаси Давлат патент идораси директорининг 2002 йил 11 октябрдаги 52-сон «Товар келиб чиққан жой номини рўйхатдан ўтказиш ва товар келиб чиққан жой номидан фойдаланиш ҳуқуқини

бериш учун талабномани тузиш, топшириш ва кўриб чиқиш қоидаларини тасдиқлаш тўғрисида»ги буйруғи (рўйхат рақами 1185, 2002 йил 1 ноябрь), шунингдек унга ўзгартиришлар ва қўшимчалар (рўйхат рақами 1185-1, 2007 йил 13 ноябрь), (рўйхат рақами 1185-2, 2011 йил 30 сентябрь).

2023 йил 7 декабрда давлат реестридан чиқарилди.

Мазкур ҳужжатлар қонунчиликка ўзгартириш киритилиши ва/ёки янги норматив-ҳуқуқий ҳужжатлар қабул қилиниши муносабати билан давлат реестридан чиқарилди.